

ASO LUA, 21 IANUARI 2020

Na toe faaauau Taualumaga a le Fono Aoa Faitulafono i le itula e 6.00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faataatua o Tupe Faaopopo (Nu.1) 2019/2020.

SUI FOFOGA FETALAI: E manatu o le a lelepa ia faavaatiu o aau loloa le paia maualuga o le Palemene i ona tulaga faalupea. O lea ua ifo i le lima le segaula a le Malietoa pei ona tatou i ai i le fonotaga i le taeao ua sola. I le toe talia manuia mai o sui usufono o le Maota i lenei afiafi, ou te manatu ua maua se faasiliga malosia e faaauau ai toega o totoe o le tatou galuega i lenei aso pei ona i ai le lafo faatu i le taeao ua sola.

O lea ou te faasilasila atu ai ua toe amatalia nei taualumaga o le Fono Aoa Faitulafono. E faataatiaese Galuega a le Fono Aoa i le aoauli analeila ua maea ona saunoa le sui usufono mo Vaisigano Nu.2. Ia, o le avanoa lenei mo se tasi foi sui usufono e fia saunoa. Ia tulai mai le sui usufono mo Faasaleleaga Nu.2.

Tofa NAMULAUULU LEOTA SAMI LEOTA (Faasaleleaga Nu.2): Faafetai i lau Afioga i le Fofoga Fetalai. Ua ou tu nei i le vaitia o aliiseu se i faailo le lupe nai fuifui aua le Fonousu a Samoa ua potopoto nei. O le mea moni ta te fia pese ta te fia alaga lea, ae paga lea, e tau laa ma tau faanape ona e lavelave le vaosa o Samoa. Ou te manatu o le a magalo se leo o lenei sui usufono ona o le aso lea ua atofaina aua le Fonousu a Samoa ua potopoto, aua le tofa faaali ma se tofa faailo ia ma se utaga faaae, ia o lea o le a taumafai atu ai lenei sui usufono e fai ma sui o le matou itumalo.

Lau Afioga i le Fofoga Fetalai, afio lau Afioga i le Palemia ma lau Kapeneta, afio foi Afioga i Minisita Lagolago aemaise foi Taitaifono ma sui usufono o Komiti taitasi ma sui usufono mamalu o lenei Palemene o le Fonousu a Samoa. Sa i ai se manatu muliai i le matou Komiti o Tupe ona o lo o i ai i totonu lou nei sui usufono, ae

fesoasoani atu ai lau Afioga i le Fofoga Fetalai lea o le a vave avatu ai se manatu o lenei itumalo. Ia ma le isi foi mea, o lou sui usufono o lea e fou i totonu o le Palemene o Samoa te i ua oo i le taimi mulimuli leai se avanoa o lenei sui usufono. Ma lou faaaloalo.

SUI FOFOGA FETALAI: Saunoa le sui usufono mamalu.

Tofa NAMULAUULU LEOTA SAMI LEOTA: E fia fonofaapipii lou nei sui usufono i nisi foi o folasaga ua maea ona i luma o le Maota, e ala lea i le faafetaia o le Palemia aemaise o le vasega o le Kapeneta e tusa ai foi o le faatautaia o le tulaga sa i ai le misela i totonu o le tatou atunuu. O le mea moni e le i faigofie, ae ui ona o lea foi sa tele ina afaina ai lo tatou atunuu, ae ou te manatu e tele ni feau lelei sa faapea ona aumaia ai i le tulai mai o lenei faamai. O le mea muamua, o lea lava tatou te sii le viiga ma le faafetai i aso uma o le tatou faatasiga. Ae manatu o se avanoa foi lea ma se feau ua tuuina mai e tofotofoina ai lo tatou faatuatua ma lo tatou tapuai atu i le Atua e tusa ai ma le tatou va ma lo tatou Atua. O lea e momoli atu ai le faafetai tele i lau Afioga i le Palemia aemaise foi o le Minisita o le Soifua Maloloina e tusa ai foi o le faatautaia o le faamai o le misela, ia o lea ua maea atu.

O le isi vaega sa maitauina i le tulai mai o le misela, e matautia le lototasi ma le lotonuu o tatou tagata, e le gata i le galulue faatasi o le Malo aemaise foi o le afaigaluega tofofi a le Malo, a o le lagolago mai foi a le afaipisinisi e ala i le tuu mai o latou tauau i le faatinoina o le fesoasoani. E maitauina foi ma le agaga fiafia le lagolago mai a tatou paaga mai atunuu mamao. A o le isi mea e sili foi ona fiafia ai, o le tuuina mai o le fesoasoani a fanau ma tagatanuu o Samoa i atunuu mamao e pei ona maitauina. O le tasi lea o fiafiaga o lou nei sui usufono. E ui o le faamai ua tulai mai i Samoa, a o se avanoa ua faapea ai ona tuufaatasi o tatou loto ma o tatou taumafai faatasi i le lotonuu e teena ma foia lenei faafitauli. O aso e lua lea sa fai ai aso malolo, sa ou auai lava i Savaii i si o matou nuu. O le tala a le isi toeaina, se faafetai lava i le Malo mo nei aso malolo, ua maua le avanoa e toe mafuta ai ma fanau ma o latou aiga, a o se avanoa foi ua faapea ona toe valaau mai ai nisi o fanau mai atunuu mamao ua leva e le o toe fesootai. E faapena lava le agaga o so o se tagata Samoa, o a lava mea tatou te eseese ai, ae a oo loa i taimi e taimi faapenei. Na pau lava le agaga o so o se tagata Samoa, o a lava mea tatou te eseese ai, ae a oo loa i le taimi e tupu ai pagatia ma tulaga faapea o le olaga, e i ai lava le agaga lena, e sisi lava le faamalama ma tilotilo mai e fia fesoasoani mai ia Samoa. O lea foi sa maitauina i nisi o fanau a le atunuu, fomai ma tamaitai fomai ua faapea ona malaga mamao mai atunuu mamao e fesoasoani i le tatou falemai. Ia e le itiiti lea

fesoasoani. O lea na ona faaleo atu ai le faafetai e ala atu i lau Afioga i le Palemia faapea le Afioga i le Tamaitai Minisita ma le Aiga Kapeneta mo lea vaega.

O le taimi o aso malolo, e fia faaleo lau faafetai i lau Afioga i le Minisita o le Kamupani Vaa. Sa tele se tulaga sa i ai le faatupulaia o le au femalagaai i le va lea o Upolu ma Savaii, aua o matou nei o sui usufono mai Savaii e tele lava ina faapea ona o atu i Savaii i le tele o weekend. Ae na maitauina le galulue punouai ma le tautua sa faapea ona faaaauina ua faigofie ai faigamalaga. E le gata ia i tatou o lo o alaala i Samoa nei, a o le tele foi o tagata fai mai na asiasi atu i Savaii i a latou iuni (reunion) ma latou faatasiga sa fai, o lea sa faapea ona galulue faasoloatoa ai le kamupani vaa. E fia faaleo atu ai le faafetai, aua atonu e itiiti le vaai i lea vaega, ae matua taua tele lea tautua sa faia. Na pau se fautuaga i le Minisita o le Kamupani Vaa ma le Pulega, se i vaavaai ifo aua ua fai foi si leva o le tatou vaa lea. Ioe, masalo pe atoa lava le tolu i le fa vaiaso o pe le air condition o le vaa lea e agai atu i Savaii. E te iloa foi matou mai Savaii ua tele ina air condition potu o tagata uma i Savaii, aemaise foi i inei. E pei ua spoil tagata i le vaega lena e oo atu loa i luga i le vaa fai mai, na a lau malaga? Fai mai, se ua matua vevela le vaa ua le ola le ea. Ia atonu e le o se fault lea o le tatou kamupani vaa, ae se i toe vaavaai i ai aua ua matua foi si vaa. Pe le toe vaavaai i ai faafetai o lena ua maea ona oka le tatou vaa fou mo le femalagaai lea i Apia ma Tutuila, ae se i vaavaai ifo i ai pe le talafeagai mo le agai i luma se isi vaa aua faigamalaga mo i tatou o lo o agai atu i le motu tele i Salafai.

Ina ua ou tulai mai i le tofi o le matou itumalo, sa tele lava ae ou te le i sau i totonu o le Maota lena sa ou faalogologo lava i lauga a sui usufono o le Fono Aoaio Faitulafono. O le tele lava o taimi ou te faalogo mai ai, o le tele lava o lauga o auala ma taligalu. Ina ua faapea ona ou tulai mai sa faapea ona ou agai atu foi ma fesilisili i si ou itumalo po o a lava mea e manaomia e agai atu ai se tautua a lou nei sui usufono fou. A o le tele lava o talosaga sa tuuina mai, o le tulaga lea e agai mai i auala ma taligalu. Ia o lea foi la o le a fai atu ai lau lauga i lau Afioga i le Minisita i o matou auala ma o matou taligalu. E momoli atu ai le faafetai tele i lau Afioga, o lea ua maea ona tatalaina le matou auala i Eveeve, o le auala sa talosagaina e le matou sui usufono faatoa uma atu nei le Afioga ia Sefo Pau, aua o lou sui usufono o le sui usufono faaaauau. O le mea sili o lea ua ou fesili atu i le Minisita o Faiga Palota, o le sui faaaauau lava o le 2019 faatoa uma i le isi lima tausaga. O lona uiga, e faaaauau atu lava i le isi lima tausaga. Ou te le iloa po o sao ae o le talaula mai lava ia te au ae o lea ou te fiafia lava aua o lea e faafofoga mai lou itumalo, aua o lou sui usufono o le sui usufono faaaauau.

Ia, faafetai ua maea, aua o lea sa faia le konekarate, e alu atu e le tau i uta le ta, a o lea na faaali manino e le Afioga i le Palemia i lana saunoaga i lea aso, o lea ua toe faamatuu atu ona o le talosaga foi a si o matou nuu ma lou nei tagata, faatasi ai foi ma le fesoasoani mai a le kamupani o le Apia Lua, o lea ua faaauau ai i uta le auala lea i Eveeve. E le itiiti lea fesoasoani a le Malo i lo matou itumalo ma lo matou nuu. E momoli atu ai le faafetai tele. Pau o lea, o lo o i ai lava le talosaga o lo o tuuina atu, ua talu ona fai le auala ua maea, ua tele tagata ua mei i uta, aiga, a o le talosaga, se i toe vaai ifo lau Afioga pe a talafeagai ma lau pule faasoa i le eletise aemaise foi o le tulaga o lo o i ai le vai aua aiga o lo o faapea ona agai atu i le vaega lea o le auala.

I tulaga i auala ia sa ou taua ma talosaga atu ai, aemaise si ou nuu lea i Sapapalii. O lo o i ai le auala i ina i Sataelea, o le auala i Aiouli ma le auala lea i Vaitolo. E moni o auala o lo o faapea o auala galue, ae a afio atu i ai lau Afioga ma le Matagaluega, ua fai lava si tele o tagata o lo o faapea ona mei i uta i le vaega lea o le nuu. Ia e le o tatalo atu e faata, ae na pau le talosaga lau Afioga, e silafia foi o le tele o nei aiga ua tofu taavale. Ia na ona tatalo atu, na o sina masini lava na ona faalaulelei atu ai le agai i le 200 i le 300 mita agai i uta, ona maea lea. Atonu a lava lau pule faasoa, mo se isi tausaga i luma atu, a o lenei taimi, e pei o le immediate need lena o lo o i ai i le taimi nei e faapena foi si o matou nuu i Tapueleele lau Afioga i le Minisita. Faafetai o lea ua maea ona faaleleia le auala lea i totonu o Tapueleele, lea e taamilo i totonu o le nuu. A o lo o i ai foi auala loto na o lo o i ai i totonu. O le taimi lenei o le tasi o auala mo le silafia e lau Afioga i le mea ua i ai, ua le mafai ona toe sao ai ni taavale, vaeatu le faafofoga a le Maota. Ua tutu taavale i luma ae amo i tua uta a nai tagata i totonu o le nuu lea. Na ona tatalo atu ai, na o ni nai uta lava se i tau faamalo le auala ona o le tele o taavale a nai tagata ia, e le o ni taavale four wheel drive, o taavale lava e maualalalo na ona faalaulelei lava se i sao ai i uta ma faapena ona ave a latou uta i tua. Ma lou agaga faaaloalo.

O le tulaga lea i taligalu lau Afioga, masalo e le o toe po se lilo i le tele o talanoaga i lenei vaitaimi o lo o talanoaina ai le tulaga o le soua ma le gatalitalia o le gataifale e ala i le suiga o le tau o lo o i ai. E pei foi ona ou fai atu sa ou faalogo lava o talanoa ai le tele o sui usufono. I le mea lava sa i ai sa faapea ona asiasi atu i tua i nuu nei, mai lava i Sapapalii e oo i Tuasivi aemaise le agai atu i luma o le falesa lea EFKS i le alu agai i tai i Sapapalii, alu atu i ina i Vaimaga ma Eveeve, o Fatausi, ia e le tau fai atu lau Afioga, ua fai lava si afaina o fanua aemaise ai aiga, ua alu atu lava le galu alu agai i uta i aiga ia. Na ona tuu atu i ina i tafatafa o lau Afioga i le Minisita aemaise foi lau Afioga i le Sui Palemia po o fea o na Matagaluega se

i tagai ifo i ai pe maua se fesoasoani mo si ou itumalo. Faafetai i lau Afioga i le Minisita o Galuega e tusa ai foi ma le auala o lo o faatino nei i totonu o Maliolio. E pau le talosaga e pei ona maua foi i le talanoaga o lenei auala, e pei ua fai si tuai po o si delay ona o nisi foi o suiga o lo o i ai. E pau le talosaga e tuuina atu ona o lea e maua atu, pe mafai lava ona se i tagatagai agai atu i le faaaogaina o nisi o tatou local **expertise** i le faaaogaina aemaise le engineer ina ma le faiga o le auala lea. O lea o lo o maua foi i faamatalaga o le Kamupani mai Korea lea o lo o faia le inisinia o le auala lea, ae pei ona tatou maua atu i le taunuu mai, e fitu nai variations ou te iloa o mea ia e tutupu lava i taimi uma i so o se auala. Ae se i vaavaai i ai pe le talafeagai foi ona faaaoga atu ma tatou local **expertise** i le tulaga inisinia ma vaega ia. Ou te iloa o le tele o funding ia o lo o tuuina mai, o lo o manaomia ai le faaaogaina o Kamupani mai fafo.

SUI FOFOGA FETALAI: Malie le sui usufono o lo o saunoa. Tulai mai le Afioga i le Minisita o Galuega tetele a le Malo.

Susuga Hon Papaliitele Niko Lee Hang: E le fia faalavelaveina le saunoaga matagofie a le sui mamalu, ae ou te tulai atu, ona o lea e saunoa mai i le kamupani Korea, ua leva ona faatea lenei kamupani. O lea ua galulue ai a tatou inisinia e toe tapena le ata lea ua faatino ai galuega. O inisinia a tatou lea o lo o faatinoina, ao le kamupani Korea ua maua atu e le World bank, e kuluku le kamupani, la ua toe tutuli e le i faaauauina legaluega. E le o faaaogaina, o le latou design lea na aumai lea e faaletonu ai le faiga o le galuega. O lea e i ai variations ia na toe maua atu e tatou inisinia, e tele pupu lea sa maua i le ata ae le i maua i ata a le au Korea. Ne i mea ane ua toe talanoa mai se isi i le mataupu lea, ao lea ua faaaoga a tatou inisinia. Ma lou faaaloalo lava.

SUI FOFOGA FETALAI: Masalo o lea ua manino lea vaega saunoa le sui usufono toe lua ou minute.

Tofa NAMULAUULU SAMI LEOTA: Faafetai tele I lau Afioga I le Minisitao lea ua manino lea vaega. Momoli atu le faafetai mo le faamalamalamaina. Faafetai i lau Afioga i le Minisita o Galuega e tusa ma le auala lea e agai atu i Faleolo. Ae o le isi problem tele po o le isi lea faafitauli tele lea o lo o tulai mai i le auala lenei. Ua lelei le auala, ou te iloa o le isi lenei mafuaaga e tele ai faalavelave o lo o i ai, ao le tele ia o taavale e o lemu. E na ona talosagaina ai lau Afioga i le Minisita ma le Matagaluega aemaise le Matagaluega o Leoleo, se i toe tagatagai i ai, e ese le **frustrated** o le tele o avetaavale, se i vaai i

ai pe mafai ona foia lea faafitauli, e pei o latou lea e tele ina slow ai le traffic agai atu i o i le malaevaalele.

Faafetai o lea ua maea le tatou misela, ae o le talosaga i le Ofisa o le **Tourism**, se i vaavaai pe mafai loa ona matua **aggressive** le tulaga ua i ai le faalauiloaina, o lea ua alu ese atu le misela ma totonu o Samoa. O le vaiaso na tea atu nei, na faapea ona matou malaga atu ai ma se tasi o sui usufono nei i se fonotaga sa faia i Ausetalia. E pei o le tala lena o lo o tuuina mai, e i ai lava tagata o lo o faapea ona i ai lo latou manatu ma masalosalo o lea lava o lo o tumau. O lo o taumafai lava, e le gata o le Faalapotopotoga o Tagata Tafafao maimoa mai Fafu, aemaise foi tatou o lo o faapea ona tatou talanoa i o tatou aiga ma tatou paaga, o lo o faapena ona, ua saogalemu Samoa mo le faimalaga mai o turisi ma i latou e faimalaga mai fafo.

O le agai atu o se faamatagala i le auala lea i uta i Fiaga, e momoli le faafetai tele i le Minisita o le Samoa Land Corporation. E tusa ai ma le taumafaiga o le auala lea. O le mea moni e tele faatoaga talo ua i ai i uta i Fiaga, faafetai ua faalauileleia le auala, ao le taimi lena ua amata ona toe faaleagaina. A fa i lau afioga e a pe a se i toe faalauileleia ifo, aua ua tele foi le tamaoiga o le atunuu e agai mai uta i le auala lea.

O le faamatalaga mulimuli e tuuina atu i lau Afioga i le Minisita o Tina ma Tamaitai, i le vaega tonu lea o sui o nuu. I totonu o nisi o nuu o lo matou itumalo e lua faiganuu, lua pulenuu ae tasi le sui tamaitai. Aemaise totonu o Sapapalii ma totonu o Fusi. E na ona tuuina atu le talosaga pe talafeagai, o lea ua mautinoa e tele lava le aoga foi o sui pulenuu aemaise foi o sui tamaitai, i le fesoasoani mai i lo tatou Malo, i le faatinoina o ana fuafuaga ma ana polokalame faataatitia. O lea e tuu atu ai i tafatafa o le Afioga i le Minisita, se i vaai i le tulaga lea. A faapea e tasi le pulenuu, ia i ai ma se sui tamaitai ou te iloa e matua lelei foi le faatinoina o galuega e taumafai mai ai.

E fia faaleo lau faafetai faapitoa i le Matagaluega o Leoleo, e le gata i le taimi lea na tupu ai le misela ao le taimi lea sa faapea ona i ai i aso malolo. O le tele lava o faalavelave sa tulai mai o le tele o le au onana, ma le au tagofia le ava malosi i luga o le auala. Ou te iloa o le tele o poloka a leoleo ia sa fai, na faaititia ai lea vaega ma laititi ai foi le tele o **casualties** po o faalavelave e tulai mai i luga o auala, e le gata foi i lea, ao i latou e soli le tulafono. E matauina foi o totonu o le matou nuu i Fogapoa ma Tuasivi o lo o i ai le post a leoleo. E tele lava i le ao ma le po, o faigaluega le malu o le Malo, e toe faamalosi atu ai, faafetai mo le tulaga o lo o i ai le galuega o lo o agai atu e faaititia ma le osofaia o i latou o lo o totonu le mariuana ma laau faasaina. O lea foi ua agia i nisi o lauga i totonu o le Maota lena, le tele o vaega ia o le aisa. O le ofisa o leoleo ua malu atu i ai le atunuu,

faafetai i lau Afioga i le Palemia ma le Minisita, o le tatalo ia faaauau le galuega lelei o lo o fai, matou tatalo mo lo outou saogalemu, ou te tatalo ina ia faalototeleina outou, aua le taumafaiga o ia galuega, aua a malu Samoa e faapena foi ona manuia ana taumafaiga.

SUI FOFOGA FETALAI: Fautuaina le sui mamalu o lo o saunoa faamaea mai lau saunoaga ma lau lauga matagofie ua maea lou taimi.

Tofa NAMULAUULU SAMI LEOTA: E usitaia lava e lou sui usufono lau Afioga. E momoli atu ai le faafetai tele i lau Afioga i le Fofoga Fetalai mo lenei avanoa matagofie, ua faapea ona tuuina atu ai se leo o lenei itumalo.

E momoli atu foi moomooga alofa i le Taitai o le Malo, vasega i le Kapeneta aemaise sui usufono o le Palemene o Samoa. Manuia lo outou alo atu i galuega o lenei tausaga. E le faagaloina foi le aufaigaluega tofofi a le Malo, i Ofisa Sili o Pulega o Matagaluega ma le aufaigaluega a le Malo o lo o vae ma lima i ai le Fono Usua Samoa, faamalo le tautua faamalo le galulue.

Muliai lau faafetai i si o matou itumalo, si ou nuu o Sapapalii, ma si ou nuu ia Safotulafai. Aua sa Malietoa ma le alalafaga o Usoalii, matua ia Mago ma o la siufanua, nofo ituaiga ia te oe Sapapalii aemaise ai foi le alalatai o Leilua ma le toalima o alii, alo o Malietoa ma le matua, i le laau na pule ia Tuilagi ma Namulauulu, maopu o Tufuga ma le na ae i malae ma le mamalu ia te oe Safotulafai, se ua faamalo tapuai, ua faamalo le lagolago, o lo o outou po lava le fala ma ula le mulila, ia tapuaiga le alofaiva o lo outou sui usufono. Faafetai le lagolago mai.

E le faagaloina foi le aufaigaluega tofofi a le Atua, vaa folafola o le talalelei, se ua logo i tino i vai le mana o a outou tatalo lea o lo o faapea ona manuia ai le alo atu o la outou sui usufono. Tatou galulue pea ma o tatou talatalanoa aua galuega o lenei tausaga, ma lou agaga faaaloalo faafetai.

SUI FOFOGA FETALAI: Faamalo saunoa i le sui mamalu. E tasi lea fetu pupula o le usoga a Pule. E le tau laeia le maa osofia. O lea ua faafofoga le Maota faafofoga foi lou itumalo, malo saili. Ia faamanuia le Atua i lau nofoaiga o lea ua faaauau i le isi 5 tausaga. Tulai mai le sui mamalu o Siumu.

Afioga FAALOGO IOSEFA SOPI (Siumu): Faafetai i lau afioga i le Fofoga Fetalai mo lou avanoa. E muamua foi ona faatalofa atu i Le Ao o le Malo, le Sui o le Fono o Sui Tofia. Taitai o Ekalesia Kerisiano i totonu o le tatou atunuu. Le paia o Samoa o mafai ona faafogafoga mai i lenei taimi. E faatalofa foi i lau Afioga i le Palemia

ma le aiga Kapeneta faapena lena itu. Faatalofa foi i lenei itu o le tatou palemene nei. Faatalofa atu foi i Ofisa Sili o Pulega o Matagaluega a le Malo ua mafai ona tatou faatasi i lenei aso. Ae o le a taumafai atu se sui o lenei itumalo aua le tala o le tupe ua lumamea nei.

E muamua ona momoli le faafetai i lau Afioga i le Minsita o Tupe i lenei Tala Faaopoopo Nu 1 o le tupe i lenei tausaga. E ui ina laititi e \$23.6miliona e pau o le mea ua mafai i lenei taimi. E i ai le talitonuga e uma atu ia timuga nei, ua tele foi le tupe e toe faaopoopo i le supplementary lenei, ona o le tele o mea o le a faaleagaina i matagi ma timuga o lo o i ai nei. E faafetai foi i Ofisa Sili o Pulega o le Matagaluega i le tapenaina o lenei tala i le tupe. E lua ni vaega taua e ave i ai lau faamuamua i le tala o le tupe lenei. O le tinoitupe lea ua ave e amata ai le police academy. E momoli atu le faafetai i le Minisita faapea le Minisita o Leoleo mo lea faamoemoe. Aua o le academy afai ae faatulagaina, ma tulai mai le academy a tatou, e ono aumai uma i ai atunuu Polenisia o le Pasefika. E iu ina aumai ai leoleo e aoaoina ai, o i ina e maua ai se tupe faaopoopo a le Malo i le lumanai i lea tulaga. O le isi tulaga i le tala lava lea faaopoopo o le tupe, faafetai i le seleni lea ua tuu mo le faaleleia o alavai i totonu o le taulaga, amata mai i Vaea seia oo i le uati. Atonu o se galuega ua leva ona tataua ona fai, ae faafetai o lea ua ae se tofa ua mafai ona faaopoopo i ai lena vaega tupe tele mo lea faamoemoe. O alavai nei sa fausia muamua, e fausia o ou i ai i le Ofisa o Galuega, o lea foi o le a toe tilotilo i ai ma toe fausia. E pau lava le tuualalo se i tagai lelei le Matagaluga o Galuega i se design o le a fai. Se design lelei ia aua ne i toe poloka le alavai. Ona o le vaega tonu lea e fai si maualalo. A sau i luga le tai ua sau i luga, o le mea lena e ala ai ona poloka alavai i le tele o taimi. O le tuualalo lena i lau Afioga i le Minisita, se i tagai lelei i se design lelei e fai ai lea galuega tele.

Ona oo mai lea i le Afioga i le Minisita o le Soifua Maloloina. E momoli atu le agaga faafetai tele, i tapenaga uma ma galuega uma sa faia mo le misela, faafetai i tamaitai fomai ma alii fomai o tamaitai fomai, o i latou uma sa fai sao i le faamoemoe e pei ona tulai mai i lo tatou atunuu. E le faigofie le galuega sa alo atu i ai lau Afioga ma le Malo. E faafetai foi i le Taitai o le Malo i le taitaiga o le Malo i lea taimi faigata. E momoli atu le faafetai tele i galuega sa faia i lena vaitau ma tulaga faapena. E i ai si tuualalo i lau afioga i le Minisita, o nei ina ua maea la tatou Fono sa ou alu atu ou alu i uta i le falemai, ou te alu atu o tele lava le queue i le falemai, ou fesili atu ae fai mai, e o e aumai certificate o i latou e misela. Se i tagai lava, o le tele o le queue na i ai sei tagai pe leai se auala e ono faigofie ai lea vaega. Ona e vaai lava i timuga le tele o le queue o le mamalu o le atunuu e o atu e fia maua mai certificate ia faamolemole. Ona oo mai lea i lau

Afioga i le Minisita o Galuega, Felauaiga ma Atinae eseese a le Malo. E toe avatu pea ma toe avatu pea talosaga a lenei itumalo. O lenei ua 5 tausaga, e le i tino mai lava se galuega i totonu o lou itumalo. E talosaga atu ai i lau afioga, se i tagai ane, e 4 aualagalua o le auala i totonu o le aai, ua oo i le tulaga e toe fausia atoa, ua matua le lelei ma omoomo i le taimi nei. O le isi tulaga e talosagaina le auala lea i Falealili street, le auala lea e alu atu i le **cross island road**, i le taimi nei i le tau lea ua i ai, e matua puaoa e te le iloa le auala, pe mafai ona toe vali le ogatotonu o le auala, e toe line mark ma toe fai ia mata, lea e tau o le mata o le pusi lea e tuu i le ogatotonu, a susulu atu i ai moli o le taavale ona iloa lea. E faigofie lena ma saogalemu aua le feoi o le mamalu o le atunuu. Atonu e le na o le pau lea o le auala e oo i ai lea tulaga. E talosaga atu i lau Afioga sei tagai ane i le tulaga lea. O le isi tulaga o lea na taua e le sui usufono ua maea atu nei, i le auala lea agai i le malaevaalele, pe le mafai ona fai se passing lane foi lea, aua e lautele e mafai lava, a alu alu le lua, tasi le isi pito ae lua le isi pito. E faigofie e mafai ai ona fepasiai ia taavale mai lea taimi i lea taimi. O le isi tulaga lau Afioga se i tagai ane lava i le fonoina o tatou auala, e maitauina pea, na ona uma lava ona fono toe alu ese. E i ai le masalosaloga, afai o le auala o le **as Faults**, e tataua lava ona fono e le **as Faults**, aua le aumaia le mea e fono ai le auala **tip seal** e fono ai le isi auala. Leaga e eseese ituaiga auala ia e lua faamolemole. Na o se talosaga lea e avatu i lau Afioga.

SUI FOFOGA FETALAI: Malie le sui usufono o lo o saunoa nei le sui usufono mo Siumu se i tulai mai le Afioga i le Minisita masalo e malamalama lelei i le mataupu lea ua oo i ai lau saunoaga.

Susuga Hon Papaliitele Niko Lee Hang: Lau Afioga i le Fofoga Fetalai, e le fia faauilavea foi i le saunoaga matagofie a le sui usufono mamalu, ae ona o lea ua laga mai mea tau auala i mea ia, e sao le saunoaga a le sui usufono mamalu i mea ia o faailoilo foi ia e maka ai auala ona o le alu lea i luga i Tiavi agai i Siumu a louloua le tau e pogisa atoa ma puaoa, ae se i toe faamanatu i le Pulega e o se i vaai pe ua pepe vali ia e toe tavalii.

O le tulaga lea leaga o lea ua toalua sui usufono mamalu ua laga mai passing lanes ia i le tatou auala lea agai i Faleolo, o lea ua taatia fuafuaga i le tulaga lea ae se i tau saili po o fea le vaega auala e tau lautele laiti ona fua lea o se isi lane e faaopoopo aua la le tulaga lea. O le tapenaga mo le isi vaega o le auala lea second phase lea e amata atu i ina i Malua e tau i Faleolo, o lea o le a tau uunai ina ia tolu lanes ina ia lua lanes o le agai atu i Apia i Faleolo ia maua ai la le avanoa, leaga e sao e fai lava si poloka o le auala pe a oo i le taimi foi leape

aumai ni maliu mai Niu Sila, po o le o atu foi o ni maliu agai o e pue le vaa agai i Salafai, o le tulaga lava lena. E poloka lava le auala ona o le tulaga o le vaiti. Sa tapena foi le auala lea e faagasolo nei e faalautele, ae peitai ane omai le au fautua, le tatou paaga lea e faia le galuega e toe faalaitiiti, toe tuutuu mai i totonu ona o le tau , a o lea la o le a tapena lelei le second phase o le tatou galuega lea, ia mautinoa e i ai se tulaga faapena ia faafaigofie ai ona fepasiai taavale pe a oo i le taimi e tau tulituliloa ai se vaalele, ua lata i le taimi a ua tuai. O le tulaga lena ne i meaane ua toe lauga mai ai se isi sui usufono, a o lea o le a tapena ina ia address le mea lea ia mautinoa ai ni nai passing lanes ae ou te iloa e le i faia se faaiuga a o le tulaga lea o le a fuafua i ai e faalua lanes i le second face, e faatolu, ae fuafua lava la i le avanoa o tatou fanua foi lele, le tatou reserve, aua a tele foi le reserve, e tele foi se tau e ono faatupe e le Malo e compensate ai fanua o aiga ia o le a faaogaina le vaega lea o le auala. A o le faamoemoe lena, faafetai.

SUIFOFOGA FETALAI: Ou te manatu ua faamalieina le sui usufono mamalu. Se i tulai mai le sui usufono mo Salega Sasae.

Tofa Olo Fiti Afoa Vaai: Lau Afioga i le Fofoga Fetalai, na o si mea a lea e fia maua ai se malamalamaaga mai le Afioga i le sui usufono mamalu ona o lea e faalauaitele le saunoaga i konekarate foi lea faapea na o le tanu lava ma toe o ese. Po o le mea o ai tonu konekarate lea e faia i le taimi lenei po o le taimi sa fai ai lana konekarate po o le a tonu le sao. Ma lou faaaloalo.

SUIFOFOGA FETALAI: Faafetai mo le faauilavea. Saunoa le sui usufono mamalu mai Siumu e faaauau lau saunoaga.

Afioga FAALOGO IOSEFA SOPI: Faafetai i lau Afioga. Ia se i ta talanoa i tua ona logo atu lea o le tulaga lea.

Ona oo mai lea i le Minisita mo Aoga, faafetai mo galuega ma mea uma i lenei vaitau. E lua lava nai tuualalo lea e fia avatu i lau Afioga i le NUS. O lo o maua i le taimi nei ua amata ona sioki faiaoga ma tulaga faapena, e oo foi i le o atu i totonu i le vaega lea e o atu amata i le Iunivesite, pei ua amata ona faaitiitia. E avatu se tuualalo i lau Afioga faapea le Board a le NUS, pe a pe a tuu i lalo maka e ono ulu atu ai tagata i totonu, e le iloa pe tasi lena tulaga ua ala ai ona le o atu isi i luga ma tulaga faapena. E pei na ona tilotilo lava i ai o lau Afioga i le tulaga lena. E le uma ai i i, e le iloa pe uma atu le sioki o faiaoga ae siaki mai fomai ma isi tulaga, o le vaai i luma lea e fai atu ai lau Afioga i le tulaga lena.

O le isi tulaga, e talu lava ta te le o vaai i ni Ads a le NUS o faasau ai ni courses o la e fai i totonu o le NUS. E manaia le faatasi i le masina pe lua i le masina ona sau ni nai faasalalauga foi nei faalauaitetele ina ia iloa ai, aua e tatau foi ona iloa e matua, e iloa e tamaiti laiti la e fuafua mai i luga aua le lumanai o latou. Ia oo lava i le taimi ua tatau ona alu i le Iunivesite ua iloa fuafua po o le a le course o le a alu e fai, e faapena foi matua, e alu atu le tama po o le teine e tau atu o le a ave le course lea, ua malamalama matua po o le a le course o le a oo i ai le vaega lea. Ae momoli atu le faafetai tele i galuega, faafetai i kesi na oo atu i le faleaoga a si o matou itumalo na manaomia. E momoli atu le faafetai tele i lau Afioga.

Ona oo mai lea i le Minisita o le tatou Vaalele, faafetai o lo o fealuai pea le Samoa Airways i lenei taimi. Ae na ona tuu atu i lau Afioga, pe le ua tau maua se isi vaalele e faalua ai tatou vaalele ona o le tele o le o lea i Ausetalia, Niu Sila, ma lea foi e faamoemoe i Amerika. Se i tagai ane lau Afioga i ai pe le i ono tatau ona aumai se isi vaalele e faalua ai le vaalele lea aua e tasi lava le tatou vaalele, e alu alu i le isi taimi fai mai o la e ua i Ausetalia ua le sau, ia e le iloa i ai po o le a le tulaga i lea vaega.

Lau Afioga i le Minisita mo Eleele, na o se talosaga lava a lenei itumalo, e i ai le vai a si ou itumalo o lo o i ai o le igoa o Leloloa, e manaomia lava se fesoasoani. Atonu faatoa oo atu lea o lea talosaga, e manaomia se fesoasoani i le vai ona o le tulaga ua oo i ai ua tele ina toa ai le palapala foi lea i totonu ua le tafe. Ia na o se fesoasoani e taatia atu a o se taimi ou oo atu. Ia, atonu na pau ia o nai manatu i lenei itula, ae momoli atu le faafetai tele i lau Afioga i le Palemia ma le Aiga Kapeneta, ia o outou mama na. I lenei tausaga ua amatalia, ia alo ane e fai, o le tausaga pisi lenei o tatou, toe tasi le tatou tausaga amata le faiga palota i le tausaga fou. Ia faafetai foi i Ofisa Sili o Pulega, o outou lava o lima ma vae tou te faia mea o lo o talosaga ai nei sui usufono ma le mamalu o le Maota nei.

E momoli atu le faafetai i lau Afioga i le Fofoga Fetalai ma le Ofisa o le Fono. Ia manuia ae ola lenei sui usufono.

SUI FOFOGA FETALAI: E le tau sulaina lava le ie memea ia. O le lauga a le itumalo o Siumu, o le lauga a le va o Malo, na o le faafetai lava faafetai faafetai. O le mea lea, malo tapena, o lea e faafofoga mai le itumalo, o le agaga lena. Tuu atu le avanoa i se isi sui usufono e fia lauga. Le sui usufono mamalu mo Salega Sisifo.

Afioga TOOMATA AKI TUIPEA (Salega Sisifo): Faafetai mo le avanoa o lenei itumalo. E muamua ona ou momoli le faafetai i le Palemia aemaise le Aiga Kapeneta ae faapena foi i Minisita Lagolago. E momoli foi le faafetai i Matagaluega ma

Faalapotopotoga a le Malo ona o lo latou fitaituga i lena tausaga ua mavae atu i le feagai ai ma tiute ma galuega faatino mo le auaunaga i le mamalu o si o tatou atunuu. E le faigofie le galuega aemaise foi e le faigofie foi le sueina o tupe, ae ua mafai ona faatino o ia galuega ona o lo outou sogasoga ma le finafinai mo mea lelei aua lava si o tatou atunuu ina ia maua uma e tagata i nuu ma afioaga le soifua lelei, aoaoina lelei, ma faatino foi fuafuaga uma mo le atinae o aiga, nuu aemaise o Ekalesia.

O lenei lava itula ou te muamua ona ou afea le Afioga i le Minisita o Galuega ona o galuega faatino i lena tausaga e oo mai i lenei tausaga. Sa tuitui atu pea ma faaleo atu manaoga o lenei itumalo faatasi ai ma le tatalo i le Atua ina ia faatinoina nei galuega aua lava auala galue o lou itumalo. Faafetai o lea ua tatala le auala i Fagafau. Ia e le faigofie e taugata, ae faafetai ua mafai ona ae se tofa i le Palemia ma le Kapeneta aemaise o lau Afioga ua mafai ai ona faatino lenei galuega.

O lena foi sa faaleo e le tootoo o lea aso, e i ai nai isi itu o lo o fia faaleleia aemaise foi le itu i le suavai, o le eletise ma tulaga uma faapena o lo o i lalo o lau Mataglauega. Ia e le faatuatua iti le sui usufono o lo o faafogoga mai foi si o matou nuu ua faaleo e le tootoo, ae o le a ou tuituiina ma tuuina atu talosaga tusitusia i lau Afioga ia faapena ona maua se tali fiafia i le lumanai.

Ou te toe faamanatuina atu foi ua uma ona talia le auala galue o si ou nuu o Fogatuli. Na uma loa ona pasia le paketi ona ou alu atu loa lea matou fono ma si o matou nuu i le tausaga ua tea faailoa i ai o lea ua tali mai le Malo o le a faia le tatou auala galue. Ou toe faaali lava i ai ma le kopi o le Budget o lo o i ai le igoa o Fogatuli. Ne i faapea nai toeaiina ua ou faavaleaina latou, ae tuu atu lava i ina, ne i alu alu lenei tausaga uma lava le tausaga o talia lava, ae taatia atu pea i lau Afioga faapea le Palemia ma le Kapeneta ina ia faapena ona faatinoina lenei galuega. O lenei lava auala galue sa faapea sa pasia i le tausaga aemaise o le Paeaiiga talu ai, ae peita e le i faatinoina. Sa faalua faatolu ona alu atu le survey i le tausaga ua tuanai atu ma le isi tausaga 2018 ae peitai, e le i faatinoina lava. O le ala foi lea sa ou tuitui atu ai pea, tiga le lagona e le lava le faasoa a le Malo, ae ou te talitonu, e tele auala e saili ai. Ua lava foi lo outou tomai ma le agavaa e aisi mai ai nai tupe e faatino ai lenei faamoemoe. Fogatuli, afai o outou faafogafoga mai i le lauga a le tou sui usufono, o lea ua toe tuitui. Ou te le i pepeloa lava se toaina po o se olomatua. Ae afai ae le taunuu, ia o lona uiga ua ou pepeloa lo matou nuu. O lea e tuitui atu ai i lau Afioga aemaise le Palemia alofa mai, faatino le galuega ua uma ona pasia ne i te i ua alu alu te i ua faalogo atu ua leai se mea. O lena le talosaga i lau Afioga....

SUI FOFOGA FETALAI: Malie le sui usufono mamalu o lo o saunoa se i tulai mai le Afioga i le Minisita mo Galuega e tali i le mea lea e te lauga i ai. Saunoa lau Afioga i le Minisita.

Susuga Hon Papaliitele Niko Lee Hang: Lau Afioga i le Fofoga Fetalai, e sao le saunoaga a le Afioga i le sui usufono, ae manatua foi o le tele ia o auala e tele foi itumalo. O lea la e faasoa atu o lea e fai le fagufagu, ae tapuai mai pea Fogatuli masalo a lava a le faasoa i le paketi fou pe a aulia Iuni o le a toe oo atu ai le faasologa ae onosai mai o lea e tau faasolo atu lava ma faasoa atu tupe ia e maua ina ia talia foi manaoga o isi sui usufono mamalu o le Palemene i latou foi auala. Ae lavapapale mai ma onosai mai e i ai lava le taimi e oo atu ai foi le tufa i lou itumalo e faatino lau galuega. E moni e pasia, ae a leai ni tupe e le mafai ona faatino. E faamalulu atu ai. Ae tapuai mai ma onosai mai.

SUI FOFOGA FETALAI: Ia masalo o lena ua tali le fanoga o le itumalo, ae saunoa e faaauau le saunoaga matagofie.

Afioga TOOMATA AKI TUIPEA: Faafetai. Ou te talitonu o oe o le Aoao Fesoasoani, e te le manao e olegia se isi. Ma o lenei foi vaegatupe ua uma ona talia, ta te le manao e pei ita o se tamaitiiti foi lele ua toe fao mai lava le puka kopai i le gutu. O le mea la lea, Fogatuli, a o outou faafogafoga mai, ou te le pepeloa outou, ae afai ae le taunuu, o le Afioga i le Minisita ua pepeloa outou.

Faafetai tele mo galuega tetele.

SUI FOFOGA FETALAI: Ia, tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o lena ua saunoa atu le Minisita, e taua tele le faamanatu mai a le sui usufono. Masalo afai na i ai le igoa o le tou afioaga i le paketi talu ai, o le mea e tatau ona fai, e tatau loa ona fai. Lau Afioga i le Fofoga Fetalai, ia taatia maia o lea ua maua atu lou siufofoga. Ae i ai lava le tulaga foi lele o le mataupu foi lena o lea sa tau matamuli ai i le tulaga o le toatele o tatou e 50. O le ala foi lena o lea sa ou faamanatu ai i le toatele foi o afioaga sa tatou feiloai i le toatele o tatou, aua o le mea lava lea e uma atu le isi sui usufono ae tagitagi mai le isi sui usufono. A o le mea taua i le faalogologo atu o lea ua uma ona outou feiloai ma le afioaga, o lea ua uma atu le paketi sa tatau ona faatino ai, a o lea ua le manuia, ia, ae taatia mai. E le iloa pe uma atu i le tolu masina lea o lumanai ua totogi lafoga a faifeau ona tele ai lea o tatou tupe.

SUI FOFOGA FETALAI: Faafetai. Ia faaauau le saunoaga a le sui usufono mamalu mo Salega.

Afioga TOOMATA AKI TUIPEA: Faafetai. E le masalosalo foi le sui usufono, o le a ou nofo lava ma ou tatalo ma tui atu le mulipapaga ina ia to mai se matupalapala o si nei nuu.

Lau Afioga i le Minisita mo Galuega, faafetai mo le faafoeina o le Faalapotopotoga o Vaa a Samoa, e talitonu o le tele ia o le aoga o lenei auunaga mo i matou faimalaga mai Savaii, aemaise lava o i matou nei o sui usufono e vaiaso lava ma o ma toe omai ma toe vaiaso toe o. E pei lava ona faaleo e le Afioga i le tootoo o Safotulafai, o le a le toe oo i ai se leo o le ea malulu. Ae o le a oo atu sau talosaga i le tupe foi lea e totogi pe a misi le vaa, pe a toe sui lau booking, \$29 o se mea tele. O le matua tele lava o lea tupe, aemaise i matou nei, pe faalua faatolu ona alu i Savaii i le vaiaso, ae alu atu lava ae fetau ma faalavelave le maalofia. Ia e toe sau ae faapea, totogi le \$29. Ae tago atu i le taga ua alu loa i lalo ua leai se mea. O le mea lea, se i toe silasila i lea tulaga, toe tuu i lalo i le \$15, ae o le mea e tatau ona fai e foia ai le faafitauli foi lea o le nofo nofo lava te i ua le alu atu ae afaina ai isi tagata o lo o femalagaai. Ia e faataatia atu i ou tafatafa, o oe o le Suetusi, Tausitusi, ua e silafia mea faapena, aemaise lava o lo o maitau atu i le polofiti a lenei Faalapotopotoga, ia e faifaimea mai i luga i le tai miliona tala. E a pe a fesoasoani mai ia i matou o lo o feoai soo i Savaii.

O le isi tulaga, e i ai mea foi ia e masani ona fai e pisinisi, afai o vaai o feoai soo ma faaoga soo e tagata femalagaai le service, ona fai lea o ni nai cards foi nei e pei e faailoa ai, e maua ai ni nai incentives i nai tagata femalagaai. Aua o le pisinisi, o le kamupani lea e ala ona ola o matou nei mai Savaii. A fai foi pe le maua ni cards, ia avane e faa-share holders uma tagata Savaii i le kamupani vaa e maua ai foi ni matou tufatufaga pe a maua tou polofiti.

Ia o se tuualalo lena a le itumalo i lau Afioga i le Minisita mo Galuega. Ia ona ou oo mai lea i lau uo lea faapelepele le Minisita mo Aoga. Faafetai tele lava i le faafoega a le Matagaluega, e to lou pulou ia te oe, manaia le gasologa o le galuega i itu uma. Ua maua foi i uta i le NUS ua le toe faia le mea lea o le uma o suega ona aumai lea o le lisi a le NUS o tamaiti e tatau ona o faasikolasipi, a o lea lava ua filifili lava ona tuu mai lea o le lisi o tamaiti e fua i o latou maka ona apply lea o le tamaitiiti i le Iunivesite. Ou te le iloa po o le sao lea ae i ai si tamaitiiti foi o lou aiga o lea e faamanuiaina i le avanoa lea, sa ou talatalanoa i ai ma ia faapea mai e le o toe avatua le lisi foi lea e otomeki lava le alu ai o le tagata lea e aumai i le lisi ae ua fua lava i maka, ma e apalai oe i le Iunivesite i fafo ona maua mai lea o lau

faamanuiaga. O le mea la lea ia malo. Faafetai foi ona o le lagolagoina o le talosaga a le matou faleaoga o Samata ma Fagafau, o lea ua maua le fesoasoani mai Iapani e toe faaleleia ai le faleaoga. Masalo o le vaiaso lea sa saina ai le tupe lea ua maua mai e toe faafou ai le faleaoga o Samatai Tai ma Fagafau. Ae o lo o i ai foi le isi faleaoga a Faiaai ma Fogatuli, o la e foi ua ave le talosaga ae faamamafa i ai lau saina ma lou aao ina ia talia. E taua tele le aoaoina lelei o tamaiti, aemaise lava matou nei mai Savaii. Faafetai i nei tupulaga e le i oo i ituaiga faafitauli sa matou omai ai i aso ia, matou te omai e faatali le vaa i luga i le uafu i Salelologa ai ai e namu e leai se fale pe nonofo ai lava atoa le vaiaso e leai se vaa ona matou faapena ai lava laia. Ae faafetai o lea ua i ai suiga tetele i lenei vaiata, aemaise foi o kolisi ua faatuina i itumalo, ua faaitiitia ai tupe alu a matua. Ia na pau lava o lea, se i silasila ane, fai se lala o le Matagaluega o Aoga i Salelologa. E pei lava ona taua e le Afioga i le sui usufono mamalu lea na faapea mai, a oo i le aso o le pay ona omai i le taeao faiaoga mai tua e saina o latou pay. E faapena foi la Savaii, e tataua ona i ai ni nai ofisa i ina i Salelologa faatasi ma se lala o le PSC e foia ai le faafitauli lea, e le gata i le fia iloa e tagata faigaluega o latou totogi, aua e i ai isi taimi, o aso ia sa ou manatua e i ai le TY15, afai e fai sau siitaga, ona aumai lea o le TY15 e le Matagaluega i le PSC, ona nofo ai lava lea pe atoa le tausaga e le o iloa e le tagata faiaoga po o so o se tagata faigaluega i tua po ua talia pe leai, pe ua maua sona siitaga pe leai. Na pau la le auala e fai ai, o le sau i i e vaai le tou ofisa i Apia ma vaai le PSC iinei i Apia ae tuu ai le galuega pe atoa le vaiaso e le o faigaluega, e le faapea e tuuaia faiaoga ma tagata faigaluega, o tagata uma tatou te fia ola i le tupe. Afai la ua fai se lala i ina i Salelologa e o ae i ai aua e toatele le aufaigaluega, e o ae i ai e fai ai latou mataupu, e saili i ai po ua maua lona totogi pe leai, po ua fai lona siitaga pe leai, ia ona faafesootai mai lea o le tou ofisa i Apia e foia ai le tau sau i Apia, e tele ai ana tupe e alu ma tiai ai le aoga. E faataatia ae i ou tafatafa ina ia taumafai e foia lea faafitauli, o mea e lelei i Upolu, e tataua foi ona lelei i Savaii ma nuu i tua.

Ia, o lea ou te maitauina, o le tele ia o pasi lea na aumai i le tatou Malo faameaalofa, o lea ua faatau ese isi pasi. Faafetai o lea ua faaoga tataua le tupe e i ai i totonu mo le atinae o le Malo. Ae ou te talosaga atu, aumai se pasi ma Salega Sisifo. E tele nai tamaiti e feoai mamao mai, toe oo i le afiafi e faatalitali pasi foi nei o le vaa se i alu atu le pasi mulimuli ona faatoa o ai lea i o latou aiga. Puipui a tatou fanau, aemaise nai fanau teine. E talosaga atu ai i lau Afioga i le Palemia, alofagia se pasi e avatu e faaoga pe afai, o la e ou te vaai o la e tutu lava pasi, i tutu tutu, maitaulia e i ai le wear and tear o taavale nei, i tutu tutu te i ua maumau ae sili ai le avatu e faaoga e le

gata i lou itumalo, a o isi itumalo o lo o mamao mea e tausavali atu ai tamaiti. E totogi lava o latou pasese ina ia cover ai le wear and tear ma le penisini ma le totogi o le tagata e avea le pasi ma maintain ai i aso uma. Ae faaoga pasi ia pe afai ua, ne i tutu tutu maumau le pala ae avatu e tofufusia ai nai itumalo taitasi aemaise itumalo mamao e i ai matou. Ia, ma lou faaaloalo lava.

O le Matagaluega o Tagata Tafafao Maimoa Mai Fafao. Faafetai o lea ua vaavaai atu e i ai le faatoaga foi lea e tau fai i uta i Nuu. Sa matou fesilisili atu i le susuga i le Ofisa Sili o Pulega, po o le a lea ituaiga faatoaga, ae fai mai o lea e taumafai e fai se faatoaga foi lele pei o le faatoaga foi lea i Etena. O i ina e i ai laau eseese e i ai foi ma le laau e iloa ai le lelei ma le leaga. Ia sa matou matamata, o le manaia ia o mafaufauga, ona faapea lea, talosia ia taunuu lea faamoemoe. O se fuafuaga lelei, ae taatia atu i lau Afioga i le Minisita mo Tagata Tafafao Maimoa Mai Fafao aemaise foi o le Minisita o Faatoaga, vaavaai ni ituaiga laau eseese ia foliga lava o le faatoaga lea o Etena e mafai ona o atu ma talatalanoa i ai ma tofotofo i ai i fua o faatoaga ma matamata foi i le matagofie o laau, ni laau foi e te talatalanoa i ai ae talatalanoa mai ia te oe.

SUI FOFOGA FETALAI: Malie le sui usufono o lo o saunoa, tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ina ia manino le atinae lea, aua pei e faaataata a lafoga foi lele ma tauemua lea atinae lea. E lelei ona silafia, o le tasi lea vaivaiga o lo o feagai ma Samoa i le taumafaiga ina ia lava mea ia e omai tatou tagata mai fafo ona faamatamata ai lea ma umi le latou nonofo iinei i Samoa, mea ia e taumafai i ai le tele o atunuu ona o le atinae lea o le tagata tafafao maimoa mai fafo, lea e aupito tele le tupe o lea e maua mai ai, masalo po ua ova i le \$400milionia i le tausaga. E le o se mea la e faaataata a lafoga le atinae lea. O le agaga atoa lena o lea e matau mai, o lea e i ai mea e omai tagata tafafao maimoa mai fafo ona o lea e matamata ia ina ia umi le taimi iinei. E matua le aoga lava le mea o le tagata tafafao maimoa mai fafo ae tasi le asoae toe alu i fafo. E leai ni mea e faatosina ai e faapena foi la ma Savaii, e taumafai ina ia o tagatai i Savaii ia umi ai ona i Samoa nei, ona tele ai lea o latou tupe e faaalu i faleaiga, faaalu i Hotels ma le anono o le mau fanau a Samoa ia e faigaluega ai. O le isi la lea mafaufauga tele lava, ia i ai se togalaau e i ai uma lava laau eseese, laau manogi, o fuga o laau eseese, e pei o aute pe fia ituaiga o aute e toto e omai tagata e matamata ai e faapena uiga o tagata Turisi. O isi Turisi na ona omai lava o i luga o mauga pau lava lea o le latou

mea e fai e o tilotilo i luga o laau, matamata i laau. O le tulaga taua la o le mea lea, e ono taofiofi mai ai ma faaola ai isi laau ua tauau ina le toe vaai i ai. Aua e i ai ituaiga o laau manogi, ituaiga laau manogi uma lava. Po o le a lava le ituaiga laau, lagaali, o le laau foi lea o le pualulu, o le alii o le po. Ia matua toto uma lava i vaega eseese, e i ai foi la ma laau aina. E i ai ma ornamental plants, e vaevae i vaega eseese, sa ou vaai i ai i mea faapea i Dunedin. E tasi la lea mea a omai la vaa a turisi, ia leiloa pe atoa lava le aso pe lua aso o matamata ai. E i ai se tina e iuta i Vaivase e fai lana atinae faapea. Lau Afioga i le Fofoga Fetalai, mea uma lava ia, e oo fai la i mea ia lea sa pei e lauga faaulaula ai le isi sui usufono analeila i masini faafiafia i uta i Tafaigata, o mea uma lava na lea ua maua ai galuega a tagata. Pau lava le mea sa ou fia tulai atu ai e faasao analeila o le auala lena e i ina, ua leva ona fai ae lei faapea na fai le auala lena faapitoa mo le Entertainment Park lea, leai, o le tele ia o tagata faigaluega la ua galulue ai. E oo foi la i le anoano o aiga mai Sogi lea na o atu ai iina ma maua ai galuega. O le agaga lena o le Faigamalo lenei, ina ia tele ituaiga atinae faapenei maua ai galuega a tatou fanau. Ae le gata la ilena ae ia atili ai ona manuia taumafaiga a i latou ia e uunaia atinae eseese tau turisi. O faleaiga, fale taavale, o tagata ia e faatau solo a latou oloa i le auala tele, o fale talimalo. O tagata uma lava ia o lea e manuia ai i mea faapea. Lau Afioga i le Fofoga Fetalai, o le tulaga lena ae o le a maua ai foi ma Vaega foi ia o togalaau e faaoga i fofo. O mea uma lavana o lo o taumafai e toto uma i i. A oo la i le taimi e moomia ai, a o la ua i ai se faatoaga e mafai ona o atu ai tagata e aumai ai aemaise lava i mea ia o laau o vaifofo. Lau Afioga i le Fofoga Fetalai, e lelei le mafaufauga ma e tele le manuia e maua mai ai, pe afai e maea lelei ona faatino le faamoemoe lea.

SUI FOFOGA FETALAI: Malo saunoa i lau Afioga i le Malo. O lea foi ua faafofoga le atunuu ma le Maota, ua manino auofala i tulaga uma o atinae e pei ona taumafai i ai lo tatou Malo aua lava le tau atinaeina o vaega e talosaga ai o tatou Itumalo taitasi. Ae faaauau faaiu mai le saunoaga a le sui usufono mamalu mai Salega Sisifo.

Afioga TOOMATA AKI TUIPEA: Faafetai i le taitai mo le faamalamalamaga o lea tulaga, e matua lagolagoina e lenei sui le atinae lea. Ae peiseai o le avatu o ni manatu faatupu manatu i le Matagaluega aemaise foi fuafuaga uma a le Pulega, ina ia silasila i ituaiga o laau ia e faatosina atu ai tagata i totonu. Sa maitauina foi o lo o hire tagata foi ia e faia galuega. E fautuaina foi le faaogaina o Komiti o nuu foi ia e latalata i ai, fai ni a latou poloka pei e tauva ai lea i le teuina ma le faalaauina o ia atinae ina ia matagofie pea i taimi

uma e asiasi atu i ai e le gata i le au turisi ae faapea foi le mamalu o le atunuu.

Ona ou oo mai lea i le Matagaluega o Leoleo, e momoli le faafetai tele i le Komesina o Leoleo ma le aufaigaluega. Ou te manatua le tausaga lea na tea atu nei lea na alu atu i le TV faatoaga mariuana na maua, e le faigofie e lamatia le soifua ma le ola o le aufaigaluega, ae o le a le mafuaaga? o le tau sailiga o Samoa ina ia saogalemu ona tagatanuu e oo lava i fanau. Ae e pei foi ona saunoa se tasi o sui ma taua lea faafitauli. O le mea lea ou te maitauina ma ou masalomia o i latou nei o lo o atu ma uunai atu latou fua nei o latou laau i tupulaga foi lea e o e uunai solo atu i tupulaga o nuu e aafia ai ma nai tamaiti aoga. E fai sau faamatalaga ona e i ai nai isi tamaiti foi o lo matou nuu, soo se taimi lava ou te alu atu ai i fonotaga. Ou te vaai lava o tamaiti lava nei e faasala, faasala faasala pea ona o uiga lava e tutupu mai totonu o latou aiga. E foliga mai e mafua lea tulaga ona e masalomia o se tulaga faapena o le faaoga o mariuana. Ona ou fesilisili lea, po o fea e aumai ai nei mariuana ae pei e foliga mai, o le aualii e fai ma a la masani le omai i i Salelologa atonu o i ai ni fesootaiga ma nisi o lo o o atu ma nei foi oloa o lo o faatauina o mariuana ona o lea o latou ma uunai so o se isi. O le mea e popole ai o le aafia ai o alo ma nai fanau laiti ona tutupu ai lea o faalavelave ma afaina ai le saogalemu i totonu o le atunuu. E avatu ai se tuualalo ina ia mataala, i le pule mamalu a alii ma faipule, faletua ma tausi i nuu ma afioaga ina ia vaavaai totoa lea tulaga. Aua a le galulue faatasi nuu ma afioaga ma le Matagaluega o Leoleo e le mafai ona maua se Samoa saogalemu. O le mea lea e avatu ai le tuualalo, faafetai tele mo ia galuega lelei. Atonu ua maea atu i i se manatu ae momoli tele atu le faafetai i lau Afioga i le Fofoga Fetalai mo le avanoa. Ae ou te fia afea foi lou itumalo, mai lava i Fagafau seia paia Faiaai, o le paia lava lea i le afio o Fualau ma le aiga o Sa Fualau, afio Tilafono ma Faavaoga aemaise foi le Afio o Sua ma Fepuleai ae tainane le Fetalai ia Tui Salega o lo o teuvaatele i lou Itumalo. Afio foi Afualo ma le toafa o ona alo aemaise foi Faimago o le fofoga o le usoalii. Fagafau alo o Lilomaiava, Tuimaugapo ma le aiga sa Tuimaugapo aemaise foi Sa Soa ma sa Ma'e o lo o pola puipui e alo o Lilomaiava. Ona ou oo mai lea i si ou nuu o Samata. Afio lau afioga i le sao, toafa o alii aemaise foi le nofo a ituaiga o sa Leutogi, malo le tapuai malo foi le tui o le mulipapaga ma taputapuai ma talosagaina le feagai ai a lo outou sui usufono, ma le faalagamaea a Samoa. E maua ai se malosia e le gata i le tino ma le mafaufau, ae o lo o tapueina foi le agaga faaleagaga, malo foi i galuega fai i totonu o le tatou itumalo. O lo o faapena ona malu ai pea le pulega a alii ma faipule aemaise foi le puipui o o tatou tagata i lena tausaga aemaise foi o lenei tausaga o lo o ua amata. Faafetai, soifua.

SUI FOFOGA FETALAI: Ua faamalo lauga, i le sui usufono mamalu o Salega i Sisifo. O le tofa matua faaulusinasina e ese le anoa, e taua foi i le faalogologo. O lea ua faafofoga le Maota o la foi e tapuai mai lou itumalo, sagai ane ai o le tai. O upu a le atunuu e le sili le ta'i i le tapuai. O le agaga lena, tatou tapuaia faiva o le Malo, aua e le tasi se itumalo e i ai talosaga e pei ona talosagaina. Ae o le agaga lena, ua uma foi ona fautuaina mai le Afioga i le Minisita o Galuega tetele a le Malo, o lea foi e taoto le isi tala o le tupe, atonu e fesoasoani malosi lea mo a tatou talosaga. Ma ua avanoa foi le Maota mo se sui usufono e fia saunoa. Tulai mai le sui mamalu mo Falealili i Sisifo.

Tofa AUMUA ISAIA LAMEKO (Falealili i Sisifo): Faafetai i lau Afioga i le Fofoga Fetalai mo le avanoa i lenei itula afiafi. Faafeiloai atu i lena itu o le Maota, i le afio o lau Afioga a le Palemia mamalu o le Kapeneta, Minisita lagolago faapea sui mamalu o lenei itu. Malo le soifua maua ma le lagi e mama. I le ava ma le faaaloalo e tatau ai, ou te faia ai se manatu o si ou itumalo o Falealili i Sisifo, aua le Tala Faatatau Faaopoopo Nu 1 o le tupe 2019/2020. A fua i ai e le o se tupe tele, e \$23.5miliona. E amata sau faamatalaga i lenei Tala o le Tupe, o le vaega lea o lo o ave i ai le faapitoa o tatou avanoa faasikolasipi mo alo ma fanau, o aiga fo'i nei e le lava lo latou tamaoaiga pe maualalo. E momoli ai le agaga faafetai i le Malo, aua e i ai lava i latou ua oo i le tulaga lea, e gafatia e le fanau aoga, ae ua le gafatia e matua le totogiina o pili o le aoga. E momoli atu ai le agaga o le faafetai. O le tulaga i atinae tetele, atonu o le tasi lenei o sini autu a lo tatou Malo o lo o ave i ai le faamamafa, o suiga maaleale o suiga o le tau. E matauina i lou itumalo e amata atu i Saleilua, Iliili i Poutasi, Vaovai, Matautu, Tafatafa, Malaemalu, Satalo ma Sapunaoa, i le talafatai ua aia tele e le sami. E le mafai e se isi ona taofia le siisii o le tai, e le mafai foi e se tasi ona taumafai e tuutuu i lalo ia kasa oona o lo o mafua ai ona siitia le tai. Ae na o se talosaga e taatia atu i tafatafa o le Minisita o Siosiomaga, e faatatau lea mo ni fesoasoani, ina ia mafai ai ona fausia ia mea ia e tau o **wave breakers** po oogasima ia e mafai ai ona vavae le galu ina ia taumafai ai e faafoia le faafitauli. Ua amata ona toe sii i uta le tele o atinae, e pei o le atinae o lo o i Tafatafa o le Vaiula Beach Resort ma le Maota o maa Beach Resort, o le tele ia o mataaga ia o lo o ua amata ona toe me i agai i gauta, ona ua tele ina aafia i le sami. O se tasi o mataagao lo o i le matou itumalo, o le mataaga lea i Iliili, ua matua faaleagaina le auala, na o taavale four uili e mafai ona faaaogaina i le taimi lenei. E tasi lea o mataaga, manatu foi o le vai lea i Togitogina e alu atu le vai lenei ona pau lea i le moana sausu. O i o lo o maua ai se tasi o

mataiai o si o matou alalafaga, o le mea lea o le igaga. Ae peitai ua faaleagaina le auala i le malosi o le sua o le tai. E talosaga atu ai mo letaligalu ina ia faapea ona taofia ai sia vaega.

O le isi vaega e fia oo i ai sau faamatalaga. E momoli le faafetai i le Malo e tusa ai ma se tasi o poloketi, o lea e faaigoa i lalo o le Matagaluega o le Ofisa o Numera Faamauina. O le poloketi leni e faatatau i le faitau aofai o atinae tau faatoaga, faigafaiva ma pisinisi, po o lona faapapalagiina o le **Household Income Expenditure Survey**, e aoga tele leni mo le tatou tamaoiga. E fua ai po o le a le tele o le tamaoiga o lea aiga i totonu o nuu ma afioaga. E momoli ai le faafetai tele i le Malo e tusa ai mo le fesoasoani mo leni atinae.

Ona oo mai lea o sau faamatalaga i le Matagaluega o Galuega, lau Afioga i le Minisita, e avea ai au e fai ma sui o le matou falelua o Saleilua ma Poutasi e momoli atu ai le agaga o le faafetai i lau Afioga i le Palemia faapea foi le Kapeneta, e tusa ai ma le faataina o le auala e agai i le faleaoga i si o matou itumalo. E ui o le faleaoga e tu i le aualagalue, ao lea ua maea ona faataina, ua uma foi ona umusaina. E 600 mita o leni auala, ae talosaga atu pea e pei ona taatia atu le talosaga i le Afioga i le Minsita mo le faaauauina o le tatou aualagalue, o lo o tele lava aiga o si o matou nuu o lo o nonofo ai, i le alu i gauta i le auala i Saleilua. E amata atu foi e le i faataina lava le alu i totonu o le auala, le Afioga i le Minisita ma le Pulega o Felauaiga, se i faata e ae i le vaiaso fou a tatou aoga.

O le tulaga i aualagalue ua uma ona avatu le talosaga i le Afioga i le Minisita o le a le toe oo i ai se faamatalaga. O le isi talosaga, o le auala foi lea e alu agai i tai i le aai, o lea sa ou talosagaina le auala leni i Vaovai, i le pito mai i le tuaoi ma Poutasi, ua matua faaleagaina i le taimi leni i tumuga. Ae talosagaina ma le agaga vaivai sina fesoasoani se i tau lau ese ai maa ua punitia ai le auala i le taimi leni, ona o le mamafa o timuga.

Lau Afioga i le Minisita o le tatou vaalele o le Samoa Airways, e momoli atu le agaga o le faafetai, faafetai mo le auauanaga a lo tatou vaalele. E pau lava le talosaga a lou sui usufono, o tatou pepa faatumu i le taunuu mai. E taunuu mai le vaalele e leai ni tatou pepa i luga o le vaalele e faatumu, ona toe alu lea o le isi taimi o le mamalu o le atunuu e toe faatumu ai. Atonu e lena o au le isi tagata na lavea i le mea lea, e toatele nisi e lavevea ai. Ae talosaga atu i le tatou Faalapotopotoga o Tagata Tafafao maimoa mai fafo, Ofisa o Femalagaaiga faapea foi le tatou vaalele, ia taumafai e tuu a tatou pepa ia i luga o le vaalele, e faafaigofie ai ma faavave ai le auauanaga i le tatou malaevaalele. A o le auauanaga ma le feoaiga, ua lelei atoatoa.

Avea foi leni avanoa e avatu ai le faafetai i se tasi o Ekalesia. O le Ekalesia Papatiso, o le **Baptist church**, mo le fesoasoani na avatu i si

o matou itumalo, e auala atu i nofoa ma laulau e auala atu i aoga tulagalua. O aoga tulagalua i Tafatafa, o le aoga tulagalua i Sapunaoa, o le aoga tulagalua o le Papatiso i Poutasi, faapea foi i le aoga tulagalua i Saleilua. Ua tele lea fesoasoani aua alo ma fanau, ona o le utiuti o le faaso ma le seleni.

Lau Afioga i le Minisita o le Soifua Maloloina, atonu e tele tala ma faamatalaga e faatatau i le agaga o le faafetai. Faafetai mo le auaunaga, e ui lava ina afatia si o tatou atunuu i le faamai o le misela, ae talitonu le manatu, o lea sa o tatou loto tetele ma o tatou tutufaatasi ua mafai ai ona foia lenei faafitauli, ia avea ia Samoa ma se atunuu saogalemu. E momoli atu ai le agaga faafetai i so o se matata ma so o se vaega sa mafai ona fesoasoani i lenei auaunaga. E le gata i Matagaluega ma Faalapotopotoga a le Malo, Faalapotopotoga Tumaoti, o le au faipisinisi, o i latou malaga mai fafo, o tatou Malo o lo o fesoasoani mai, faafetai faafetai lava mo la outou fesoasoani.

Ona faamuli lea o sau faamatalaga, e faatatau i le Matagaluega o Faatoaga, e momoli ai le agaga o le faafetai tele i le Afioga i le Minisita, e tusa ma le tele o poloketi o lo o faagasolo, le poloketi o le talo, o fualaaui aina, poloketi o le popo ma le koko. Ae le gata i lea e momoli le faafetai tele i se tasi o faalapotopotoga, e faaigoa o le Samoa Cocoa Industry Association po o le SCIA i lalo o le faamalu o le Chamber. Mo le poloketi o le koko, ua toe faaolaolaina ai le tatou atinae o le koko, o lea ua manaia ua tele ma anoanoai ua mafi ona toto i lenei vaitau. E avatu ai le lagolago a lenei itumalo i le tatou poloketi lea i Atele, atonu o le a tele se fesoasoani. Aua o lau tilotilo i ai, tasi lea poloketi i lou iloa, o le a faatusatusa i nisi o poloketi a isi atunuu e pei o le faaitaiga, o Niu Sila i Aukilani o le **One Tree Hill**, e tasi lena poloketi, e o atu tagata e atoa le aso po o le lua aso o tafafao ai. E maua ai tupe mo tagata e le gata i lea ae o lo o maua ai foi ma galuega.

Ona oo mai lea o se faamatalaga i si o matou itumalo, le paia i alalagafa ma le nofo i tulafale tauagaeseese ia Falealili malo tapuai, le aufaitatalo malo tapuai, aua le alofaiva a lau tamafanau i le faalagamaea i lenei vaitau. O sa matou tala lea, ia manuia lau Afioga i le Fofoga Fetalai, manuia le Fono i lenei afiafi, soifua.

SUI FOFOGA FETALAI: O le lauga faa-Falealili, malo le saunao, o lea ua faalogologo le itumalo, malo tapena i le faatinoina o lou tiute. Tulai mai le sui mamalu o Faasaleleaga Nu.1 i Sisifo.

Afioga Hon GATOLOAIFAANA AMATAGA ALESANA-GIDLOW (Faasaleleaga Nu.1 i Sisifo): E muamua ona ou momoli atu le faafetai tele i lau Afioga i le Fofoga Fetalai mo le avanoa o le

matou itumalo. E muamua ona ou faatalofa atu ona o lea ua o tatou savalia foi le tausaga fou. E ao ona avatu moomooga alofa o lenei tausaga, lau Afioga i le Palemia ma le Sui Palemia ma le Kapeneta aemaise foi Minisita lagolago. Afifio atu foi i o, Taitaifono o Komiti taitasi faa-Palemene, aemaise le mamalu o le Palemene o lo o sasao nei. Faatalofa atu manuia tele lava lenei tausaga fou. Faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo. O outou lava o lo o vae ma lima i ai galuega a lo tatou Malo ma faamoemoe atu aua le atinaeina o si o tatou atunuu. Faapea lau afioga i le Failautusia le Palemene ma le mamalu o le afaigaluega. Malo le galulue i lenei tausaga ua tuanai atu, ae tatou punouai aua foi nisi mea lelei mo lenei tausaga fou.

Lau Afioga i le Fofoga Fetalai, e fia faapitoa sau faatalofa i tatou paaga mai atunuu mamao. Ona ou te lagona, e tele lo latou sao mo le atinaeina o lo tatou atunuu. Ua tatou molimauina i le faamai o le misela lea sa o tatou faafeagai ai. Ana le seanoa le tatou tapa atu ma tali mai o a tatou paaga ia mai atunuu i fafo. Ou te lagona e sili atu le afaina o a tatou tagatanuu aemaise o nai fanau iti na i lo le mea lea na o tatou faamauiina. O le mea lea e le faaitiitia ma e fia faaleo ma faamauiina le agaga faafetai i tatou paaga mai fafo. O lea foi e matau atu i le Tala o le tupe, o lo o i ai foi isi meaalofa mai le World Bank le Faletupe o le vaifafo, e \$8.8miliona o nisi o fuafuaga alualu mamao ua uma ona faataatia e le tatou Malo ma lea foi Faletupe o le Lalolagi. Ae lau Afioga i le Fofoga Fetalai, a o le i oo sau faamatalaga i le tatou tupe faaopoopo, ua ou nofo ma ou manatunatu ma maofa lava le mafaufau. Pe a mafaufau atu i o tatou tuua sa o latou asa le gasu ma tau taua, ina ia tulai mai Samoa o se atunuu tutoatasi. O se atunuu e aliali ma tumaoti i totonu o le Pasefika ma le lalolagi atoa. O se atunuu na valoia e le tamaitai o Nafanua, sa ia faapea mai, “Tali i lagi sou Malo” Ona oo mai lea i o tatou tuua sa tusia lo tatou faavae, silasila foi, faavae Samoa i le Atua. O lea foi ua oo mai i o tatou taimi, ua faamaoti le Atua tatou te faavae i ai. O le Atua o le au Kerisiano, o le Atua o le Tolutasi Paia. Ua ala ona oo sau faamatalaga lau Afioga i le Fofoga Fetalai ma le mamalu o le tatou Palemene i lea tulaga, sa faafeagai nei Samoa ma ni mala, faamai. O lea faatoa toe oo lo tatou atunuu i se faamai e pei o le faamai ua atoa le 100 tausaga talu ai, afaina ai soifua o o tatou aiga, o matua i na foi vaitau. O lea ua toe tulai mai i lenei vaitau. O le vaiaso lea ua tuanai nei, sa tele le popolevale, atuatuvaale o lo tatou atunuu, aua e foliga foi o le vaitau a lenei e agiagi mai ai mala faale-natura. Ae ua vaavaai pea lava pea, e pei lava e i ai se aao e tulei ese, e moni e oo mai faigata ma mafatiaga, ae mafai e Samoa ona toe tulai mai, e toe alo lona Malo i le manuia e tatau ona i ai. O le talitonuga la, e mafua lea ona o lea ua i ai le faavae tatou te agai i ai, tatou te maua ai

le lototele, ma tatou maua ai le tofa mamao, silsila mamao e faafeagai ai ma luitau eseese tatou te faafeagai ai i lea taimi ma lea taimi. O le mea lea e fia oo lava sau faamatalaga i le tofa mamao ma le silasila mamao a o tatou tuua seia oo mai nei i o tatou taitai, seia oo mai lava i nei vaitau. E avatu ai le agaga faafetai tele, e le mafai ona faaitiitia le faafetai i le aufaitatalo, po o le a foi le tele o a tatou galuega ma tatou fuafuaga. O lea ua taatia le tatou faamoemoe o le Atua o lo tatou malosiaga. O le aufaitatalo o le isi a tatou aupega malosi lena, o lo o mafai ai ona maua le atamai, maua le tomai, le malosi e faatino ai galuega o lo o taumafai o tatou taitai aua le atinaeina o lo tatou Malo. O le mea lea lau Afioga i le Fofoga Fetalai, e le faaitiitia le agaga faafetai, faafetai i le faatofalaiga a o tatou taitai, o tuua ua fai i lagi le folauga, mai lava i le amataga seia oo mai i lenei vaitau, malo le tofa, malo le tumau i le Atua, o lea ua tatou aeae ai nei i lenei vaitau. Lau Afioga i le Fofoga Fetalai, o le agaga faafetai lava, faafetai lau Afioga i le Minisita, Ofisa Sili o Pulega o le Matagaluega ma le Matagaluega, i le lufilufiina o lenei foi tupe faaopoopo. E moni e itiiti a tatou seleni, ae o lea ua manaia le faasoasoa mai, ave foi le faamuamua i mea e tataua ona ave i ai le faamuamua. Faafetai tele lava, e le i leva ona uma atu le taaloga lea o le pasefika, ao lea ua aliali mai, manino mai nisi o tupe na maua mai ai, po o ni faasiliga foi o lea ua mafai ona tatou faaaogaina, i le Tala o le tupe faaopoopo ua tatou i ai nei. E momoli atu ai le agaga faafetai i le silasila totoa i auala e mafai ona faasao mai ai a tatou seleni, aua o si o tatou atunuu lava e tagi lava i limamea o lo o tatou taumafai i ai. E moni ua tele upu lau Afioga i le Fofoga Fetalai e momoli atu ai le agaga faafetai aua le faafeagai ai o lo tatou atunuu i le mai lea o le misela ma taumafai ina ia foia. Ae ao pea ona faaleo se leo mai le itumalo o Faasaleleaga Nu.1 i Sisifo, lau Afioga i le Palemia le Sui Palemia ma le Kapeneta aemaise lau Afioga i le tamaitai Minisita o le Soifua Maloloina. Aemaise ai foi le Ofisa Sili o le Pulega o le Matagaluega, malo lava le tau, e le faigofie le galuega. O la outou galuega ua faafeagai ai ma le soifua o Samoa. E leai se isi e mafai ona faaatoatoaina, ae malo le onosai, malo le galulue. E fia faaleoina ai foi se agaga faafetai e pei ona taua foi i le vaiaso ua tuanai ma si agiagi lea na sau, e moni lava e itiiti pe lua ni nai aso, ae i ai lava nai afaina na molimauina. O matou ia i Savaii, e tele lava pou moli na o i lalo ma pe soo ai nai a matou power ma mea faapena. A o le mea e avatu ai le agaga faafetai, faafetai i le auaunaga, auaunaga uma lava o lo o tulai mai pe a oo i taimi o Faalavelave Tutupu Faafuasei faapea. E taua foi le Ofisa o Leoleo latou te faatoafilemuina le atunuu i tulaga e tulai mai aua e a isi lava o la e vevesi i se faafitauli ae a isi lava o lo o vaavaai po o fea le mea e maua mai ai sina a latou mea mama. Ae faafetai o lo o i ai pea le

malu o le Malo e taofiofia amioga paaa faapea, aemaise foi la o le tulaga lea o le vaega o le eletise po o le EPC. E faigata la outou galuega ona o taimi o afa ma matagi ma timuga ae tagisa pea lo tatou atunuu ina ia maua pea le auunaga lea e masani ona maua i aso toafilemu. Ua maitauina tou te le o foi, e ui ina toaitiiti le aufaigaluega, ae o lo o taumafai pea e faatino lea auunaga. Malo faafetai i lau Afioga i le Minisita le tagai totoa i lea tulaga. E faapea foi le Pulega o le Suavai ina ia maua pea le vaitaumafa e le tatou atunuu, le vaitaumafa saogalemu.

Na taua le Ofisa o Vaa, e moni ta te le i mafai ona sao mai i le Aso Sa ma auai i le fonotaga ananafi ona o le pisi o vaa, ae se i tou tagai foi i le tele o taavale, le backlog na i ai ona o aso e lua lea na faaletonu ai malaga, ua ou matuai ofo lava ina ua sau ananafi ua toe masuiga malie ma ua toe foi femalagaaiga i le va o Savaii ma Upolu i le mea e masani ai. Malo lava le galulue, faafetai taupati i galuega lelei ma le galulue le faalogologotiga, ae faia le galuega i le mea e mafai ona fai.

Ua ou vaavaai atu ma le agaga faafetai i lau Afioga i le Minisita o Tupe, o le isi vaega o le seleni lea ua ou vaavaai o le a alu faaaogaina, o le faatinoga lea o se apitaga mo le Ofisa o Faamasinoga. Faafetai i lau Afioga i le Minisita i lou tulituliloaina o ia vaega i le tatou taulaga i Savaii, aua a leai faatinoga ia ina ia i ai uma Matagaluega ia i totonu o le tatou taulaga, e leai se vave e atoatoa ai le tulai mai o le taulaga i Savaii i le mea e tatau ona i ai pei o le tatou taulaga i Upolu i Apia nei. O le mea lea e avatu ai le agaga faafetai e moni lava ina utiuti le seleni, ae o lea lava o lo o taumafai e faatino galuega aua le atiaeina o Savaii latou ia aua ai ne i faagaloina si o matou motu. O lea ou te iloa o lo o i ai foi le faamoemoe mo le Matagaluega o Aoga, ina ia fausia foi so latou apitaga ia faafaigofie ai ona fai fesootaiga nei a le Matagaluega o Aoga i Savaii ma le Matagaluega i nei i Upolu, ma o se mea talafeagai. Na pau lava le tatalo ma le fautuaga ina ia vave ona faatino lea faamoemoe ina ia mafai ai ona faafaigofieina galuega a i latou o lo o galulue i Savaii.

O le isi vaega ou te lagona e ao lava ona i ai se ofisa i totonu o Salelologa lau Afioga i le Palemia, o le Minisita o Leoleo, e tatau lava ona i ai se Ofisa o Leoleo i totonu o Salelologa, aua o lea a fai ma taulaga e tepa tulaui i ai galuega uma, e ao foi ona saogalemu ma vaavaaia faalelei tulaga o le tatou taulaga, e leai lava nisi o i ai le matafaioi lea na o le tatou Matagaluega o Leoleo. E avatu ai foi se talosaga ina ia faapea ona tagatagai i ai i se taimi ma mafai ona faatino lea faamoemoe.

Ou te faafetaia foi lava ua maitauina ua faaleleia nisi vaega o le matou auala tele i Savaii, ae pau lava le mea, na o nai fonofono foi ia e fai ai, e maintain ai i lea taimi ma lea taimi, ae ou te lagona o auala

ia, ua au i le 40 tausaga pe a talu ona fausia auala ia. O se taimi umi tele, a o la e lava e feoloolo lava. Ae ua oo foi i le taimi e tatau ai ona toe saeni i luga ae toe fai faalelei auala o Savaii. Ia taatia atu o lo o i ina le utu faimea e mafai ona oo i ai le faasoa, aua o le isi foi lagona lea ou te manatua pei sa ou taua foi i se isi au lauga, pe le i oo i le taimi e tatala atu ai le matou motu, fai se auala e alu atu i Salelologa e tau i Asau, tipi atu ai i ina ona le toe lua itula lea, ae pei na o le tasi lava le itula e tuli atu ai le vaa o le Afioga i le Minisita ia Lopaoo ma oo atu ai i lona itumalo.

Ia, o se faamanatu faamolemole. O se matou auala sima lea ou te lagona pei sa i ai se tala o la ua amata fuafuaga mo le matou auala sima lea i le tuaoi o Lalomalava ma Sapapalii. Ia e le tau faamatalaina le tele foi o le aoga o lea auala, ma aafiaga e oo mai pei foi o le mea lea na tea atu nei i si tamai agiagi lea na sau, ia na taofi foi le feoaiga a ambulance ma taavale i le va lea. O le mea la lea e toe tuitui atu pea ma tuualalo atu i se taimi, masalo ai a uma loa o i le Maliolio, talii mai loa i le matou ala sima lea e i Sapapalii.

SUI FOFOGA FETALAI: Ou te faamalulu atu i le sui usufono o lo o saunoa se i tuu atu le avanoa e tulai mai ai le Afioga i le Minisita mo Galuega a le Malo. Saunoa lau Afioga i le Minisita.

Susuga Hon Papaliitele Niko Lee Hang: Faafetai mo le avanoa. O lea ua saunoa tonu lava le sui usufono mamalu i le alasima lea i Sapapalii ma o lea foi ua toe tali mai le Afioga i le sui usufono. O le polokalame lena, a maea loa le Maliolio ona oo mai loa lea i le alasima lena e i Sapapalii ona faatino loa lea o le tou galuega lea pei ona saunoa mai i ai. Faafetai.

SUI FOFOGA FETALAI: Faafetai. Ia faaauau pea le saunoaga a le sui usufono mamalu.

Afioga Hon GATOLOAIFAANA AMATAGA ALESANA GIDLOW: Faafetai tele lau Afioga i le Minisita. Fai mai le upu foi lea, a e tuitui lava e oo ina tatala mai le faitotoa. O lea la e toe tuitui atu ai foi lau Afioga. Na amata mai lava lenei Paeaiga o ou tuitui i se auala o Lalomalava ma le matou itumalo. Faafetai ua o atu le asiasiga, o lea ua taatia fuafuaga. Ae pei e vaai atu lava, e tasi lava si auala lea o le a faamanuiaina ai Faasaleleaga Nu.1 i Sisifo. Ae a faapea lava e i ai se isi avanoa, pe leai lava sina isi tamai auala e toe faaopoopo atu pe a tusa ai ma lou finagalo. Ia o mea o fautuaga ma tuualalo ma aisiga.

Lau Afioga i le Minisita mo Pisinisi ma Alamanuia, se malo lava faafetai tele mo le tatou vaalele. E ese le mitamita o le agaga pe a lele

lava le tagata ia i si ana ia meatotino. Ae pau lava si tuualalo lau Afioga, pe le i oo ea i se taimi e fai ai mea foi nei o frequent flyers lea na tau saunoa mai ai, ae leaga la o le vaa lea e alu agai i ai le sui usufono mamalu lea ma te sosoo, a o lea ou te fai atu au ia i le tatou vaalele, o mea o auala foi ia e faatosina ai tagata ina ia saga faaaoga pea lo tatou sa, le tatou vaalele.

Lau Afioga i le Fofoga Fetalai, ia e le tele lava ni manaoga o le matou itumalo, na o le faaleo atu o le agaga faafetai, o lo o faafogafoga mai lo matou itumalo. Faafetai tapuai mai, ia manuia le Fonotaga a le tatou Palemene. Soifua.

SUI FOFOGA FETALAI: Faamalo saunoa i lau Afioga i le sui usufono mamalu mai Faasaleleaga Nu.1 i Sisifo o la e faafogafoga mai lou itumalo, ua faafogafoga foi le Maota e te le o faapito manu ia tasi. E te saunoa faafetai aua le galuega i le tulaga aoaotetele. O le mea lea, ia malo tapena, malo le saunoa, o se saunoaga matagofie i lenei afiafi. Faafetai tele.

Ae tuu atu le avanoa o lo o maua pea le avanoa mo se isi sui usufono e fia saunoa, o le taimi lelei lenei o lo o fia faafogafoga o tatou itumalo faapea foi lea itu o le malu i a outou Afioga i Minisita Lagolago. Saunoa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ona ua silia i le lua vaiaso talu ona tuuina atu le Tala o le Tupe, ma e tele foi galuega e fia faatino e le Kapeneta, e le o se mea matagofie le faatalitali o matou, ae lelei ona tofi mai e lau Afioga le sui usufono ina ia faagasolo ai le tatou galuega.

SUI FOFOGA FETALAI: E le faaataata a lafoga le saunoaga a le Palemia, ma o tulaga moni lava lea e tataua ona faataoto ai le tatou fonotaga, o lo o fia faagaoioi galuega a le Malo i tulaga o le tatou Tala o le Tupe e fia vave ona pasi, ia e faapena. Ua leva ona tuuina atu le tatou Tala o le Tupe, o le mea lea, o lea ua tulai mai le sui usufono mamalu mo Aana Alofi Nu.2. Saunoa.

Tofa ILI SETEFANO TAATEO TAFILI (Aana Alofi Nu.2): Faafetai lava i lau Afioga i le Fofoga Fetalai, ua maua foi so matou avanoa e fai ai so matou sao i le fonotaga ma le fonousu a Samoa, a o le fonotaga tau amata foi o lenei tausaga 2020.

E muamua ona ofo alofa ma faatalofa atu i le faafogafoga tapuai a Samoa i le afio o lau Afioga i Le Ao o le Malo ma lau masiofo, le Afioga i le Sui o le Fono a Sui Tofia ma lau masiofo, ae tainane le loaloa o Samoa i ona tulaga faalupe i paia faaleatunuu, paia

faatallalelei. Afio foi lau Afioga i le Sui Faamasino Sili ma le Vasega o Famasinoga.

O le aso ua tapisa lau Palemene e tau sufi le tofa aua le Tala Faatatau Faaopopo Muamua o le Tupe 2019/2020. Ona ou manatu lea o le a le oo i ai sa matou faamatalaga, i se taimi o mulimuli ane ona faapena lea ona fai i ai se lagona. Ae o lenei itula e tulai ma le agaga faaaloalo e ofo alofa ma faafeiloai atu i lau Afioga i le Palemia, afio foi lau Afioga i le Sui Palemia, le nofo a Minisita o le Kapeneta, ae tainane foi le lagolago a Minisita Lagolago i lenei foi fono muamua a le tatou Palemene.

E faatalofa atu foi i lenei itu o lenei Maota i le afifio o Taitaifono o Komiti Faa-Palemene faapea foi sui usufono mamalu. E le faagaloina foi le faafogafoga tapuai foi a Ofisa Sili o Pulega ua tatou fono faatasi i lenei foi aso. O outou lava o le malosi faatino o le Malo e pei ona i ai, ua na ona fuafua lava, a o outou e faatinoina.

E ofo alofa atu foi i le Afioga i le Failautusi o le Fono ae tainane foi alii ma tamaitai o le Fono Aoaofaitulafono, o vae ma lima e tua i ai le Palemene nei. Ua tuanai atu atuava ma atuvasa, sa taumate foi i le ete le folauga i tausaga ua tuanai atu, ae peitai ane, o lea ua tatou tepa ma vaai i le matagofie o lenei foi taeao, a o lenei foi aso o le fono muamua a le Palemene a Samoa, o lea ua tatou futifuti a manuula. E ui lava ina poia Samoa ma afea Samoa i nisi o faafitauli e pei ona tulai mai i le faaiuga ma le tau faaiuga o le tausaga ua tuanai atu, ae tatou te le failoto, aua o le upu a ia tatou te masani ai, “E momoe a ma manu e le fati, a o faafitauli lava ia o le olaga e faapena ona poia ai i tatou.” Na pau o lea ia tatou ave le viiga i le Atua ua taulu taulu a o lea ua tali mai.

E faapito augafa se matou faamatalaga i lau Afioga i le Palemia, mau pea le toovae i le taimi na afatia ai Samoa ma ona tagata i le tetele o faafitauli. Ae le gata i lea, e le faagaloina le agalelei o tatou uso a atunuu mai fafo i le auala sa o latou faatino ai le agalelei ia Samoa ma ona tagatanuu, ua tatou vaaia le taupati mai o Malo mai fafo, ua oo lava i Malo Afaatasi, ua latou le faagalo Samoa ma faigata na tulai mai. O le Atua e Pulepuletelete e faapena ona toe tau atu le agalelei o nei atunuu i le tamaoaiga na faaalu ona o le agalelei ia Samoa. E faafetai atu foi i aiga o tama fanau a Samoa o lo o faapena ona ee ma papaaao i atunuu mamao sa tuu mai lo latou tauau ma faaali foi lo latou agaga faanoanoa ona o le pagatia sa oo i ai Samoa, faaali lo outou maau e ala i so o se fesoasoani sa faapena ona outou aao i ai a o feagai si o tatou atunuu ma ona faigata.

I le faagasologa mai o le tausaga ua tuanai atu, o le agaga lava ia o le faafetai, e le mafai ona matou talatalapipi pe faafetai taitasi i Minisita ma galuega sa faatino. Pau lava o lea ia faafetai tele lava i galuega atiae aua Samoa ma ona tagata. E pei e faapito se matou

faamatalaga i le Minisita o Galuega, aua o lau Afioga lava i le Minisita o lo o faapena ona fau ma soloi ai manaoga e le ma faamalieina o le atunuu, tau faasoaso ma tau faamalie, ae taumafai lava i le mafai e gata ai le mafai. Faafetai tele i lau Afioga i le Minisita mo atinae ma galuega tetele a le Malo.

Faafetai foi i le Minisita o le Soifua Maloloina i taimi foi a o feagai Samoa ma lenei mala, sa faapena ona e tu i matagiolo, e le gata i lau Afioga i le Minisita ae faapea foi i le Matagaluega mo le lagolago aua sa tele foi faitioga sa tuu mai a o le lalolagi lena o lea tatou te ola ai, po o le a lava le lelei tatou te i ai, ae le mafai lava ona vavaea le tagata e faitio.

Faafetai foi mo le galuega matagofie, ua aoga foi lea ua e afio atu ai i Leulumoega, ua e tagai foi i le tulaga o lo o i ai le falemai i Leulumoega i le tele foi o nisi galuega sa faaleleia i le vaitau lea a o pipisi le faamai ua tuanai atu.

Lau Afioga i le Minisita mo Pisinisi ma Alamanuia, o lena ua faaleo atu lagona o nisi foi o sui usufono e fesilisili mai foi nisi po o afea e toe maua ai se isi vaa e lua ai tatou vaa, o le tali lava ia, atonu o se taimi o lenei tausaga pe a lava le faasoana ona faapena lea ona i ai le fuafuaga a le Malo.

Ia, o lena le faamatalaga, ae na o ni manaoga e tuu atu i le tatou Malo e ala atu i lau Afioga i le Palemia faapea le nofo a Minisita. Lau Afioga i le Minisita mo Galuega, masalo foi e le fou i lau Afioga, na ona toe faamanatu atu lava le auala o si ou nuu o Nofolaii, o lena ua taoto atu le talosaga pei ona i ai. A o le taligalu o le pitonuu lea o Vaialua, o lea ua faatalitali atonu e oo atu le faaleleiga o le auala e pei ona fuafua i le second phase ona faatino ai lea ma le taligalu lea o Vaialua e pei ona i ai le talosaga na avatu. Ae o le talosaga mo le auala o si ou nuu o Leulumoega, o le pito i lalo ua faaletonu lava le auala, e le tau faamatala atua, maua foi se avanoa o lau Afioga e asiasi atu i ai ia ua tulaga faaletonu lava. Alofa foi i nai aiga o lo o faapena ona alaala ma papaaao ai i na vaega o le nuu i le afaina o latou taavale ona o le faaletonu o le auala.

O le isi vaega e tatalo atu i lau Afioga i le Minisita, e manatu foi o lo o faafogafoga mai le Matagaluega e fitiotonu i ai le talosaga, o le auala lea o lea e ui atu e agai i tua i Lefaga ma Faleaseela lea e oso atu i le main road i le alu lea i Faleolo, o le pito i uta sa talosaga lava ni nai moli foi nei mo le po e aoga mo le mamalu fegasoloai. Aua o i i le vaipanoa lea, e tele foi nisi o faalavelave tau taavale o lo o tulai mai ai, ae leai ma se moli lava e tasi, masalo pe tolu loa maila le agai atu i uta pogisa atoa lava e tau i uta i Aleisa. O le ala lea o le tatalo atu, ua leva ona taoto le talosaga i le Ofisa o le Malosiaga Faeletise ae leai lava se mea ua faatinoina i la lea vaega.

Faafetai o lea ua vili le vai i gauta o le matou nuu o Nofolii, o se faamamaavega a o se faaola totoga foi lea i nisi foi o lenei foi itumalo o lo o alaala ma papaaao i le nuu a uta, ae le gata foi i lea, o le isi lea fesoasoani tele aua o le vai lea e fesoatai mai lava i tai i le aualatele i le main line foi lea a le Malo o lo o faapena ona faasopolia ai le itu i sisifo o le atunuu.

E faamaea atu ai lea ma se matou faamatalaga, o le agai atu lea i Faleolo i le auala fou, e vaaia pea le tele o aso o se taimata foi le tulaga lea o lapisi o lo o tutu i tafatafa o le auala vaeatu lava le paia o le Maota. O tulaga e pei ona i ai, ua na o le o atu lava o tagata ma lafoai le lapisi i luga o fata lapisi ona salalau lava lea. A o atu foi la le au ao lapisi e o atu ao lava na o lapisi la e i luga o fata, ae le faamamaina lalo. Ae matou te manatu o le vaaiga muamua a lea a tagata tafafao maimoa mai fafo pe a agai mai le malae vaalele agai i Apia nei, o le tulaga lea tau lapisi o lo o faapena ona mataga ai le talafatai. Se i silasila ae e le aoaia, ae na ona fesoasoani atu i la outou galuega o lo o faapena ona faatino.

Ae le i faamaeaina sa matou tala, e le faagaloina Afia i si ona vao i le tapuaiga a si ou itumalo pele o Aana Alofi Nu.2, le tapuaiga a le falelua ia Leulumoega ma Nofolii. Faafetai i le aufaitatalo o lo o faapena ona tatalo ma tapuaia o matou faiva a o faapea ona matou faafalelemalu ai i totonu o le Maota o Samoa aua sailiga lumanai mo o si o tatou itumalo.

Ia lou nuu e, o Leulumoega, le paia ia Sooaemalelagi ma Alo o Tamaalelagi, le Matuanatogi ma le Faleiva o le Fale Tuiaana, ia o oe o le Tumua na tofofi e te tausia aiga e fa ma laau na faufau ae tainane Samoa aoao.

Susu foi le Alii Matua o le Aiga Sa Tanuvasa, si ou nuu o Nofolii ma le matafale e fia o le Aiga Sa Tanuvasa. Afio Taimalieitu o le Fofoga o Sa Tuala, afio le falefa o Sa Tuala, afio foi Muagututia o le Aloalii o le Tama a Sa Tuala ma le mamalu o le nofo a ituaiga i le Faleaana, tainane le Faleaana i Gagaae ma ona tapaau, Tauti ma Malaitai. I lenei aso, o lena se sao o le tou itumalo e tusa ai o faigamea a Samoa.

A o lenei itula e ofo alofa atu i lau Afioga i le Fofoga Fetalai e tusa ai o le faatautaiga o le tatou fonousu ma le fonotoa a Samoa i lenei foi aso. Manuia le fonousu a Samoa. Faafetai.

SUI FOFOGA FETALAI: Ua faamalo saunoa i le sui usufono mamalu mai Aana Alofi Nu.2. O le upu moni lava ua logologo pualilo nai olo, o lea ua faafofoga le Maota, faafofoga atu le Aiga Kapeneta i le fanoga o le itumalo, o la foi ua faafofoga le itumalo. Malo le galue. O le mea lea, ia talia laia lupe o maunu i le faiva

manaia ma le lufilufi limalelei o le Malo i le latou faasoa aua le faaleleia o le tele o atinae a le itumalo. Malo faafetai.

E talu ai o lea ua tatou taunuu tonu i le itula o le tatou malologa masani mo le 15 minute, faamalosi le tino toe faaauau le tatou fonotaga o le afiafi nei. O le mea lea, ou te manatu o le a toe faataatia le Galuega a le Maota mo le 15 minute mo lana malologa masani. Ua maea ona tapena taavale mo le Maota sui usufono mamalu, tatou te malaga ai i le maota o Tofilau, o i ina o le a faatino ai le faamalositano ma le tatou malu afiafi. E faapea foi a outou Afioga i Ofisa Sili o Pulega o Matagaluega ma Faalapotopotoga Tumaoti, vagana ai le Palemia ua avanoa pea le potu masani ona o le tulaga o le louloua o le tau.

Ia o le faaaliga lea ma le agaga faaaloalo. Faafetai.

Na faataatiaese Galuega a le Fono Aoaofaaitulafono i le itula e 8:00 i le po ma toe faaauau i le itula e 9:01 i le po.

SUI FOFOGA FETALAI: Ou te manatu ua sao i alo le taligasua a le Maota i lenei vaega o le afiafi, ua i ai foi le talitonuga ua maua se faasiliga malosi aua le faaauauina o tiute ma faiva e pei ona atofaina mo i tatou i lenei aso.

E faataatiaese Galuega a le Fono Aoaofaaitulafono ua maea ona saunoa le sui usufono mo Aana Alofi Nu.2. O le avanoa lenei mo se isi sui usufono e fia saunoa.

E maitau atu o lea ua sauni mai le sui usufono mo Vaimauga Sasae. Le sui usufono mamalu, saunoa e tusa ma lou tulai mai.

Afioga SULAMANAIA FETAIAI TAUILILI TUIVASA (Vaimauga Sasae): Faafetai mo le avanoa i lau Afioga i le Fofoga Fetalai. E tatalo atu i lenei itula o le po, o lea ua ta tonu lava le taimi lenei e fai ai se lauga a le Vaimauga Sasae, ua maea foi faigalotu a lou itumalo ma le atunuu o la e ua ki uma laau ma TV se i silasila mai le atunuu i le lauga a le Vaimauga.

Ae ou te le i faia la se sao o lenei itumalo, e muamua ona momoli le agaga faafetai i lau Afioga i le Fofoga Fetalai, afai foi o faafofoga mai si o tatou tama le Afioga i le Fofoga Fetalai ia Leupepe, ia agalelei atu le Atua. E le selu foi i lau Afioga i le Fofoga Fetalai, amuia oe, o le itula analeila sa tatou mafuta ai i lalo, a o lea foi ua maitau i lenei itula ua siitia lou tulaga, ua e afio mai i lou nofoa vaevaeloloa. Faafetai. Ae talofa e i nai Minisita Lagolago ia Leala, o la e saofafai i tua, pe leai lava le Minisita i luma, e saofafai lava i tua.

Lau Afioga i le Fofoga Fetalai, ae le i faia se sao e muamua ona faatalofa ma ofo alofa atu.

Tofa Lealailepule Rimoni Aiafi (Faleata i Sisifo): Lau Afioga i le Fofoga Fetalai...

SUI FOFOGA FETALAI: Malie le sui usufono o lo o saunoa se i tuu atu le avanoa i le sui usufono mo Faleata.

Tofa Lealailepule Rimoni Aiafi: A o le i saunoa ma fetalai Tuisamau, Samau, toe lua ni au Paeaiga e oo mai i le mea lea ou te i ai. E le i taitai. O i lava ia i le Maota Fono, e uma loa le Fofoga Fetalai, o le Sui Fofoga Fetalai, o le la Maota lea e faigaluega ai. A e oo atu i lou ofisa e le o i ai le Minisita, ta te faafesagai. Ioe. A malaga le Minisita i fafo, ma te o faatasi ma toe omai foi mai, ae aua e te loto leaga. Onosai.

SUI FOFOGA FETALAI: Ia o lea ua manino. Tulai mai le sui usufono mo Vaimauga Sasae e faaauau le saunoaga.

Afioga SULAMANAIA FETAIAI TAUILIILI TUIVASA: A o le i faia se sao o lenei itumalo e muamua ona ofo alofa atu ma faatalofa atu i le paia o lenei Maota i le afio o lau Afioga i le Palemia po o le Taitai o le Maota. E faapea foi ona ofo alofa ma faatalofa atu lenei itumalo i lau Afioga i le Sui Palemia e ui e le o auai mai aemaise o le Kapeneta ma le mamalu i nai Minisita Lagolago. E faatalofa foi i lau Afioga i le Fofoga Fetalai ma lenei foi itu o le Maota i Afioga i alii ma tamaitai sui usufono mamalu o le Palemene o Samoa. Faamalo le tautua, faamalo le galulue, faamalo le alolofa i si o tatou atunuu, o lea e maitau atu o le amataga lenei o lenei tausaga o le Paeaiga mulimulio tatou tausaga mulimuli o lenei paeaiga. Ia o lo o manuia lava mea uma e ala i le agalelei mai o le Atua i lenei paeaiga. Amuia foi lenei atunuu o lo o i ai ni taitai alolofa i le atunuu, e ala i le taitaiga a lau afioga i le Palemia ma lenei Vaega Faaupufai toatele.

E le mafai foi ona tuua i lalo le tapuaiga a Ofisa Sili o Pulega o Matagaluega ma Faalapotopotoga Tumaoti a le Malo i lo outou sao. E ui lava i lenei Maota, ae o outou lava e lima ma vae i ai le Maota Fono, tautuaina o si o tatou atunuu. Malo le galulue, faamalo foi le tauatai.

Faatalofa atu foi i le afioga i le Failautusi o le Fono Aoao Faitulafono, aemaise o lenei Matagaluega i le tautuaina o le Palemene, o lenei lava e matau atu o lea e po ma ao o lo o tautua pea a outou afioga ae o outou o tupu o le atunuu lenei fonousu a le

atunuu faamalo le galulue. E le mafai ona faagaloina le tapuaiga a le Ao Mamalu o le Malo, aemaise le masiofo le afioga i le Maposua, faapea foi afioga i le Fono a Sui Tofia, ia aemaise o le Sui Faamasino Sili, Peresetene o Faamasinoga o Fanua ma Suafa, ia aemaise foi i Alii ma Tamaitai Faamasino, ma le vasega o le Ofisa o Faamasinoga. Malo le galulue foi i la outou pitolaau, e le faigofie foi lo outou valaauina.

Ia faatalofa foi ma ofo alofa atu i sui o le Malo i totonu o le tatou Maota nei, sui faasalalau o TV, o nusipepa, o lo o fai foi looutou sao o le faasalalau o lenei Fono ma tuuina atu foi faamaumauga ma molimauina ia le fonotaga a le atunuu.

Ia ae e le mafai lava ona tuua foi le tapuaiga a le aufaigaluega Paia a le Atua i so o se fata faitaulaga, o outou o lo o manuia ai le atunuu nei, e ala i le tulivae i le Atua, anapogi, tatalo ia aua se manuia o Samoa, faafetai. E le o se mea faaleaoga lo outou tautiga i le Atua, e ala i le tapuaia o si o tatou atunuu.

E faamuliai lava se tatou faatalofa ma ofo alofa atu i le tapuaiga paia a lou itumalo o Vaimauga Sasae, mai lava i Fusi ma Fanuatanu, o Lalotea le malae o le faautugatagi a Tumua. Ia o Niniva foi ma Punialavaa, aemaise foi o Pilioua ma Fatitolo, ia ma fale poulima, po o le paia o aiga e lua ma le nofoatula. Se faamalo tapuai faamalo tatalo. O lo o manuia ma lagona e le sui usufono le malosi, ona o la outou tapuaiga. Ia tapuai maia ma le manuia.

E le faagaloina foi o tatou tama matutua o lo o tapuaia lenei fonotaga i maota ma laoa, e le gata i Samoa nei ia ae o nai matua foi o lo o tapuai mai i atunuu e mamao. Ia tapuai maia sei fai se sao o le tatou itumalo i le tamaoaiga ia po o le Tala Faaopoopo o le Tupe ua opea nei i le Maota.

E momoli le agaga faafetai o lenei itumalo i lau afioga i le Minisita o Tupe. E matau le paeaiga ina ua tulai mai, sa vaai lava le sui usufono o lenei itumalo i lau faasoa utiuti. Le tuumamaina ma le tele o **expenses** sa e faasaoina mai e sesele ai le Tala o le Tupe. Ua a nei? Lea lava ua oo mai i lenei paeaiga o lelei lava lau faasoasoa lima lelei. Ou te faafetai atu ai i lau afioga i le Minisita ma lau Minisita Lagolago aemaise foi o le Ofisa Sili ma le Matagaluega o Tupe.

O le agaga faafetai o le lelei foi o le Minisita Lagolago, o le mea lea e lelei ai le sao o le filifiliga a lau afioga o le Minisita o Tupe, o le tamaitai ia po o le feagaiga na e faufautua ia te oe. So o se aiga e lelei lava sona tamaoaiga, o se aiga lelei, fai mai e le o tama. O tua la e lafi ai se tina lelei le fautua. E i ai le tamaitai lau Sui....

Susuga Mulipola Leiataua Laki: Faamalulu atu i lau afioga i le Fofoga o le Fono...

SUI FOFOGA FETALAI: Malie le sui usufono o Vaimauga Sasae sei tuu atu le avanoa i le Sui Minisita o Aiga i le Tai.

Susuga Mulipola Leiataua Laki: Faamalulu atu i le sui usufono lea na saunoa e le o se tina le sui usufono nei, afai e tuutuu i tua e le o malamalama le sui usufono lea i le faatulagana o le sui usufono lenei, ia o le feagaiga a Tumua ma Pule. Ia e tau fesoasoani atu i le sui usufono e le o se tamaitai lauulu uumi o le tama.

SUI FOFOGA FETALAI: Ia o lea le selu atu lava o le sui usufono mamalu i lau afioga, ia ae malo faafetai mo le folasaga, faaauau le saunoaga.

Afioga SULAMANAIA FETAIAI TAUILIILI TUIVASA: Sa ou faapea e fiafia le Minisita Lagolago o la e faalogologo mai lona itumalo e moi lava o ia lea e tele ai lona ai i le fautua ae ui i lea, toe aumai ia le tala a le Vaimauga ia te au.

E faatusaina le Tala o le Tupe le Tala Faaopoopo e lagolagoina e lenei itumalo. Aisea? O tatou e leai ni o tatou tamaoaiga po o ni suaau e maua mai i o tatou eleele. E tagi lava i lima e le pei o Tutuila ma isi motu ia e faapena ona sasaa mai faamanuiaga mai le Malo tele.

Ae ou te faafetai lava i le Minisita ma le Pulega ma le Ofisa Sili o le Matagaluega o Tupe, i le faasoasoina o lenei seleni ua mafai ona toe tuu mai ai lenei Tala Faaopoopo. O le tele o Matagaluega a le Malo e fia o mai uma e tuu i luga a latou tupe e faaoga mo le Matagaluega. Ia ae faafetai lava i le lima lelei o le Minisita aemaise o le Ofisa Sili ma le Pulega, e momoli atu ai le agaga faafetai.

Ia ae o le a ou muamua ona ou oo lau afioga nei tei ua poloka ai i i i lou itumalo. E matau i le taimi na ou tulai mai ai i lenei paeaiga sa tuuina atu pea le tatalo, i lona Itu o le Maota i afioga i Minisita sei silasila ane i auala o lenei itumalo. E oo mai i le taimi lenei e leai ma se mea ua faia. O lea lava e tatalo ma tuuina atu i le Atua po o le a le taimi e tali mai ai. Ua maea foi ona fai le ma asiasiga ma le Minisita o Felauaiga, po ua atoa nei le tausaga, ae o lea lava e tatalo atu i lau afioga i le Minisita sei e silasila ane i lea tulaga i le ta auala. A silasila foi i le tulaga i lenei itumalo ia ou te lagona lava le matamuli, faalogologo atu i le leitio, tatala mai ai ia auala o Savaii, ae faafefea Vaimauga Sasae o totonu o le lotoifale o Apia, e leai ma se mea ua faia. Ia o lea lava e toa lenei sui usufono pau lava le mea lea e faalogologo ai si ou itumalo, e tuuina atu ai le tatalo e le gata ua avatu faafia lenei talosaga, ae pei ua faatiga taliga foi.

Ia ae manaia ia o le saunoaga a le Palemia lea na faalogologo atu ai i le tatalaina o auala a Savaii. Sa faatusa e le tama lea sei tulou le

suafa Tapulesatele. O Tapulesatele e tau le lagona le leo pe a malele, ae o lea na faatino. O lea la na fai mai le Palemia, o le tuitui, tuitui. Ou te le faaogaina la ia le tuitui. Ae manaia la le tala mulimuli lena a le Palemia, fai mai a tuitui tuitui, ka loa i le koi. Ioe lea la ua ou fai atu ai i lau afioga i le Minisita, sei alofa maia, alofa maia i lenei itumalo ua gasea.

Susuga Hon Papaliitele Niko Lee Hang: Lau Afioga i le Fofoga Fetalai...

SUI FOFOGA FETALAI: Malie le sui usufono o saunoa sei tuu atu ia le avanoa i le Minisita o Galuega Tetele a le Malo. Lau afioga i le Minisita, saunoa.

Susuga Hon Papaliitele Niko Lee Hang: Ia e le fia faalavelaveina foi le saunoaga matagofie a lou uso lea mai Vaimauga Sasae. E sao le saunoaga masalo ua ma asiasia faalua lona auala. O lea ua alu atu i le polokalame o lea e talanoa taeao e le Kapeneta ia auala ia o le faagaioi, o la e lavea atu ai lau auala. Ae o lou toe faalavelave mai i lau lauga na, masalo o le a toe sui. Ia onosai mai e oo atu lava le faaso'a a le Malo mai ana tupe maua e faatino ai a tatou auala galue. Ia ma lou faaloalo lava.

SUI FOFOGA FETALAI: Ae e le i faaauauina le saunoaga a sui usufono mamalu mai Vaimauga Sasae, e ao ona fautuaina e le Nofoa, le gagana ma upu e faaoga. Ou te fautuaina ai, ia saunoa mamalu pea i le tulaga e ese lava le gagana faavaimauga ia, ou te iloa o oe o le ituau o le muaau, ae o le Maota lenei o le atunuu. E salani ma ufi i le faaloalo, e ala i ana upu lafo. Ae saunoa lau afioga.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, leaga o lea e faalogologo le atunuu e le o se tala a le Vaimauga. O le tala a le tama o le atunuu. A faalogologo lelei i le tatalaina o le auala a Tapulesatele, sa malele ai lava le tama o le atunuu. O lea la e pei na o le toe, ae e leo se tala a le Vaimauga.

SUI FOFOGA FETALAI: Ia na ona avatu o le fautuaga.

Afioga SULAMANAIA FETAIAI TAUILILI TUIVASA: Ae e ui o lea o le a tuitui pea i le Minisita, o la e faafofoga si ou itumalo.

O le nuu lenei o Lau'ii lau afioga i le saofaapito o tatou e i ai o tatou piitaga i si o tatou nuu lea o Lau'ii. Ia sei alofa ane i taligalu. Sa ou i ai i si o matou nuu i le vaiaso lea na tea nei. O lou aiga e pito lava i le sami, ae e te afio atu ma e agai i tua, aua foi o le nuu lenei o Lau'ii e

leai se aau e moana atoa le sami. Ia ua matuai fafati lava galu toetiiti lava oo galu i totonu o fale faamolemole. Sei e silasila ane i taligalu o si ou nuu o Laulii.

E le gata i lea ae o auala foi e o i uta i le mea sa o i ai, alo i ai mai tsunami, masalo o le nuu lea faafetai ai i le Atua ona o lou itumalo ou te faatusaina o Isaraelu. E faamanuia i ai le Atua i lenei itumalo, e le gata e o mai o, a fuafua i ai i Ofisa Sili o Matagaluega e tele lava sui e o mai i Vaimauga Sasae, atamamai tagata. E le gata i le atamamai ae o le aulelei. O le mea foi lena o le tele o tamaitai aulelei o lenei itumalo, e fia manao i ai aemaise lava ia Sui Minisita, Palemia ma le Ao o le Malo. O teine mai i afioaga ia o Vaimauga Sasae. O le mea lena ou te faamaualuga ai lava i le faamanuiaga a le Atua mo lenei itumalo.

Ae sei silasila ane lau afioga i le Minisita i le tulaga lea i le taligalu o si ou nuu o Laulii. Ia o lea ua faafogafoga atu si o tatou itumalo i le tatalo mai a le afioga i le Minisita o Felauaiga, ia o lea o le a fai o tatou auala e amata atu lava i Fagalii, Vailele ma Letogo.

O le Minisita lea o le Samoa Land, e ese le aulelei o lenei Minisita. E pei lava e sau mai i Niu Sila. O so o se tagata malaga lava e ta te vaai lava e faapena lenei Minisita pe a vaai i ai. O se faatupu manatu i le, sei silasila ane i o ta eleele sa tatalo atu lava i le amataga lenei sui usufono o lenei itumalo, ina ia mafai ona faamatuu mai i se tau lea na tatalo atu ai. E oo mai i le taimi lenei o le toatele o isi ua o atu lava talosagaina e pei lava o le \$35,000 ae faatalitali pea le talosaga a lo tatou sui usufono. Sei faamolemole sei toe silasila ane i eleele ia o si ou itumalo sa i ai i le taimi o le Esetete, o lea foi la ua toe tuuina mai i si o matou nuu se tau e talafeagai po o le \$8,000 po o le \$10,000 i le kuata eka.

Ia e tuuina atu foi le talosaga i le Minisita o Leoleo. O lea ua matau o le afioga i le Palemia, o lea ua aveese le malaevaalele mai lenei afioaga o Fagalii. A tou silasila ma matau lenei afioaga, o le afioaga lenei o Fagalii e pei o le ¼ o le eleele e nofoia e le nuu, ona e a? E ave uma ona eleele mo le atinaeina o le atunuu. O le malae tapolo, o flat a le Malo, o malaevaalele ave uma. O lea foi la ua fai fai le malaevaalele lea ua aveese, ua le mautonu si o matou nuu. Ia fai mai ia te au o le a o faamalosi i totonu e toe fai ai ni atinae ou fai atu aua, e loka uma ai tatou, loka ai ma le sui usufono. O lea la ua ou tatalo atu ai i lau afioga i le Minisita o Leoleo o lea ua matau o le a tuuina atu ai le tulaga lea i le LTA po o le tulaga i le pasiina o taavale.

Ia o le tatalo ona o le tele o lena eleele o le a tuuina atu ia i pe le mafai ona faaavanoa se isi vaega o le malaevaalele sei fai ai se malae o lenei nuu aua e leai ma se malae taalo i totonu o le aoga, aua sei silasila foi la i le mea la e toe fai ai nei le faleaoga, matuai pumoomoo lava. E le gata la i fanau aoga, ae o alo foi ma fanau a

lenei nuu e tele taleni ae e leai se malae e agai i ai. E leai se malae e oo lava i tuamaota o lenei nuu ua ave sei tulou lava i isi afakasi i lenei vaitaimi e oo mai lava i lenei taimi ua leai se mea e tua i ai ia si o matou nuu o Fagalii. O lenei le tatalo e tuu atu i le Minisita o Eleele.

Ia ou te faafetai atu i lau tama lea o Lopaoo, o le tagata lenei o se uo mamae. Ae ina ua tulai mai i le tulaga o le Minisita, e pei ua mamao lava le tulaga lea ua i ai. Ia sei alofa mai o le tulaga lea i le maketi a le tatou atunuu, o le sui usufono lenei e fai lava si ou faatoaga. Ia ta te sau la e tau faatau nai ata aufai, ua pei lava o isi tagata ua nonofo mau ai lava i le maketi, ae o matou nei ua o mai ua leai ni mea e faatau ai a matou faaeleeleaga. Sei silasila ane i lea vaega.

A silasila foi i le tulaga lea o le...

Tofa Hon Lopaoo Natanielu Mua (Minisita o Faatoaga ma Faigafaiva): Lau Afioga i le Fofoga Fetalai...

SUI FOFOGA FETALAI: Malie le sui usufono o saunoa sei tuu atu le avanoa e saunoa ai le afioga i le Minisita o Faatoaga ma Faigafaiva, saunoa.

Tofa Hon Lopaoo Natanielu Mua: Faafetai mo le avanoa, leai na ona ou fesoasoani atu i lau afioga, o le mataupu lenei e nafa ma le Minisita o Pisinisi Alamanuia ma Leipa lea e i ai le ACC i le maketi. Ae e leai se matou aia i le Pulega po o ai e tatau ona nonofo i totonu o le maketi po o ai foi e faatau a latou mea i le maketi lau afioga tei ua e lauga mai ia te au ae o lea e tatau ona ave i o lou finagalo. Faafetai ma le faaaloalo.

SUI FOFOGA FETALAI: Faafetai, o lea ua manino, saunoa lau afioga.

Afioga SULAMANAIA FETAIAI TAUILIILI TUIVASA: O le Faigafaiva, sa ma i ai ma le Sui Fofoga Fetalai i le nuu lea o Tahiti i le taimi o Tesema. O le tamaoaiga o lea atunuu i le mea lea o le vaafagota ma le ia, matautia. Ia ae matau i le tatou tamaoaiga lea i le ia, sei tulou lava, o le tagata o le tulaga o mea o ia, atu ma ia lea e faatau i le Aso Sa. Ia o le tatalo atu po o le a se silasila a lau afioga i lea tulaga i mea ia o vaa, a ua le mafaia e o tatou tagata ona fai ia vaa aumai ni isi vaa mai fafo ina ia mafaiona o e fagota mai ni ia aua lea e matuai taugata. O le aso Sa lava ia, e matua le mafai lava, a ta sau ma la ta \$50, e le gafatia i le taugata o ia. E pei la e tatalo atu, se i silasila ane i lea foi tamaoaiga o si o tatou atunuu. A fuafua o lea e lape le silasila a lo tatou Malo i le sami, a o le tele o mataai o le atunuu, masalo e tele atu le sami i lo le elelele. Pe mafai ona silasila

ifo lau Afioga, ua e tulai mai i le Minisita o Faatoaga ma Faigafaiva. Se i silasila ane i le atinaeina o le sami i le tamaoaiga o si o tatou atunuu e ala i le ia. O le atunuu lea na ma o i ai ma le Sui Fofoga Fetalai, ola, e lima lava vaa e taunuu mai, na ona sau lava o vaa ma toe alu i fafo. E tamaoaiga i le tele o ia e maua mai ai, e na o se tatalo e tuuina atu.

SUI FOFOGA FETALAI: Se i tulai mai le Afioga i le Minisita.

Tofa Hon Lopaoo Natanielu Mua: Faafetai mo le avanoa, faafetai i lau afioga mo le faamanatu, o le tulaga lea i le faiga o laisene o vaafagota ia, lea foi tatou te vaai i ai i le gugulu o le atunuu. Ua faapea o lea o le a ave uma e le Malo i Saina ae leai e le o le tulaga lena. E tatou te fai fuafua foi, o le tatou ogasami saoloto e le tetele e peio le upu moni o Samoa e pito i sili ona laititi le sami saoloto. O le mea foi lena e tataua ona fuafua i ai a tatou fuafuaga ma tatou laisene e fai. O le taimi nei e le atoa se 20 o laisene o tatou issue ina mo vaa fagota mai fafo, e fagogota i lo tatou tamaoaiga. A o le latou sao i le tatou export, ia e ave i fafo, e ova ma le 50miliona i le taimi nei. E talitonuina le saunoaga a lau Afioga i le tulaga lea. Ae ia seu foi le galu ae tagai i le galu, ona o le mafaufau i tulaga faapea lau afioga. Ae o lo o faagaioi pea la tatou polokalame o laisene o vaafagota. Ae malupuipua lava totonu o le gataifale, lea e tau o coastal fisheries i lalo o pulega a lo tatou atunuu, e le o lalo o pulega a le FFA, ona o le mafaufau o i ina lea e faamoemoe i ai lo tatou atunuu i taumafa ma soifua mai o tatou sami. Ae o tulaga uma na o lea e tilotilo i ai le Matagaluega lau Afioga. Faafetai.

SUI FOFOGA FETALAI: Faaauau lau saunoaga lau afioga i le sui mamalu.

Afioga SULAMANAIA FETAIAI TAUILILI TUIVASA: O le fautuaga e avatu i ou tafatafa. Se i silasila ane foi i le itumalo lena o Vaimauga i Sasae o le tele o, tuu la le ia o lea ua avatu fautuaga. O le tele o fa'i, fa'i Isaraelu, a vaai i le nuu lena ua faatau i le auala, ua le mafai ona i ai se maketi. Na ala ona o e fai o se maketi e ave ai i fafo. Pe le toe silasila ane i le fa'i Isaraelu a lena itumalo, ina ia tatala le avanoa e toe tuuina atu i i fafo lea foi faamanuiaga i si ou nuu po o si ou itumalo. O le afioga ia Faimalotoa o le Minisita o le Soifua Maloloina, e le selu atu, faafetai, e avatu foi lena avanoa i le faamaisega i le atunuu i nai alo ma fanau i e ua valaau i ai le Atua ona o le faamai. Faamaisa le Atua i aiga faanoanoa, e ala i le oti, e leai se tatou mea e faia. O le finagalo tutasi o le Atua, ae momoli lou agaga faafetai i lau Afioga ma le Minisita lagolago aemaise lava le

Ofisa Sili o le Pulega, i le tulaga faigata sa oo i ai si o tatou atunuu. A o lenei ua toe foia lea faafitauli, e momoli atu le agaga faafetai, o ou mama na. E ui lava i atinae uma a si o tatou atunuu ae o le ola lava le mea e sili ona ave i ai le faamuamua a le Malo. Se i silasila ane, po o le a le tele o tupe ma e lagolagoina lava e lenei itumalo le tele o ni seleni e avatu e tagolima i ai lau Matagaluega aua le soifua. Aua e leai lava se aoga o nei Paeaiga ma nei mea pe a mamai. O lea e avatu ai le fautuaga, faataua le, o a uma ni mea, na o le tuuina mai i totonu e atinae ai le soifua maloloina o tatou tagata.

O le Minisita o Lafoga, tama o le va le tama lea, o lo o i ai le faatuatuaga. E masalo o le Matagaluega lenei o le 90% o le tatou Tala o le tupe, o lo o faagaioi mai e le Matagaluega a Tialavea po o le Matagaluega o Tupe Maua po o lafoga. Ou te faafetai ua toe tuu i totonu lea ua toe suia le igoa o le Matagaluega, ua tuu i ai le Custom. Aua o lea na alu na o le revenue, ae faafetai ua toe faaoga le custom leaga o i le isi Vaega e pei o le popolega lena. E le o i ai i totonu le custom na o le revenue. Ae faafetai i le mataala o lenei Minisita ua toe silasila i ai ma tuu i totonu. E leaga o le **border**, o lea ua tatou e pei ua tau lilifa le vaai a lo tatou faiga Malo i le **revenue collection** ae ua tatou le vaai i le **border**. O i lea e sau ai i totonu le tele o nisi mea e le o mafai ona silasila i ai lo tatou Malo, e ala i vaa faila ma mea faapena. Faafetai i le toe faatauaina o le suiga o le igoa ina ia mafai ona tagolima atu i ai i lena vaega. Ou te momoli atu ai le faafetai.

O nisi o vaega, silasila i le toatele o le atunuu e aumai a latou taavale i fafo. O le toatele o le atunuu e le malamalama i afi o taavale po o CCia e, po o le a se finagao o lau Afioga aua ou te lagolagoina le tausaga o le taavale, e pei e lilifa le tele o le tiute agai i le afi o le taavale. Fai mai a sau e 4 ogaumu pe 3.0, e faapena i lo le 2.0. O le mea la lena e silasila ane i lena vaega pe le mafai ona o lea ua tatou fai mai e ala ona tele le tiute ma faapena ona e ai uma e le taavale lea e 6 ogaumu pe 8 ogaumu ia penisini. Ae se i silasila ane lava, o le toatele o si o tatou atunuu e aumai meaalofa i o latou aiga. E aumai e 4.0 le afi ae o le tausaga e faapena, se i silasila ane i lena vaega.

Lau Afioga i le Minisita o Tupe, na o le tatalo atu i lau afioga ma le Matagaluega. O lo tatou atunuu o lo o faamoemoe atu i lau faasoa lima lelei. E faafetai o lea o le tausaga mulimuli lenei o lenei foi Paeaiga, ae o lea ua tago atu i le pay slip, o lea ua i ai nai sene ua faaopoopo. E faafetai o lea ua afea, e le gata o Ofisa Sili o Pulega o Matagaluega a le Malo ao sui usufono foi i lau faasoa. Ou te tatalo atu maumau pe ana sau atoa le lima ae aua le sau le vaega lea. O le tatalo pe le mafai ona e toe silasila, o au ou te au tele i tama ma tina matutua, i le penisione. Po o le a sau silasila ae le toe faaopoopo ae se isi vaega mo si au penisione. E tatalo atu foi i le siitia o totogi o

nai sui o le Malo lea, e matau, o lea ua toe fai le tulafono lea a le Soifua maloloina e toe faaoga ai sui o le Malo, pulenuu i tama ma tina, pe leai se isi faasiliga e tuuina atu i tologi o pulenuu. O lea ua tele le isi a latou avega ia ua toe tuuina atu ai. O le talosaga lena.

O le isi vaega, o lea foi ua maua i le tala faaopoopo ua i ai le 2sene lea e aumai, i le tulaga faapena e lagolagoina lava le mea e maua mai ai tupe. Ae o le tuualalo i lenei foi tausaga mulimuli, pe le mafai ona e toe silasila i le tulaga lea o le penisini. O le aumaiga i totonu o le penisini. Aua o lea e maua lava, e tasi lava le Kamupani lea e aumaia, ae le mafai ona, o lau tatalo ua tele taavale, sa manaia lava le vaega lea e aumai na o latou, aua e leai ni taavale. A o le taimi lenei, ola, ua poloka le auala i le tele o taavale. Pe le mafai ona e toe silasila, e toe avatu se isi avanoa i se isi kamupani e sau ai e faatauva ai. Aua o le tele o pamu ia ta te alu atu ai e, o le taimi sa i ai muamua e taugata atu le penisini i le kiso, a o le taimi lenei ua \$27:40 ua leai se maualalo o le kiso ma le, ua faapena lava. O le tatalo lea, pe le mafai ona e toe silasila ane i se isi kamupani penisini po o le a se isi, ina ia fai ai se tauvaga faapena, ina ia mafai ai pea ona maua e si o tatou atunuu le maualalo o le tau o le penisini.

SUI FOFOGA FETALAI: Malie le sui usufono o saunoa sei tulai mai le Minista o Tupe.

Afioga Hon Sili Epa Tuioti (Minisita o Tupe): Faafetai i lau Afioga mo le avanoa. E na ona ou fia faamanatu atu i le sui usfono. O le tulaga lea e filifili ai kamupani ia e aumaia suauu ma penisini, o lo o fai tai 4 tausaga ma fai le tulaga tauofo. O le tauofoga talu ai, e 3 kamupani tetele sa talosaga, ua uma ona fai le sailiiliga i ai. E pito taugofie lava le tau lea ua i ai i le kamupani lea latou te aumaia le tatou suauu i le vaitaimi lenei. Ua i ai foi le faamoemoe o lo o tilotilo i isi nai tausaga o i luma, o lo o taumafai foi ina ia toe faatele a tatou tane lea e teu ai suauu ma le penisini ma tulaga faapena. E muamua le tulaga foi lele, ne i te i ua i ai ni faalavelave faale-natura e afaina ai le le mafai ona o mai vaa. E po o le tai 3 masina po o le tai 6 masina, e tataua ona tatou tapena i tulaga faapena. O lo o i ai foi le fuafuaga o le a faapena ona toe faaopoopo nisi tane suauu tetele i Salelologa. Ona o le taimi nei e faalua i le vaiaso ona lau le suauu i ina, ona e le o lava a tatou tane. O mea uma na o lo o galulue nei i ai ma o lo o taumafai e fai ia feutagaiga ma nisi e fesoasoani mai, i le faatupeina o tane ia, ina ia faapena ona lava se taimi, pe 6 masina e mafai ai, a o i ai ni faalavelave pe ua leai ni vaa, pe ua fai ni taua i o i nuu Arapi, ae o le la e lava a tatou penisini. E masalo e tasi lena mea o le a fesoasoani ai i le tulaga o le faaitiitia o le tau o le suauu ma le

penisini i le vaitaimi lenei. Ae pei ona silafia ma faamanatu atu, o lo o fai lava tai 4 tai 5 tausaga ma fai a tatou tauofoga ia mai kamupani. Ona filifili ai lea po o ai o lo o tatau ona ave i ai. O le tulaga lena o lo o i ai le tatou kamupani lea o lo o latou aumaia le suauu i le vaitaimi lenei. Ma le faaaloalo lava.

SUI FOFOGA FETALAI: Faafetai o lea ua faamalamalama e le Minisita o Tupe le tulaga i le fautuaga. Faaauau le saunoaga.

Afioga SULAMANAIA FETAIAI TAUILILI TUIVASA: O le tuualalo lava e tuu atu i ou autafa lau Afioga. Ona o le tulaga lena, aua e fiu lava i tatou e faasea, ae leaga e tasi le kamupani la e aumaia i totonu le suauu. Ae ana faapea la e lua ni kamupani, e faapena a tatou, ae na o ni tuualalo lava e avatu.

O le Afioga i le Minisita o Aoga, e le selu atu masalo o le sui alofa lava ia e le toe seluselua oe. Ua lava ia seluseluga sa tuuina atu ia te oe. E pau le tatalo a lenei itumalo, se i silasila ane i tatou faleaoga. O lena e pei ona ou tatalo atu i le tatou faleaoga i Fagalii o lea e manaomia se malae, ma se isi fanua e toe fau ai, e fapena foi i le faleaoga i Letogo. O lo o sue se isi malae, o lea na tatalo atu i le afioga i le Minisita o le MNRE, ae ua leai se eleele ua aumai. O la e i ai le reserve la e i Vailele, lea e i lalo mai o fanuatanu. Pe le mafai ona toe tuuina atu aua se faleaoga o le nuu lenei o Letogo. Ona ua tele foi alo ma fanau i uta i le mea lea e tau o Maugafiafia. Ua afifio atu foi le mamalu o le atunuu, ua faigata ona o mai i le aoga a le Primary school a Letogo, po o le aoga a le Primary school a Vailele. Ae pe le mafai ona fai ai i ina se aoga, e o atu uma i ai, le reserve lea a le MNRE lea e i lalo mai o le fanuatanu. Pe se eleele lea e aumai i o i le SLC. O le tatalo lena i lau Afioga i le Minisita o Aoga. Ae tau le selu atu, o le mea lena e lelei ai Minisita, e o mai i totonu o nuu mavae, e le selu atu, faafetai i galuega lelei o lo o faia pea i lau Matagaluega aemaise lou tulai mai.

O le Minisita o Faamasinoga, o le manaia ia o lenei Minisita ma lana Minisita lagolago, e galulue faatasi. O le tele lava o taimi e pei o se ulugalii, ta te vaai e galulue faatasi. E pei o le Minisita lea e ave ai lo ta ita mitamitaga, o se tagata e galulue faatasi le Minisita ma lana Minisita Lagolago. E oo foi i Ofisa Sili o Pulega o ana Matagaluega, e le selu atu, ae se i silasila ane i cases foi ia o faamasinoga ua leva. E i ai le case a lenei aiga, o lea ua ova ma le tausaga ua le iloa po o fea ua oo i ai. O le case a lou atalii, ua aveai foi ma atu o le mafaufau o lou sui usufono, ou te fia manao e faauma ia lena mea. Ua maua le loto faamagalo, ae ou te le iloa po o fea ua oo i ai. Se i silasila ane i mea faapena, i mea a nai o tatou aiga ua leva. E le gata foi i nisi a o faamasinoga ua leva ona taatitia, e na o se tuualalo e tuuina atu i lau

Afioga i le Minisita. O le tulaga i le CEO o le Faigapalota, faafetai foi i lea tamalii. Ua tulai mai i le tele o mea lelei aua le faiga o le palota. E fiu lava si nei foi tamalii ma lana Matagaluega e faatino auaunaga, e le mafai lava e lo tatou atunuu ona, e oso pa lava le atunuu. Ae faafetai i le tele o suiga ua i ai, ae pau le tatalo ona o le masina lenei o Ianuari lea e uma ai le vaega lea e transfer out lea e toe aumai i totonu. Aua e pei ona ou taua, o le tele o lenei itumalo o Vaimauga i Sasae o lo o i ai tagata o lo o nonofo lava i o latou fanua faatau ma o latou fanua lisi. Ae leai ma se isi e palota i o i sui o Vaimauga e o lava latou i latou itumalo. O le tatalo pe le mafai ona toe tuutuu laititi atu lava i tua se masina, po o Fepuari, e le gata i lenei itumalo a o nisi foi o itumalo, ina ia toe transfer in ai, nisi foi sa o i tua. O nisi foi e nonofo lava i totonu o nuu ae sa o ona o aiga. O lea la ua toe fia o atu i totonu o nuu i le Tulafono fou lenei e lagolagoina e le sui usufono lenei le faatulagaina i mea o lo o nonofo ai.

Sau i le Afioga i le Matua o Usoalii, faamalo i lou tulai mai i lenei foi Matagaluega. Faafetai, e tau oti a le mea o fautuaga a lau Minisita Lagolago, a o oe e ese lou, leaga o lou faalupega o le matemate Malo e te matematea mea e le i tutupu. E ui lava e oo mai i le taimi lenei e le i maua lava le OLP, ia a o lea lava e te galue, e te fiu lava e sue o lenei lava e i ou tua le OLP. O le nuu lenei o Laulii e matuai le maua lava le TV. E tatalo atu i lau Afioga ona o mauga, e fai o le mauga lea e i le va o Letogo, pe le mafai ona e silasila ane, e le gata i le TV i se tulaga foi lea i le antenna e fai ai e manino ai le TV i si ou nuu lea o Laulii. E lelei lava isi o lou itumalo, ae na o si ou nuu lava lea, a o le tulaga foi i le service i le leaga o le Bluesky ma le Digicel, pe le mafai ona e toe silasila ane lau Afioga i le Minisita i le tulaga lea.

Ia, lau Afioga i le Fofoga Fetalai, na pau lenei o le mea ua manatu ai lota lota i lenei itumalo, ae faamalulu atu i le paia o lenei Maota, o le a foi se faafofoga i se gagana ua paopapa, ia toe faafoi mai, ae ia tatou maua se tausaga mulimuli o lenei Paeaiga, i le agalelei mai o le Atua.

Faamanuia le Atua i lau Afioga i le Fofoga Fetalai, amuia oe o lo o e i lalo o se tagata e sili ona tamaoiga. Ina ua mulimuli le tama lea o Elisaia ia Elia, na pau lava le mea na fia manao ai le tama lea o Elisaia ia Elia, o le pelaue o Elia. Ina ua alu la, mulimuli mulimuli Elisaia, a foi o Elia lea na aveolaina i le lagi, togi mai loa i lalo e Elia lona peleue, ae vaai la i le taimi na, foi lea i le fofoga o Elisaia i le puega o le peleue i faamanuiaga. O lea la, tatalo i le Atua e faafualoa pea le soifua o le Fofoga Fetalai, aua e te naunau i le tofi, ia e maua faamanuiaga o lo o i ai i le Fofoga Fetalai aua lou tulai mai. Ia manuia Samoa ma le faafofogaaga.

SUI FOFOGA FETALAI: Ua faamalo saunoa i le sui usufono mamalu. E suamalie faaniuati e pei o upu a le atunuu. Ae ua ou manatua ai foi le tala mulimuli lava a Pili i le tofiga o lana fanau, a sagasaga e tau, ia matua tau, a sagasaga e galue, ia matua galue. Afai foi e tautala ia matua tautala. E momoli ai le faamalo i le sui usufono mamalu mai Vaimauga Sasae. So o se taimi lava e te tautala ai, e ola le fono. E mafua isea? E fou lagona, e tutupu matagi i liu o vaa. O le mea lea, e momoli le faamalo ma le faafetai. O faamanuiaga ua tuuina mai mo le Nofoa, e le masalosalo o la e soifua le Atua e ia te Ia le pule atoatoa o le soifua ma le ola. A o le tau faalalanu mai, ia taoto mai laia, o le agaga lena. Ia faamanuia le Atua i faiva ma tiute. O la e faafofoga mai lava lou itumalo ua sagisagi fiafia i lenei itula afiafi.

Ia ma ua avanoa foi le Maota mo se isi sui usufono e fia saunoa. Ia tulai mai le sui usufono mamalu mo Gagaifomauga Nu.3.

Susuga Hon LAAULI POLATAIVAO LEUATEA (Gagaifomauga Nu.3): Faafetai atu i lau Afioga i le Fofoga Fetalai i lenei vaega o le tauafiafi. Ua faliu foi le la i lona nofoaga, a o lo o mamau pea lago o le sa folau o le tatou Palemene. Afio ia oe le Atua e ou le mana ma le malosi uma lava, le Atua Silisiliese i Lou nofoalii seia ou faapaleina Oe i le viiga, aua ua tele naua Lou alofa ma Lou agalelei i lenei Palemene aemaise le atunuu o Samoa. E faafoi atu ai le faamanu ma le faafetai ma le faaneetaga i Lau Afio e faavavau.

Ua ou manatu sa tatou lutia i puava a ua tatou mapu i Fagalele mai lena tausaga ua tuanai atu. Ua tatou feiloai i le lagima ma le soifua manuia i le amataga o le tatou uluai fonotaga o lenei tausaga, ua taitai mai i le saogalemu lo tatou ola i le amataina o tatou galuega aemaise lenei aso.

Ona ou manatu lea o lea ua seese le vaatele i maota tulutulu i moana, tulutuluitao i le fale o Po ma Ao ina ua soo taiao Samoa i lenei aso. O lea foi ua manava le au taualo ina ua ele le matagi ae lautasi le savili. Ua to ai nei le falemapu o tautai ina ua logo i Puluotu le mapuea a le aufaitofa ma le aufaiuta i tuleiga ma saunoaga ua opea i le Maota i lenei aso, a o tatou liuliu ma fulifuli malie le laau mamafa o le faavae popo o upu taoto ma le tamaoaiga o si o tatou atunuu i le Maota Fono i Tiafau, o le malae e saili ai manuia ma le aoga mo Samoa nei ma a taeao.

Ona ou manatu lea o le a ou le toe vaea le falaooto i le tapuai mai a Samoa i lenei itula afiafi i le afio o lau Afioga i Le Ao Mamalu o le Malo ma lau masiofo, afio foi le Afioga i le Sui o le Fono a Sui Tofia ma lou faletua, aemaise le mamalu maualuga o le tapuaiga a si o tatou atunuu. Le paia i Aiga, Aiga ma latou Tama, Tama ma o latou

Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti, o Samoa ua potopoto.

E le faagalo foi le tapuaiga a o tatou uso mai le Malo i Sasae. Ioe, Sua e ma le Vaifanua o Fofu ma Aitulagi, Saole ma Saleaamua ma le Launiu na Saelua, Tama a le Manuatele, Tootoo o le Faleula ma le Laau na Amotasi. E le tau fofola so tatou fala, e tasi le tama, tasi le tina, e uso tatou.

Le tapuaiga a si o tatou atunuu i tafa e fia o le lalolagi, po o fea le vaega o Samoa nei ma atunuu mamao o lo o outou maua mai ai faasalaluga tuusao a le tatou Palemene i o outou faiva alofilima aemaise la outou tautua apaapa ma le tautua aitaumalele aua Samoa ma lona lumanai.

E faamuli ma le ai se tala aua le tapuaiga a le Tapuaiga Sa, o feoi o le Talalelei o sui vaaia o le Atua i le lalolagi i so o se fatafaitaulaga i Faauluuluga o Ekalesia, aemaise tovine eseese o lo o tatalo ma nonomanu aua Samoa ma lona manuia i mea faaleagaga. Ona manatu lea ua sooula le fala, ua atoa foi pou o saunoaga i la outou tatalo ma la outou tautua aua se manuia o Samoa. Faamalo atu faafetai le tapuai, faafetai le tautua Malo.

Lau Afioga i le Fofoga Fetalai e mitamita fai ae le lagona i lenei itula afiafi ona o le taimi muamua lenei ua ou tulai e faaleo se lagona i le Tala o Tupe a le atunuu a ua e seei i le nofoa vaevaeloloa o le Fofoga Fetalai e faalogo i ai le Palemene o Samoa. Matautu, o oe lava o le paia aua le Aiga Sa Peseta, afio ia te oe le Maopu, le mamalu i Usoalii, le nofo a ituaiga aua Matautu, aemaise oe o le faamalumaluga o Malo, o le gagaae ma le gagaifo o le uso, ae faafetai i le Atua ua fai oe ma Fofoga Fetalai i lenei itula afiafi. E momoli foi moomooga alofa aua le taputapuai mai a le Afioga i le Fofoga Fetalai le Afioga ia Leaupepe po o le Afioga ia Toleafoa.

Lau Afioga i le Palemia ma Afioga i Minisita o le Kapeneta, Afioga i Minisita Lagolago, tainane foi lea itu o le vai i le afifio o Taitaifono, Sui Taitaifono ma sui mamalu uma o le tatou Palemene. O lea foi e faavailolo le paia maualuga o tupu ma ee o tamalii ma failauga, o faletua ma tausii, o saoa ma tamaitai o lo o vae ma lima i ai le tatou Malo. Malo le onosai, faafetai le galulue.

E faamuli ma le ai se tala aua le tapuaiga a le va faafeagai ai o le tafatolu o faigamalo i le tapuaiga a lea ituvai o le tatou Faamasinoga i le afio o le Afioga i le Sui Faamasino Sili, aemaise le Afioga i le Peresetene o le Faamasinoga, alii ma tamaitai o le faamasinoga a Samoa o Fanua ma Suafa ma le Faamasinoga Maualuga. Faamalo le onosai, faamalo le tau, faamalo le tauaveina o le tatou valaauina.

Lou itumalo pele a outou maua mai lou siuleo i lenei afiafi, e momoli atu i le tulaga aloaia le faafetai. Se taimi ou oo atu. Sa Tupua ma Sa Malietoa ma Aiga, Tupua ma Malietoa ma le faletolu e tausii i

lo oulua va faafeagai ai, aemaise le afifio o le Aiga o Mavaega, lau tofa i le Tuua, Aiga ma Saeseese, malo le po o le fala ma ula le iula, o lo o manuia pea o ma faiva ma le Afioga ia Faaulusau ona o la outou tapuaiga.

Ae ua ou manatu i lenei itula o le afiafi lau Afioga i le Fofoga Fetalai, ua tatou taunuu nei i le uluai fono o lenei tausaga e taua tele. A ua tatou taunuu foi i le tausaga mulimuli o le tatou Paeaiga lea. Ona lagona lea ua tulili le tai aua le faatamasoalii a tautai, o peau sa mataloloa ua fati sisina nei, tatou sunui pea le ala o taua ae ave le faamua i le Atua, o Ia ua tatou maua ai ao ma iu o Malo. Ae fai mai le upu a le tamaloa foi lea e time keeper i mea nei o faipelega po o fusuaga i taimi faapenei, “seconds out, clear the ring, last and final round.”

O autu o nai ou mafaufauga e molimoli atu i le Palemia ma lau Kapeneta, ia vaatele i o outou finagalo. O le tatou Malo, o le tatou Malo e faufaatasi, e le o se Malo na o i ina e le o se Malo na o i inei, o le Malo tatou te piiama, ua tatou faufau faatasi aua se manuia o Samoa lea e tapuai mai. E pei ona ou taua i nisi o au folasaga lau Afioga i le Fofoga Fetalai, o le Paeaiga lenei, o le Paeaiga e tulaga ese. Aisea? One Party State. O le faaiuga lena na aumai i le atunuu i le Paeaiga lea na uma nei, na filifili ai e omai e fau faatasi le atunuu. Tatou toe foi i le amataga i le 1962, leai ni Vaega Faaupufai, tatou te omai e momoli le tofa ma le faautaga e utupupuina mai ai oe pe a e gaogao i le mea na e sau ai. O a manatu ma lagona, e lafo i lumamea i le ogatotonu o le Maota lea, e filifili malie i ai le tofa ma le faautautaga ,e molimoli le agaga o le loto maualalo ma le agaga o le faamaoni. A tau ane ai, a aoga, viia le Alii. Afai e paopapa pe le lanu pe le lilo, faafoi mai, ae tau ina ia fai se aoga e molimoli atu aua e tonu lava le tagata ia i ona manatu, a o le Atua na te silasila i le loto.

Faafetai tele i lau Afioga i le Minisita o Tupe. Sili, e le soona filifilia mea nei o Minisita o Tupe e se Malo, e le faigofie foi le filifiliga o mea nei o Minisita o Tupe. Aisea?Se i vagana le tagata ua atoia i ai mea uma, tomiai, faautautaga, toafimalie ma i ai lona lagona o le loto onosai, aua e fetuleni uma atu i lau Afioga manaoga o lea ua tatou lagona i le afiafi lenei. E leai lava se mea o misi. Ae faapefea ona faatino? Faatino i le ea, faatino i vai? Leai, o tupe. Na pau lava lea o lau tuualalo lau Afioga i le Minisita, **money is only a tool not a master**. O le tupe ua na o se mea ta te faaaogaina ae ta te le Atua i ai. E i ai lava auala ta te fetuunai ai ma o tatou liuliu i ai, ia lava faasoa ou aao lufilufi mea lelei aua le atunuu. O le autu o ou mafaufauga, o lau faamuamua ma lau fuafua tatau, **priority and conservative**, aua o oe o lo o i ai le malosiaga e mafai ai ona e faataunuu, tulou, ma ooti nisi mea e **unnecessarily** e oia ai nisi o atinae e tatau ona ave i ai le faamuamua a le Malo ma nisi atinae e le tatau ona faia. A ou

maitau i le talafaasolopito, e 16 i lau Afioga nisi o Minisita ua uma na filifili mai o Tupe i nei tausaga uma mai le 1961 e tau mai lau Afioga i le taeao lenei. O se matatia taua tele ona o lou valaauina. O lona uiga e taua tele le agaga o le fua faatatau pei o lau Tala Faatatau o le Tupe muamua, i o tatou manao. Fua lou manao i le mea tatou te maua. Sa matuai ou lagona lou agaga faafetai i lau uluai Tala o le Tupe lena sa folasia i le Maota.

O nai motugaafa e avatu i ou tafatafa lau Afioga i le Minisita o Tupe, ia e silasila lelei pea lau Afioga i lau tuualalo i **priorities** a le tatou Malo e fua agai i ai mea o lo o tua i ai le Malo ma lava lana faasoa ma mea o lo o augani atu ai le Maota i lau Afioga. Ua ou vaai ma le totoa i le mea lea i le tatou **Tenders Board**, ua ou tilotilo lelei i ai leaga o i ina lea e sau ai le faasoa lea e agai i tua. Ua ou matuai tilotilo lelei i ai po o fea lea e ave i ai le faamuamua i atinae ia e fai. Ae na ona lafo atu i lau Afioga i le Minisita, o mea nei o **variations** mo togafiti, o le upu sao lena. Afai loa ua uma ona faatulaga e le **Tenders Board** le tau ma mea uma e fai ai le galuega, fai ia uma. Ae aua ne i na ona togi mai ia maua le galuega ona uma lea mulimuli toe omai lea i totonu e toe aumai tau faaopoopo nei. O ai e amoa lau Afioga i le Minisita o Tupe? E amo e le atunuu. Ae na ona tuu atu i ou tafatafa i lau faasoa limalima lelei ma lau faautaga tataua leaga o lea e te lua seelua ai ma le Afioga i le Minisita mo Galuega ma Atinae Esee. O oulua o seleulu, tulou le faafofoga a le atunuu, o seleulu a le Malo, e taofiofi mea ia, leaga o la e faataaloga i vai e isi, they play, oh yes, they play with it. They love playing. Ma e leai se mea o lilo lau Afioga, o la e matamata le atunuu, **people are watching and witness** le mea lea e tupu, ae lafo a ia oulua leaga o lea e te lua talia mea ia. Ae na ona ou oloolo pitovaa lau Afioga i le Minisita o Tupe. Ua atoa nei le 40 tausaga talu ona tulai mai le tatou Vaega Faaupufai e taitai le atunuu. E oo mai i le taimi lenei a tatou le loan, e le mafai ona faagaioi le Malo. **If we dont loan**, e le mafai, 40 tausaga. Ona tatou fua lea lau Afioga i le Minisita o Tupe, o le a le isi auala tatou te manatu e oo atu le tatou Tala o le Tupe i le isi tausaga ua tatou le faia le mea lea, ae tatou te taaalo i polofiti i le mea ua uma ona toto i ai le fatu o le faaaluga o tupe.

Na o lau tuualalo e le fai ai lau Afioga, ua tataua ona silasila mamao i ni stakeholders, companies a le Malo e fesoasoani e faatupe le tele o mea, o lena ua uma ona fai e le tatou fale suesue i uta i le SROS le tele o le anoanoai o suesuega matautia, a o lea tatou te toe tau lafo i le private sector. **They cant do it, I tell you**, e le mafai ona latou faia, **they have no resources to do it**. A faapea foi e uma ona fai se tatou product laitiiti faapea, ae alu atu le private e momoli le maketi, **nobody will recognise it**. Ae a alu atu le Malo, **government to government level uphost**, lau Afioga, e sapo leaga o le Malo i le

Malo e ave ai le faatauga o products ia. Ni falaoamata ulu lau Afioga, afai e le tatou Malo e leai se, e taufao leaga o le Malo o Samoa e ona le product. Tulou ne i te i ua faapea ua alu le Malo fai le pisinisi a le tagata faipisinisi. E le o lena, ae e i ai pisinisi e fai pea e le au private sector, i ai pisinisi e fai e le Malo. E 4 pe 5 ni tatou kamupani faapena, e tumu lau ola, fiu e faasoa le tupe.

Na ona ou faapena atu lau Afioga i le Minisita o Tupe, **coconut oil, breadfruit flour**, vai. O le mea foi lena na fail ai le kamupani vai lea sa taumafai e fai i o i Mulifanua, **because they cant uphosts**. A private sector cannot open the market by itself, needs the government to wind beneath the wing. Vaai i Saina, e miliona ma miliona vai o le lalolagi la e lau ia Saina. O tatou paaga lelei ma Saina, faaaoga ana... China buy our water, they will do it, Im sure they will do it. CCTV lea e i i lea e free, talosaga i le amepasa a Saina promote le tatou vai. E fia sefulu miliona tiliona lita ta te talanoa i le taimi o la e tafe i o i le Mataolealelo i Savaii, la e tafe le vai i le sami. Money is wasted. Ae na ona ou tuualalo i lau Afioga i le Minisita o Tupe, e mafai ai ona e faia uma lava manaoga ia e tagi atu ai le paia ma le mamalu o le Maota Fono.

Lau Afioga i le Minisita mo Fesootaiga, faamalo galue faamalo foi le onosai. O le mafatiaga lea i le taimi lenei ia te au, o le gagana lea ua gagana ai le atunuu i luga o le tatou upega o faamatalaga, le social media. Ae ona o lau Afioga i le Minisita mo Fesootaiga ua faaleo ai ou lagona, se i e silasila ane lava i le mea lea, le tatou Facebook. Talofa e i le atunuu, talofa ia Samoa ma mea ua tutupu. Saunoa nei le Fofoga Fetalai i le gagana a le atunuu, le gagana o le tatou maluapapa ma o le pulufana lena a le tatou atunuu. A leai se gagana ua leai se aganuu. A leai se aganuu ua leai se atunuu. Se i e seu silasila Afamasaga i lou tomai na tofia ai oe i le Ofisa lea, faamolemole, se i e silasila po o le a le auala e filtered ai mea ia e tutupu. Oka se mataga o upu ma tala felafaoi e te le fia silasila i ai. Sa tatou gagana i gagana ia? Tulou Samoa ma lau faafofoga ma le faafofoga foi a e o lo o faia upu nei i luga o le upega o faamatalaga. Oka, ua tau le ao ma le po, felauaiga i le va o tuafafine ma uso, felauaiga o isi o uo ma isi tagata. Oi, oi, oi, o se mata o maasiasi. Ae na ona ou faapena atu, se i e silasila po o le a se auala e filtered, cyber greenfeoti tagata, suicide, ua tutupu uma talu le mea lenei. A o le mea na ala ai ona aumai le mea lenei o le upega o tafailagi, e aoga tele. E aoga le Facebook i connection, o talanoaga, o mea uma faaleaiga. E taua tele, peitai, e tatau ona tatou aputiputi i le vaisua lea ua tatou i ai. E malepe ai i i le atunuu lau Afioga i le Minisita, silasila, o le a le aoga tatou te toe fai atu ai ma tatou tilotilo? O se gagana lea a tatou? E le o le tatou gagana lenei. Le mafaufau upu ma tala, tulou le faafofoga ale atunuu. Na ona ou piiama se i e seu

silasila ma e tagatagai foi. E avea foi lenei avanoa ou te tatalo atu ai i le faafofoga a Samoa i le lalolagi, a i ai ni outou alofa, ia tatou liolio i le mamalu ma le paia o le tatou gagana, o le malu lea o Samoa, a o lenei lava ua luai vaeane le afaifi. O se tai masa ma se taimata tiga i le faafofoga a o lo o tapuai le loaloa o le tatou atunuu. O upu foi ma tala o lea ua lafo i taitai o le Malo, ia ou te le fai atu. Ae amatamea le tatou Malo i ni faiga faavae, se i e seu silasila po o le a le auala. O Saina, e no lava, e leai lava se aafiaga, na ou vaai i ai i le control ina o le mea lena e nofo filemu ai tagata. Ae po o le a se auala e fai ai pea se tatou mea, e control ai le auala o le fesootaiga o gagana ina ia taofiofi ai le mea lenei. Ua matua oo i le fasioti tagata ma mea uma ua tatou laa i ai. O le a la latou tilotilo i le isi 10 tausaga i le lumanai? **How are we gonna look like?** Na ona ou faapena atu lau Afioga i le Minisita.

O le mea lea o le tatou Broadband lau Afioga sa ou fesili foi muamua, o se poloketi ese le taua mo le tatou atunuu. Ou te mautinoa e \$20miliona le tupe na aumai e fai ai le poloketi lenei. Ia, ou te iloa e oo mai i le aso ou te le o iloa po o fea o i ai. E \$20miliona le tupe na aumai na amata e te le i taunuu mai i le nofoa lena, sa i ai nisi sa muamua atu. E oo foi i le tatou school net, e \$17miliona. Faamolemole lau Afioga o se mea e matua maua ai le faamanuiaga mo matou i Savaii e aao atu i inei ae maua i Savaii. O se mea e maua ai se faamamaavega mo e e mamao atu ma le taulaga. A o le faanoanoaga lau Afioga, se i saili ifo aua o faamatalaga nei na aumai, o la e alu lava tupe a le Malo i le totogiina o pou a le Digicel, o la e install ai i luga mea ia ae leai se mea o faia. Se i silasila ane lau Afioga i le Minisita, e le mafai e nai ou fofoga e lua ona vaai le lautele ma le mafala o mea o lo o tutupu i ou tafatafa ae na ona matou faaleo atu ma le agaga faaaloalo.

Lau Afioga i le Minisita mo Faamasinoga, faafetai tele ma momoli atu le faamalo i le filifiliga foi o nisi o tamalii e avea ma Faamasino fou. Ae le gata foi i le faafetai i le Kapeneta i le toatele o nisi o Faamasino filifilia aua le tatou Faamasinoga o Fanua ma Suafa. O le fatu lea o le atunuu, o ona gafa ma ona talatuu ma ona suafa, lea foi na saunoa nisi o sui usufono ona o nisi foi o lape sa i ai nisi o alii faamasino. Lau Afioga i le Minisita, tulitulimatagau, leaga e le tataui i se tagata sa tauto lelei ona ia faia se mea leaga ma faaletonu, o lea foi e aafia ai ma mea a lenei aiga.

O le tulaga o tatou faila, ia e oo atu pea se lagona. Tautuana faila a le faamasinoga lau Afioga i le Minisita, ia malupuipua aua o le fatu lea o le atunuu. Ia ua te i lava ua tuli faatata atu ai ma sina tamalii o le atunuu sa pule, togi i lalo o le pasi, alu filemu e leai se leo, ae o la e malamalama le mafuaaga. Ae na ona ou tuualalo, o faila a le atunuu

e nofo i le Ofisa o Faamasinoga aua le avea i le fale ma ofisa e le o ni faila a le tou aiga.

Lau Afioga i le Minisita mo Taaloga, Loau, faafetai tele mo lou tulai e tetee le pepa tui, \$40.

SUI FOFOGA FETALAI: Ua ou vaelupe le saunoaga matagofie a le sui usufono mamalu, ae ao ina ou faamanatu atu, o le tiute lea o le Nofoa o le taulogologo pea ma fautua i sui usufono mamalu uma o le Palemene, tulaga o tatou Tulafono Tumau, tulaga o le taua o suafa, ae faalupe pea tofiga o lo o umia e afioga i Minisita. E na ona ou toe faamanatu atu, sui usufono mamalu Tulafono Tumau 78, o lo o manino ma maioio ai, le le tatau ona taua o suafa o Minisita po o sui usufono.

E tuualalo atu ai i le sui usufono mamalu e faaauau le saunoaga matagofie i tulaga o tatou Tulafono Tumau ae faaauau ia le saunoaga.

Susuga Hon LAAULI LEUATEA POLATAIVAO: Faafetai faamanatu i lau afioga i le Fofoga Fetalai. Lau afioga i le Minisita o Aoga Taaloga ma Aganuu, Loau Solamalemalo Keneti Sio, o na ua uma ona faafetai atu le mamalu o le Maota i lau afioga fai atu foi i le pepa tui faafetai. E a foi na i ai se fesootaiga le talafeagai i le va o lau afioga ma le Soifua Maloloina, faafetai. O le mea moni ana leai le mea lena, e leai ma se tamaitiiti e aoga. That's the truth. Ae faafetai le tofa.

O le tatou lakapi, ia ou te le fai atu lau afioga i le Minisita. **Rugby is our best national sport.** O le fatu lena o Samoa o le lakapi. Lea sa e i ai ma lotolotoi lau afioga i le Minisita. E le o le tupe e leo se isi lava mea, o le fatu. O le fatu lena, o Papaliitele Peter Fatialofa na nofo ai ao tamaiti na aumai na amata ai le Manu Samoa. Filifili ai ma lau afioga i le Minisita. O le a le mea na tatou oo i ai? Na tatou fana lava fana i le masina. Lele lava lele i le mea e gata ai mea, **because everybody was representing Samoa from the heart.** E le o se isi lava mea. Tatou te lei kea i ni tupe po o a ni mea? O mai lava o mai ma le atoatoa. O le a le mea lea ua tatou i ai? Minister o fea lea ua i ai ia le tatou lakapi?

O le a lau silasila ua tatou o ua tea le zero ae ua oo i lalo o le minus .7 and 15. 2007 na ou alu ai e ave le isi malaga a le Malo ae ou pio ifo i Hong Kong, o le tatou toe finauga na tatou maua ai le ipu. Na matou o mai ma le ipu, ioe na matautia le mea lena na tupu i Hong Kong. Ona o le a? Fatu, tama uma lava na avatu i inei. Na o ma le atoatoa e tau le taua. Sei e silasila ane, po o le a le mea lea e tupu i le Iuni Lakapi. Silasila lau afioga leaga e tau lava le sport ia ae tau lava lau afioga. Toe liuliu ai lau tofa po o le a le isi auala e fai.

SUI FOFOGA FETALAI: Toe 2 minute o le sui usufono. Faaatoa le 30minute.

Tofa Olo Fiti Afoa Vaai: Lau Afioga i le Fofoga Fetalai, e faaopoopo ane se isi 15minute o le manaia o le lauga i le faalogologo ma le agaga faaaloalo.

SUI FOFOGA FETALAI: E i ai le lafo ua faatu, faalua...

Faaluaaina le lafo e le sui usufono o Gagaiformauga Nu.3 ma le sui usufono mai Faleata.

E lei faamaonia le lafo.

SUI FOFOGA FETALAI: Faamaea mai le saunoaga a le sui usufono mamalu.

Susuga Hon LAAULI LEUATEA POLATAIVAO: Ia lau afioga i le Fofoga Fetalai ia ua ou masani lava i le mea lea, ua ou masani foi i le fasi tele o au. Ioe, pau lava lea o lau tuualalo, one by one fair fight. Aua le faapoina pe ui mai tua, front. Ioe, I'm watching you. Ia e ava tele atu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fetalai...

SUI FOFOGA FETALAI: Malie le sui usufono sei tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le sui usufono o lo o saunoa nei sa Fofoga Fetalai, ma e na te silafia lelei foi ia Tulafono. O le tulaga lena e tatau ona taumafai ia uma lelei ia lau lauga i taimi o lo o faatapulaa.

SUI FOFOGA FETALAI: Faamaea maile saunoaga a le sui usufono.

Susuga Hon LAAULI LEUATEA POLATAIVAO: Ia, o au nei le tagata e tumu i le faaaloalo, afai e le uma, e le uma le faiaso o le Alii. Ae o lea ua molimoli atu 1, 2, 3, 4, 5 i le Palemia. Lau afioga i le Minisita o le Falemai.

SUI FOFOGA FETALAI: Galuega le Nofoa.Faamaea mai le saunoaga a le sui usufono.

Susuga Hon LAAULI LEUATEA POLATAIVAO: Tasi lava lea lau afioga i le Fofoga Fetalai, lau afioga i le Minisita o le Falemai, faamalo le tau, matou tapuaia lou alofaiva e le faigofie lau galuega. Ae malo le onosai, avea foi lenei avanoa e momoli ai le faafetai tele i e sa galulue ma outou faiva alofilima aua ia le tatou faalavelave na tupu.

Ia alo lau foe ma lou le masalosalo. Faimalo, o le tatou itumalo o le itumalo e saili malo. Lea ua uma ona manino lea ua saunoa atu ni isi o sui usufono, o le tatou nuu i Safotu lea na tupu ai le faalavelave lea na mafua ai le mea lea. Pau lava lau tuualalo sei e silasila ona ua tuuai uma i nai teine le ua ave taloka i le falepuipui. Ae o le faaiuga a le Faamasinoga, o lo o i ai le responsibility, e negative ai le Matagaluega. Na ona ou faaoo atu i ou tafatafa ma le tatalo, o le tamaitiiti lea na maliu mulimuli nei e atoa ai le fuainumera lea, o le tamaitiiti foi o si ou aiga. O le ala lea ou te tatalo ai, fai se Commission of Enquiry.

Lau Afioga i le Fofoga Fetalai, e ui i se manatu ma se lagona, ae o le a see lou vaa. Ou te talitonu ma le faamoemoe, o a ni isi ou manatu ma lagona ua uma ona tusi, o le a ou lauina i le Atua a taeao. E musumusuina finagalo i afioga i Minisita e pei ona ou fai atu lau Afioga i le Fofoga Fetalai, pe lilo i lalo nei, e malamalama e pei o le ao i le silasila a le Atua. O a mea lelei viia le Alii. O a foi mea o lea ou te taumafai e avatu ae tipi mai i lou totogi, ia e le afaina, e uma foi ta fetau i fafo.

Gagaae ma Gagaifo na ou fai atu o le uso, ia ae aua e te naunau tele i le ia, ia ae ia e manumanu i lo ta va nonofo.

SUI FOFOGA FETALAI: Leai e faamalulu atu i le sui usufono mamalu, o le a oo tele i tua lau saunoaga, na e savali i le Nofoa i tulaga o Tulafono Tumau o le Maota, faafetai.

Susuga Hon LAAULI LEUATEA POLATAIVAO: Ia ua uma lau upu. Samoa ma lau tapuaiga, o se upu vaatele i lenei afiafi, ia malu ave i fale i la outou faafofoga. Faamalulu foi i nifi o Minisita ua ou le oo atu nei tei ua faapea ou te le amanaia ia le tou galuega, ae e tele le mea lea sa tau lau atu faafiafiaina ai lo outou finagalo i lenei afiafi.

Lou itumalo, Sa Tupua ma Sa Malietoa ma aiga, aemaise le mamalu o le faletolu. O le paia i le afioga i le sao, mamalu ia Saitupua ma Tuliatoga, mamalu maualuga aua paia ia Saletolo ma le atumamoe Saulutua, Sa Lealiifano ma le Sa Tautauamo ma le lautinalaulelei.

Aemaise le tapuaiga Aiga o Mavaega, mamalu maualuga i le tofa i le tuua, aemaise aiga ma sa eseese faafetai i la outou tapuai.

O lo o lalago pea lago o le sa na faafaofolau, ao lo o manuia pea ma maua se manatu aua upufai o Malo, faafetai i lo outou tapuai mai, faafetai le alolofa moni. E ui ina ou feagai ma luitau o le olaga ma ou savali i le vanu o le ata o le oti, ao lo o pai mai pea le mafanafana o la outou tatalo. Ou te afu i le ie talatala ma le lefulefu, ae e le tuulafoaiina e le Atua. Samoa faamalulu atu lau afioga i le Fofoga Fetalai, ua uma sa matou upu. Manuia lou tulai mai aua le faafoeina o le Fono i lenei afiafi, manuia le Afioga i le Failautusi o le Fono, aemaise o le Ofisa o le Fono Aoao Faitulafono ma la outou galuega fai. Soifua ma ia manuia.

SUI FOFOGA FETALAI: E le tau faafuluina ia le pasina, aua o oe ua leva i le Maota. Ua faafofoga foi Samoa e faafia i lou siuleo. O ou iuleo o le tofa sasaa ma le utaga loloto. Pau lava o lea, malo saunoa. Ao upu lava o le tusi, ‘e sili le usitai i lo le gao o le mamoe poa.’

O le Maota e ufi e pei ona ou fai atu i le taimi ua sola i le gagana ma le faaaloalo. Peitai, o lea ua tafa lou finagalo, ia faafetai, ia e faapena taga o le Maota lenei. E matua lava i le oo. Sui usufono mamalu o Gagaifomauga Nu.3, malo le tofa, lea ua faafofoga le Malo, lafo laia i o latou faiva manaia, aua le folauga a Samoa i lenei tausaga. Ae tatou alo i le tapuai, e pei ona ou fai atu i le taimi ua sola e le sili le tai i lo le tapuai. O le tapuaiga e malu ai faiva, o toeaiina ia.

O saunoaga i lenei afiafi, se ua taliga e fialogo e pei o le tala e fai i mauga o Salafai, malo le tofa e tupu ai lagona. E tupu ai manatu mo a taeao. O le mea lea, faamanuia le Atua. O le tulaga e pei ona e saunoa e savali i le ata o le oti, aua e te popole tau lava o lou faatuatua i le Atua i mea uma, maua ai le malosi.

Ia ua avanoa le Maota mo se sui usufono e fia tulai mai. Lea ua matau atu ua tulai mai ia le sui usufono o Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Atonu ua aoga foi ia le taligasua i le mamoe ua e manatua ai le usitai. Ia ae faamalo faafetai. Ia o le paia o le Maota nei faapea foi le Fofoga Fetalai, aemaise ia le faafofogaaga a Samoa o lo o faalogologo mai. Ia faapea foi ia faafeagaiga taulagi faatulou ma ou faatulou atu, ae o nai motugaafa pupuu lava e manaomia e lenei itumalo. Ia lenei afiafi masalo ua tele upu i manu ae itiiti upu i mala. Ia lea foi ua anoanoai ia manaoga o sui usufono na avatu e finagalo e faatino ia auala.

Sa ou nofo lava ma faamaumau ia manaoga o le tele o itumalo, a fika la i ai i le tele o manaoga lea e i ai, ia masalo seiloga e piliona tala ona faatoa mafai lea ona faatino ia auala. Ia ae puupuu lava ia lau

talosaga ma le faaaloalo i lau afioga i le Minisita o Galuega. Ia e 9 nuu o le matou itumalo 9 foi nai auala galue, talu ona uma ia le tsunami, e 2 lava nai nuu e le i faia ia latou auala. Ia ou te leiloa pe aisea? Pe faatamala pulenuu pe faatamala ia le Minisita o lena taimi ia ae o lea ua faaoo atu i luma o lau afioga o Lotopue ia ma Utufaalalafa. Ia e pau na o nai nuu o le matou itumaloe...

Sa alu le matou asiasiga i Savaii i le tausaga na tea nei i le faaiuga o le tausaga, ia le lelei tele ma le faasoasoa mea lelei o le motu i Salafai, aemaise ia le vaega lea o lo o latou faia ia konekarate o auala. E mafua lea tala ona o auala sa tai kilomita ia le uumi, tai pei o le faiga faavae o le Malo sa i ai, ua i ai le maliega a le nuu ia latou auala galue ma le konekarate, faalua kilomita le auala, ae aua le faataina, ae tau lava ina sua, faalamolemole ma ia faamalo ia o lau foi lea talosaga i o matou auala la e le i soo, matua lauleaga lava. Malilie lava ia lo matou itumalo, tau lava ina faalaulelei ma tanutani i ni maa, ina ia aua ne i palapala ia nai tamaiti e savavali i le aoga. Pau lava lea o le talosaga. Ia masalo foi ua tai faaiuiu ai le lauga lau afioga.

Ae sei faamanatu atu pea nai mea laiti ia. O le Minisita lau afioga Afamasaga, ou te leiloa na ma talanoa nei lava ma le afioga ia Leala, fai mai Leala e sili ona ou talosaga atu ia ia nai lo oe. Ia o le a tuu atu pea ia oe le talosaga lau afioga. O le tala a Leala e leai se aoga e te lauga ai i le matou Minisita ae lauga mai ia te au le Sui Minisita. Ia o lea o le a ou lauga uma atu ia oulua. Ua ou fiu e ki ki le leitio i le weekend lea na tea nei, a mea o la o le a sau le matagi ou te fia iloa pe sau se afa aua e le maua se matou TV, ki ki atu e oo atu i le 2AP e le maua. E nao le gogolo lava ia ou te le faitio lau afioga aua o la e matagi atonu lava aua e faapena pe a le lelei le tau. Ia ae o le mea na i ai sa aau ia le matou leitio i Tutuila ae le i oo i Manua. Ae o le mea lena na tupu e leai foi se reception na maua. O le faigata lena e talosaga atu ma le agaga faaaloalo, e tele lava le faaletonu o matou. Sa ou lauga atu foi i le tausaga na tea nei i le paketi o le tausaga na tea nei, o le saunoaga a lau afioga, 'Tafua aua e te popole o le tausaga fou lea o le a maua ai le tatou Digital ia e oo atu e leai lava se faaletonu o le TV, ia o lea foi la ua maua le Digital, ae o lea lava e tele le faaletonu. Ia e na ona momoli atu i lau afioga, e le o se faitioga, ae o le tuualalo ma le talosaga ma le faaaloalo. E momoli atu le agaga faafetai ma le agaga faamalo. Faafetai foi i lau afioga i le Minisita o le Faamasinoga ma lou sui Lagolago ona o lea na faamanino ananafi ia le tatou Tulafono foi lea, manaia le tulaga la e i ai, o le a le oo i ai sau tala e le i aumai i luma o le tatou Maota nei. Masalo po o se aso o lenei vaiaso. Ae mo le faafofogaaga a lo matou itumalo aemaise o tagata uma ia e resitala i Apia, faamolemole aua tou te liliu fua i sui ia e i Apia. O la e manino le tulafono, e mafai

lava ona tatou palota i tua pe a fai le tatou palota. E leai lava se mea tou te o ai fua e toe liliu. O lea ua outou nonofo i le Vaimauga pe nonofo i Faleata, o lea lava e i lalo o le tulafono, e mafai lava ona outou palota i Aleipata. Ua maua si avanoa e oomi atu ai sia vaega lau Afioga i le Fofoga Fetalai. O le Ofisa o Pulega o Matagaluega faapea Faalapotopotoga Tumaoti a le Malo lea e i lalo o Komiti o atinae tetele a le Malo. E momoli foi le agaga faafetai ma le faamalo. E ala ona ou faapea atu, ona talu ai, e tele ina ausia ia matatia sa faatulai atu mo a outou afioga i tausaga ua mavae. Atonu e faapena foi lenei tausaga lea sa ou faitau totoa lava i le tele o a outou lipoti faale-tausaga na aumai. E momoli atu lava le agaga faafetai ma le faamalo, malo mo le tou tautua, malo mo le auaunaga. E tau i le Atua la outou galuega, e leai se tau i nei sui usufono tulou, aua na o le tele lava i upu ae leai se faamanuiaga e avatu. Ia outou manuia.

O le isi mea, lau Afioga i le Minisita o Galuega, faamolemole, ou te le iloa po o lau afioga e tuu atu i ai le fesili pe leai, ua ou faanoanoa lava ina ua maua le tala ua tapunia Fagalii. E ui ina ua uma ona fai la outou faaiuga, ae na o se tuualalo, e le o se faitioga pe o se tetee. Pe mafai ona toe iloilo le tulaga o le malaevaalele. Aua foi o le malaevaalele i Fagalii, e service ina le taulaga lenei, e 70,000 tagata e aafia ai. A o lea ua fai le faaiuga a le Malo, e leai la sau tala tele e fai atu, e na o le tuualalo lava. E toatele tagata e aafia ai i le faaiuga lea ua tapunia le malaevaalele. Ae o le taua ia o lenei malaevaalele, e latalata mo le 70,000 tagata lea o lo o nofo i le taulaga. A mafai ona toe iloilo pe toe sailiili, afai o le for safety reason ua sui ai, sa safe mai lava i le la 40 tausaga talu ai. E na o se tuualalo i lau Afioga ma le faaaloalo.

Na ou lauga foi talu ai, i faapatupatu ia i matou aualagalua uma ia o le matou itumalo, o le matua maualuluga lava o ia faapatupatu. Se i faapea foi o le mea lapotopoto lea e i totonu i i, toetiiti pei o le maualuga o kesi lele. O le mea la e i ai, o taavale a nai aiga mai Ausetalia ma Niu Sila e le maualuluga **jessie** o taavale, o taavale laiti e affordable e o tatou aiga i inei. E faapena foi i taavale ia e faatau i faletaavale i Apia. O le tele lava o taavale e o atu nai aiga, pe \$10,000 pe \$20,000. Aua o le tupe lena e ausia e latou e faatau ai taavale. O nai taavale na, e faapea o le auala lea e faapea le maualuga. O lona uiga la a faapea e faapea le maualuga o le faapatupatu, e faigata ona negotiate e aiga. Sa ou talosaga atu, o le tali, o lea o le a fai faapatupatu. E le tasi la, o le tele ia o faapatupatu masalo toetiiti maua le 20. Aua e le autasi lava, e alu atu i Lalomanu e tau i Tiavea, e faapena lava le tele o aualagalua la e i ai, o le matua maualuluga lava o faapatupatu. E talosaga atu ma le agaga maualalo i le Ofisa o le LTA, se i silasila i le vaega lea. E le gata i le faaleaga o

taavale a nai tagata, ae ua tele foi tagata e o mai e faasea mai. Ae o lea ua oo atu ai ma le faaaloalo.

O le isi vaega, faafetai lava mo le auala o le matou faleaoga i Saleaamua Primary school, e na o le 80 metres le umi o le auala. Ailoga foi e atoa se 80 mita. Ae o le faanoanoaga i le auala, sa ou talosaga atu, faamolemole alu atu se isi e monitor le faiga o le auala. O lea la ua timuga nei ma matagi, e toeitititi faapea le isi vaivai la e toa mai luga o le auala foi lea e le i atoa se masina talu ona fai. O lona uiga e le lelei le monitor ina, e leai se isi na monitor ina le faiga o le auala. Ou te talosaga atu ma lou agaga faamolemole e toe alu atu se isi e toe silasila i ai, po o le a le tulaga tonu e tatau ona fai ai le auala lea, aua ou te le iloa po o le a le tele o le tupe na alu ai. Ae o le agaga lava ia o le faafetai, faafetai o la ua faatino, ae leai foi se aoga e faatino ai pe afai e le lelei le faiga. Aua o lona uiga e maumau tupe a le Malo e alu ai, ae leai se aoga na fai ai. Sa sili lava la ona tuu faapea, e o palapala nai tamaiti i le aoga. Ae faamolemole lava, silasila ifo i ai.

O le isi mea manu o ou manatua, o le poloketi le ana fai e le Malo, o luma o le fale o le Malo lea ua fai ai togalaau, matagofie mea uma. Ua fai uma mea uma ae oo i le auala na sua i luga e fai ai togalaau ma footpath na, e oo mai i le aso, e te alo i totonu i le isi middle lane, talu ai e leai se isi na monitor ina le faiga o lona auala. Aisea lava ua leai se isi e silasila i lea vaega, ou te ofo pe afai e le o silasila i ai se isi i le auala lea. Ou te alu ai lava au i aso uma, masalo foi o lo o affio ai le mamalu o le atunuu. E te tau loa i le mea lona na fai o le poloketi fou lona a le Malo, osooso i luga le auala, e faapena, osooso i luga, o lea la ou te le talitonu ai, ou te le malamalama foi pe aisea. Ao le role la lea a le LTA o le monitoring ma le Ministry of Works. Ae ou te le iloa la po o ai e faia lea galuega. Faamalie atu o lea ua ou fai atu, leaga tou te lipoti mai i le matou Komiti, leaga ta te fiu foi e fai atu e le o faia le galuega lea ta te fai atu ai. O le ala talosaga atu lea i totonu o le Palemene. Faamalie atu ai ia outou affioga.

E talosaga atu ma le faaaloalo i lau Affioga i le Minisita o Aoga, o nai a tatou awareness programs foi ia mo le.....i totonu o le aoga. E manaia pe afai nai mea faapena pe afai e talafeagai ma lou finagalo ma le Pulega, awareness programs foi ia mo puipuiga lautele mo faamai oti, o le gugu o le toto mauuluga ma le suka. E pei o le mauuluga lona o le **stats** lea e iai o tagata maliliu pei o le toto mauuluga o le suka. Ae afai la ni tatou awareness programs, o lea ou te vaai i le TV o la e faasalalau mai fruits and **veges** e tausi ai le soifua o tagata. A fai ni mea faapena e fai ni faailoilo i tamaiti, i a latou tusi aoga ma mea faapena. E tasi lona mea manaia e fesoasoani i le mea lea na tupu nei ia i tatou. A o i ai sina seleni o totoe i mea ia

na aumai i le misela, avane sina mea e faalava ai se tatou polokalame lena o le puipuiga. Ma le faaaloalo.

Sa i ai le sui usufono na lauga, e pei lava o le sui usufono mo Safata. Na lauga i mea o **brazenia** e faaaoga e tagata pagota i le falepuipui a o lea o le a alu e palola. O le manaia o le agaga o le lauga a Leaana lea sa fai, atonu e faasaoina ai le tupe a le falepuipui. Lau Afioga i le Minisita o Falepuipui po o e faafofoga mai, atonu e aoga foi le vaega lea. O la e fai e Niu Sila ma Ausetalia ma Amerika. E fai lava le **brazen** i le vae po o le lima ona fealuai lea e le mafai ona lau ese ma le atunuu, e le mafai foi ona alu ese, ua faaaoga le **GPS e locate** ai le tagata. Ae silasila i ai, ou te le iloa po o le a le tau. Atonu foi e fesoasoani malosi i lau afioga ma le Matagaluega.

Ona e le o i i le afioga ia Sala, ae o lea e i i le sui Minisita. E talosaga atu i lau Afioga ua leva ona maea fale ia na fai, faafetai lava. O lea na faafou, o fale tuai lava a o lea na toe faafou. Ae oo mai i le aso e le o faaaogaina, na o le o atu o turisi ae fai atu e fia faaaoga le fale, ona tele lea ina faaaoga le fale o le matou aiga. Ae o le mea sili o la e totogi atu foi le tupe ia au pe a faaaoga, ae ua faaaoga fale o le matou aiga, ao la ua tutu fale lea na faaaoga e o i ai le auturisi pe a o atu. Ou te le malamalama la pe o le mea na ona fai e teuteu foi lea, ma tusi ai le upu o le public toilets tulou, ae le o ae...e pei se fale matamata lea e fai i le matou nuu, na o le o atu matamata i ai. Faamolemole a outou afioga, a o faafofoga mai le Ofisa Sili o le Faalapotopotoga o Tagata Tafafao maimoa mai Fafu, ou te le iloa po o le a le mea na fai ai, ae le o faatinoina. Aua le fai na o le faataunuu, ae fai ma faaaoga, ia **utilize** tupe a le Malo lea e faaaoga faamolemole. O lea ua 6 masina talu ona uma ona fai le fale, a o le mea lea ua i ai, ua laki, ana faapea e talitali tagata i le 6 masina, po o le a le mea o le a tupu nei. O le faafetai ua fai le fale, ae leai faafetai o la e lava e le i faaaogaina. Lau Afioga i le Fofoga Fetalai, masalo na o le pau lena o mea na tusitusi i lalo.

Afai foi o faafofoga mai le itumalo, faamalulu atu e le i avatua se meaalofa o le Kirisimasi ma le tausaga fou. O le tausaga mulimuli lena o le tatou palota, manuia le faafofogaaga. Soifua.

SUI FOFOGA FETALAI: Malo le saunoa, lau susuga i le Tuiatua faanofonofu. O lauga a toeaia e oto lava le moemoe, e anoa foi. E pau mai lava le talo matua ia e toa ai le moa, o upu a le atunuu. Malo faafetai. Faafofoga mai foi le atunuu ma le lauga, fesoasoani aua le tau atinaeina o le itumalo. Saunoa le sui usufono mo Anoamaa i Sisifo.

Tofa Hon LAUOFO FONOTOE NUAFESILI PIERRE LAUOFO (Anoamaa i Sisifo): Faafetai i lau Afioga i le Fofoga

Fetalai. O le a taumafai atu ia lenei itu e faamaea, ae le i oo ina tali le Malo.

E faapopo ni aso ua, ae le tuua ni aso folau. Ua tatou i ai i le vaitaimi o matagi malolosi ma le louloua o le tau. A o le tatalo fai soo, ia mamao ese atu ni afa ma ni matagi o lo o fougou mai. Ua maea i le malama ua sola ona molitai le puapua i fatulegae ma malo tumau, e pei o le fetalaiga i le itulagi i sasae i le motu mutasi. E faafetaia ai le alofa ma le agalelei o le Atua, lea ua tatou saa i maa o malie ae siva i lagitau. Aua o lea ua tatou lelepa i le malae o totoa ae le o le malae o le papa. I lenei foi, ... le uluai aso ua sii ai i le tai le sa o le Palemene, aua lana folauga i lenei tausaga 2020. O le tausaga faaiu o lenei foi Paeiga faa-Palemene. O le tatalo a lenei sui usufono, ia mamao ese ni galu fatioo, galu apiu, o auma fatilolo o le vasa, ae ia folau i lagima le Palemene o le atunuu i lenei tausaga. Ou te manatu ua tau fai sunui ao o le lagi aua ua malu le malu ua pau foi le malualii i le faletauasi. Aua o lea ua afio lau Afioga i le Fofoga Fetalai o le Maota, afio lau Afioga i le Palemia, le Sui Palemia le aiga Kapeneta faapea foi ma Minisita lagolago i le la itu o le malu. Liua le vai o le tamaitai i lea itu o le malu, afio Afioga i Taitaifono, Sui Taitaifono ma sui mamalu uma o Komiti Tumau faa-Palemene. Vae atu le ee tapuai mai o Ofisa Sili o Pulega o Matagaluega a le Malo ma Faalapotopotoga Tumaoti. Aemaise le tapuaiga i le aoao o Samoa, o lo o tapuai mai i Maota ma laoa o le atunuu i lenei itula o le afiafi.

Ua matauina le Tala Faaopopo o le tupe, ua folasia i le Maota, o nai fetuunaiga o nisi o vaega o tupe ua faapena ona faataoto mai i le Tala Faatatau Autu o Tupe ua maea ona pasia i le tausaga ua mavae atu po o le tausaga faaletupe o lo o faagasolo nei. Lau Afioga i le Fofoga Fetalai o le Maota, ua anoanoai saunoaga ma lauga i le faamai o le misela na aafia ai lo tatou atunuu. Ona manatu lea ua lava ma totoo ia. O saunoaga faafetai i le Malo ma le aufaigaluega, o latou malaga mamao mai fafo e fesoasoani e tuu mai le aao fesoasoani. E faapea foi upu faamaise i le tele o aiga, ua fano soifua o alo ma fanau ona o lenei faamai, e tatou te lagona faatasi. Ae taua i lou taofi le faamaopopo mai o ni lipoti, ina ia tuufaatasia ai ni fautuaga, ni fautuaga aoga. Afai foi ae se tofa e faavae se komisi suesue, e lelei foi, o le auga ma le faamoemoe, ia tuufaatasia ni fautuaga taua, fautuaga aoga ma le lelei. E faufau ai ma afaafa ni faiga faavae, ae po o se tulafono foi tau Soifua Maloloina, e tuuina mai i le Maota mo le pasiaina. E fai lea ma taiala mo le agai i luma, aua e malie i saunoaga a nisi o totoo. O lo o i ai foi isi faamai fou o lo o faapena ona fotu mai, ua faapena ona faalauiloa mai e nisi o atunuu o le lalolagi. E taua ai lava le malu puipua o si o tatou atunuu. Ua aafia le tulaga o le tatou tagata tafafao maimoa mai, ona o le talaave o lenei lava faamai

ua aofia ai lo tatou atunuu. E faafetai i le Malo o lea ua matauina o lo o i ai se vaega seleni, e toe uunaia ai ma toe faasalalau aini talalelei a o ni talaleomalie aua le faatosinaina o tagata tafafao maimoa mai i si o tatou atunuu ina ia toe siitia le aofai o i latou e tafafao maimoa mai aua le taumafaiga ma le uunaia o le tatou tamaoaiga ina ia lelei ma siitia i se tulaga maoae.

Lau Afioga i le Fofoga Fetalai, o se miti ua leva ona taulagi, ae faafetai o lea ua i ai vaegatupe e faatuina ai pe faavaeina ai o se kolisi faapitoa mo le aotauina o tatou leoleo, ia atonu o le a aofia ai foi ma leoleo o falepuipui ina ia lava tapena aua le malupuipua o le atunuu i ona vaega eseese, aemaise lava i ona tuaoi faapea foi tatou uafu ma malae vaalele. E momoli atu ai le faafetai i lau Afioga i le Minisita o Tupe mo le faaavanoaina o ia seleni aua lea atinae taua. E foliga mai e laitiiti le poloketi, e foliga mai e leai sona taua tele, ae i lou lava talitonuga, e taua tele le poloketi o lo o aumai i le Tala Faatatau Faaopoopo o le Tupe i le tulaga o le toe faaigoaina o tatou auala faapea foi le faanumeraina o fale o kamupani, o pisinisi, faapea foi maota ma laoa i totonu o le taulaga o Apia. E taua tele lea vaega mo le aufaipisinisi, o le i ai lea o ni tuatusi mo a tatou kamupani, faapea foi maota ma laoa o le atunuu aemaise lava i totonu o le taulaga o Apia. Aua e taua i ona fesootaiga faapisinisi aemaise lava foi o fesootaiga ma atunuu mamao ma isi kamupani i fafo atu o le atunuu. Ae taua tele foi mo le Malo, e taua mo le Pulega o le Suavai, e taua mo le Malosiaga Faaeletise, e taua foi i le Matagaluega o le Soifua Maloloina, ae taua foi i le Komisi o Faiga Palota, aua o lea ua faataua le palota o le tagata i le nuu o lo o nofo ai vagana ai le matai, o le a faafaigofie ai foi ona saili tonu le nofoaga o lo o nofo ai ma aumau ai tatou pe a oo i le vaitau o le palota.

Lau Afioga i le Fofoga Fetalai, ae le i agai atu se faamatalaga po o se tautalaga foi e faamanatu i atinae ma manaoga foi o lenei itumalo, e fia pai lava se upu i le atinae lea o le tatou malae vaalele i le afioaga o Tiavea lea o lo o faagasolo ma faagaoioi i le taimi nei. Atonu e eseese taofi, e i ai foi nisi ua faitio. Ae i lau lava vaai faa-sui usufono e taua tele i le vaai mamao i le faasafuaina o le tamaoaiga. Aua i le i ai o le malae vaalele lea i le la itu o le motu o Upolu, o le a manuia ai foi lea faaitu aemaise lava o matou itumalo i le tulaga o le traffic ma le feoaiga o taavale, e manuia ai nai atinae laiti, o faleoloa ma nai isi lava flea maketi a nai aiga. Aemaise lava le tulaga o le a faaleleia ai pea auala e agai atu i lenei itumalo ma le la itu o Upolu. E pei lava o le tulaga o lo o i ai foi lea itu i sisifo i le manuia foi o le aitu ona o le malae vaalele i Faleolo ma le uafu i Mulifanua. O vaega ia e taulai i ai lau vaai aua ou te manatu o se atinae taua mo le la itu o le itumalo o Atua. Afai e vaai atu o le tulaga lea e tau vaavaai atu ai pei ua toa le galuega, a o le tatalo i lau Afioga i le Minisita o Tupe

ma le Malo, afai o manaomia nisi vaega faaopoopo, o le tatalo ia talia, ia faamaea lea atinae ona o le taua tele pei ona ou talanoa atu.

Oo mai se tala faamanatu i le Afioga i le Minisita o Galuega i atinae o lenei itumalo, o le auala e agai i Sauniatu. O nei atinae uma, o lena e silafia e lau Afioga ua uma ona faaoo atu i lou ofisa talosaga tusitusia a ua tatou feiloai foi faapea foi nisi o afioaga o lenei itumalo. O le auala e agai atu i Sauniatu, ua leva ona tatalo atu mo le faaleleia o lea auala ona o ni Ekalesia faapea foi nisi o afioaga o lo o i ai i luga o lea afioaga e agai i uta, faapea foi le auala galue o le afioaga o Salelesi ua tele lava tausaga. E talu lava ona sua lea auala galue, e oo mai lava i le aso e le i faataina lava i le tele o tausaga. E faapea foi le auala agai i uta i Solosolo pei ona silasila i ai lau Afioga i le Minisita, ou te talitonu ua maea foi ona e asiasi i ai, ia o le toatele lava o le afioaga ua aumau i uta i le auala lena, e fa foi Ekalesia tetele o lo o i ai ma o le toatele o le nuu o lo o ua nofoia le auala e agai i uta. Ae o lo o faaletonu le taligalu i tai, ua faaletonu ona o le malosi o le galu e pei ona i ai i le la vaiaso ma lenei vaiaso, e faapea foi le la tausaga ua tea. O lo o manaomia le toe faaleleia o lena taligalu lau Afioga i le Minisita.

Ia, e faapea foi ona manaomia le faaleleia o auala galue o le afioaga o Eva ma isi nuu o le matou itumalo e pei ona e silafia. I le tulaga o taligalu, e manaomia lava le taligalu e fia faaleleia i le afioaga o Salelesi e faapea foi Fusi ma Eva. E talitonu foi o lena foi ua i lau Afioga i le Minisita talosaga tusitusia a lenei itumalo. O nisi foi o lena taligalu sa pasia foi o le a faatino i le Paeaiga ua tuanai, peitai, e le i faatinoina lava e oo mai i le aso. Se i silasila ane lau Afioga i le Minisita, faamolemole i nai manaoga na o lenei foi itumalo.

E faaiu atu ai se tala i se faafetai i le Komisi o Faamasinoga faapea foi le Malo, i le Kapeneta i le faamaoniaina o le tofiaina o nisi foi o tamalii o lenei itumalo i tofi faamasino, e le gata i le Faamasinoga o Fanua ma Suafa, ae faapea foi le faamasinoga faaitumalo ua faapena ona seei ai nisi o tamalii o lenei itumalo. E momoli atu ai le faafetai i le Malo i lena itu.

Lau Afioga i le Fofoga Fetalai, ona foi mai lea o se leo, e manatu o le a seu i fanua lou sa, ia manuia tele lenei afiafi, manuia lau Afioga i le Fofoga Fetalai, manuia foi sui usufono o le Maota, ae faapea afioga i Ofisa Sili o Pulega ma le tapuaiga a Samoa. Faafetai.

SUI FOFOGA FETALAI: Malo saunoa i lau Afioga i le sui usufono mamalu mo Anoamaa i Sisifo, ua faafofoga le atunuu faapea foi le itumalo, e faapena foi i le Maota nei vaeatu le afio mai o le Palemia ma le Aiga Kapeneta, o lea foi ua taunuu mai au faamanuiaga aemaise foi o manaoga o le itumalo, ia tatou tuu lea aua le latou galuega fai ina ia faataunuaina le faamoemoe o le itumalo. A

o lo o avanoa se isi sui usufono e fia saunoa. O lea e maitau atu toe toalua.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai o lau fesili, aua e uma loa au Taitaifono taofi loa. O le mea lena...

SUI FOFOGA FETALAI: Ia, pei o le agaga lena o lea e tau avatu ai le fesili, faapea foi i Sui Minisita, o le avanoa lelei lenei, afai e leai, o le a tuu loa le avanoa ia Palauli le Falefa faapea le Komiti o Tupe.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai.

SUI FOFOGA FETALAI: E faamalulu atu i le sui usufono o lo o saunoa, o le avanoa mo le sui usufono mo Faleata Sasae e saunoa ai.

Afioga SALAUSA JOHN AH CHING (Faleata Sasae): Ia, e tulai i le ava ma le faaaloalo tele e tatau ai e faafetai atu foi i le Afioga i le Fofoga Fetalai mo le avanoa ua tuuina mai. Ma o lenei afiafi, e tulai atu e faaali se leo po o se sao foi o le itumalo o Faleata i Sasae. Ma e faamalulu atu i le itumalo, na ou oo mai i le Palemene lenei o le sui usufono mo Faleata i Sasae, a o le taimi lenei, o lea ua suia nei le tatou vaevaeina o itumalo i Faleata Nu.1. O le mea lea, e faamalulu atu i le tatou nuu i Vailoa i Faleata le susu o Siliga ma Umusa i le Siliga, alaalatai Nuu ma le Atinuu ma upu ia te oe le Faiga. E le o se faimea tuulafoai o le tou sui usufono ae ona ua pau o tofiga ua oo i ai le tatou faigamalo i lenei vaitau, o lea ua suia ai le tatou itumalo. Ia o se faamatalaga ma se tala i lenei afiafi, o le a faapito augafa i le itumalo fou lea o Faleata Nu.1. O Faleata Nu.1 ia o lo o aofia ai Vaimoso, Lepea ma agai atu lava i uta, e aofia ai Sinamoga, Moamoa. O Moamoa foi, ua le o toe tasi se Moamoa. Na amata Moamoa o tasi, a o le mea lea ua i ai nei, ua fa Moamoa. O Moamoa lava ia ma Moamoatai, Moamoafou ma Moamoa mauga lea ua i ai nei. O le tulaga lena ua i ai lenei itumalo, ona faasolo ane lea i Sinamoga, Alafua, Lotopa, Pesega, Lepea agai atu i Tuanaimato, Tuae fu, e faagata mai i Ululoloa. Ma o le itumalo lenei i le tulaga lea ua i ai, faafetai foi i le Tulafono fou o Faiga Palota ua toe vaevaeina ai itumalo. Aua o le ata lea ua taatia mai nei, masalo o lea o le a faasolo lava agai i luma le manino mai o tagata moni lava o lo o alaala ma papaaao i totonu o le itumalo. Ma o le itumalo lenei o Faleata Nu.1 i faamaumauga o tatou tusigaigoa i le 2016 e sili atu i luga i le 13,000. O le 13,000 lena o le itumalo lea e tasi nei e le sui

usufono lenei e toatasi. Ia ma o le itumalo foi lenei o lo o faatupulaia pea le fuainumera. Ma o le fuainumera lena i le 2016 i le 2019 e le iloa po ua 15,000 le faitauaofai o le itumalo lenei. E le taulia la tagata palota, ae taulia le aofai o le itumalo, aua o tagata uma ia ou te tausi i ai. Ma e faafetai i le lautele o le atunuu i nisi o le mamalu o le atunuu o tupu ma ee ua saili mai so latou lumanai i totonu o Faleata. Ma o le toatele o tamalii ma failauga, faletua ma tausi ma aiga mai le tatou motu i Salafai faapea foi o tatou aiga mai tua, o lea ua maua nofoaga tumaoti i totonu o le itumalo o Faleata Nu.1. Ma e toatele foi nisi o lenei Maota o lo o alaala i totonu o Faleata Nu.1. E toatele foi nisi o lenei Maota o lo o alala i totonu o Faleata Nu 1, ma ou te tausi uma ia te outou. O le mea lea, e sau se taimi ona fai atu lea o se tala i le agai i luma o lenei itumalo. A o lenei itula e fia faaleo le agaga o le faafetai, ma le faamalo. E muamua ona faafetai atu i lau susuga i le Fofoga Fetalai, ua aulelei foi lau sao fai mai i lenei afiafi. Faamalo faafetai mo le faafoefoaina o le tatou Fono. E fia faaleo le agaga o le faamalo ma le faafetai i lo tatou Malo, i le susuga i le Taitai o le Malo ma le Kapeneta, le Palemia ma le Sui Palemia, faapea foi Minisita Lagolago, ae tainane foi le la itu o le Maota. Tainane foi le faafofoga mai o Ofisa Sili o Pulega o Matagaluega ma Faalapotopotoga Tumaoti a le Malo. Tainane le Failautusi ma le Ofisa o le Fono Aoaofaitulafono, faamalo faafetai faapea foi i latou o le au tusitala, faafetai mo le tatou tapuaiga i lenei po.

O le Tala Faatatau o le tupe ua tatou talanoaina nei i lenei afiafi. Ma e o le tala faatatau o le tupe sa fausia e le itu lenei, ma e leai la se tala ou te toe faia agai i ai, aua o le lipoti ma le Tala Faatatau o le tupe na matou fausiaina. Ma o le mea lea, e tulai atu e lagolago e lenei itumalo le Tala Faaopoopo o le tupe. E faafiafiaina lava le agaga o lenei itumalo, aua o se tasi lenei o itu sa popole tele i ai le amataga o le tatou nofoaiga. E pei ona taua e se tasi o sui usufono, o le **one party state**. Ma o le atugaluga lea sa i ai i le nofoaiga lenei, aemaise o le Afioaga i le Taitai, ne i te i ua faaletonu le tatou agai i luma i le nofoaiga i luma ina ua leai se Itu Agai. O le mea lea, a o le silasila atu ma le vaavaai i le gasologa mai o le tatou nofoaiga, o lea toe o le tausaga mulimuli lenei i Tala Faatatau o tupe, o lo o agai lava i luma. E le i pau lava i tua le tatou foreign exchange po o le tatou tupe faaleoleo i fafo i tausaga uma. E le i palasi lava i lalo o lo o agai lava i luga. E ui lava ina laititi ae o lo o agai lava i luga. O le mea lea, e momoli tele atu ai le faafetai, e le gata i le Kapeneta a o tatou uma ma le aufaigaluega uma a le Malo. Aua e le i tupufua le mea lea, ai o le mea tonu lenei ua moni ai le faaupuga a le atunuu. O le avega e tausoa. Na o tatou tausoa faatasi lenei avega lenei ua oo mai i le tausaga mulimuli o lenei nofoaiga. E ui ina tasi le pati i totonu o le Palemene ae o lea o lo o solosolo lelei. O se luitau lea sa ia i tatou,

ma o se fiafiaga tele lea i lou nei sui usufono, ina ua tatou oo mai i le taimi lenei, le tausaga mulimuli e le i faaletonu lava le Tala o le tatou tupe. O le tulaga lena, e momoli atu ai le faafetai tele.

E agai atu le faamatalaga i le misela, ua tele foi ni manatu ua uma ona faaalua, faamaisega foi i nai aiga sa mafatia, ona o le valaau a le Atua. E ui lava foi ina matuitui le oti ma le maliu, ae ou te manatu o le tele o a tatou fanau ia ua avea nei ma le au agelu a le Atua i le lagi. Ma o i latou foi ia, o le a fai ma puipui i aiga ma matua o e sa mafatia ona o le valaau a le Atua. O agelu ia o le a fai ma outou agelo tausi i aso uma. Ma o lo o faanonomanu foi aua se lumanai manuia o matua ma aiga. O lenei foi faamai o le misela, o le faamai lea e mafai ona tatou lafoaia, e mafai ona lafoaia e Samoa i nuu le aina. I nuu e leai ni tagata e nonofo ai. E faapefea ona tupu lea mea. E tupu pea tatou toaaga e onosai e fai le tui puipui. O le siama o le misela, e tasi lava le nofoaga e ola ai, na o le tagata soifua, e ola ai le siama o le misela. E le ola i luga o se vai e le ola i le paumatu, e le ola i se manu. Le paia o le Maota e na o le tagata soifua e ola ai le siama o le misela. O lona uiga a tui puipuia uma tatou e tataua ona tui e leai se nofoaga e toe nofo ai le misela. Tui puipuia uma tagata e tataua ona tui, leai se nofoaga mo le misela. O lona uiga ua tatou faataalise atu le siama o le misela, lafo atu i le nuu e leai ni tagata o nonofo ai. O le mea lea tatou faamalolosi, tatou faamalolosi ma ave le fautuaga. O tatou o matua o lo o faalotolotolua ina ia tui puipuia nai fanau, ia manatua o le aiatatau a nai fanau i le latou soifua maloloina ma le latou soifua lelei, e faatino e outou matua, e faatino e tatou matua le aiatatau lea a fanau i nai aso i fua manuia. E leai se leo o fanau e mafai ona fai i le mea lea, e le mafai foi ona o fanau e ave lava latou e tui puipuia. E faamoemoe ia tatou matua, e ave fanau e fai le tui puipuia. O le rights ia a fanau, o le aiatatau ia a nai fanau e faatino e matua. O le tulaga lena i le misela e pei ona fai atu e mafai ona tatou lafoaia i nuu le aina.

Ona sau ai lea o se faamatalaga i le tulaga lea ua i ai nei le tatou faigapalota. E pei ona ou taua i le taimi ua fano i le toatele o le faitauaofai lea ua i ai nei, le itumalo o Faleata Nu 1. E tasi lava le priority pe tasi lava le faamuamua o lo o taumafai nei Faleata Nu 1 e tuu atu i totonu o le Maota lenei, i le mea o lo o manaomia, na o auala lava.

SUI FOFOGA FETALAI: Ua ou faalavefau i le saunoaga matagofie a le sui mamalu mai Faleata Nu 1, talu ai ona ua tatou taunuu mai i le taimi malolo e pei ona i ai le lafo a le Taitai o le Maota i le taeao ua sola. E manatu ai e fai lenei laolao e momoli ai le faafetai tele, i le paia maualuga o le Maota i tulaga faalupea, malo le usufono malo foi le faatoatoa. Malo lauga ua faafofoga Samoa i lo

outou finagalo aua le tau atinaeina ma manaoga o tatou tagata. Ona i ai lea o le manatu o le sui mamalu o saunoa. A toe tauaofia le Maota i le taeao a taeao pe a tusa ma le finagalo paia o le Atua, o le a toe faaauaia i lau saunoaga.

A o le i tolopoina Taualaumaga o le Fono Aoao i lenei afiafi, ou te tapa le sui usufono mo Faasaleleaga Nu.3 e saunia se tatalo faaiu e faamaea ai galuega a le Maota.

Na tolopo Taulumaga a le Fono Aoao Faitulafono i le itula e 11:03 seia aulia le itula e 9:00 i le taeao o le Aso Lulu, 22 Ianuari 2020.